

NKONDO IKATAMPE

YABULWA KULWIWAPO KALA



Nakusachila, Mulongo Orman. Aye Nkambo akupeshe.

² Mwabuka byepi lukeelo luno, balunda. Njibingi na lusekelo pakwikala kuno jibiji lukeelo luno, kabiji kyajinga kyakubula kuketekela ne, Naketekela, kwi amiwa mwine, kabiji Naketekela mba kyakonsha kwikalatu pamo ne kulubaji lwa kipwilo. Kabiji Natangilenga ne. . . Nemusachila, nyenga. Kabiji aye Nkambo kyamweka nobe wabika kintu kimo kicheche mu muchima wami, kyakuleta ku Kipwilo, kabiji Nakulanguluka mba kyo kimye kya kwikyuba. Kbiji pano akye. . .

³ Kimye kyo Nafikile, kabiji mambo akubula kuyuka mba tukekala kuno pano Pamulungu, Nabijika mba Nji na—na Mbila ya Kipwilo. Kabiji Nakeba kuuba mba, inge Lesa waswa, kuleta iye Mbila Pamulungu ubena kwiya. Kabiji kikekala kimye kyalepa, nanchi, kapepo kechi ikapwa kasa ikyangye ku kumana twelufu-sate, wanu koloko, kape, inge pa kyokya kimye. Kyaikala pa muchima wami pa kimye kyalepa bingi, kabiji Nalanguluka mba Njina kongole ku bantu ya kupana mukumbu kika kyo Nabujila kwikala Wakalakana mu mwingilo mwaya ntanda. Kabiji Amiwa ne kisapwila monse monse, bino kine Naketekela kechi kyafika bulongo byo kyafwainwa kwikala ne. Nanchi Nalanguluka mba, aye Nkambo inge waswa, Pamulungu wiya, Nakeba kwikala na kimye kyabaya kyakufikizhizhamo kikye, eene mambo kabiji kika, kabiji muyuke mba, mwaila Binembelo, kika kibena kubiwa, monai, nanchi byo kyaikela byobyoyo. Mambo, kapepo Amiwa nkaya kubushiya bwatulunga nangwa kuntu kukwabo ponkapotu. Amiwa mbena kupembelela kumona kwepi Aye ko akangita ami kuya. Kyapelako. . .

⁴ Pepi nobe mafuku asatu apita, nangwa mafuku abiji, Bangichile na foni pepi nobe pakachi kabufuku; kabiji kyajinga kya kulombelela mwanamukazhi umo wajinga mu kipatela kikatampe. Kabiji bangichile, ne kwamba mba, “Lombai.” Kabiji Nalubilemo jizhina jo bampele, kuuba mba. . . Baambile mba bajinga mulunda ku ba Mrs. James Bell, nyenga yetu muno mu kipwilo, nyenga wachiluluka, wakishika bingi, mwanamukazhi wawama. Naketekela jizhina jajinga Shepherd, jo bampele. Nanchi Amiwa nabukile pa mwanya kabiji nafukamine panshi, kabiji—kabiji nabuujile mukazhami. Foni wajijilenga, wamubushishe kufuma mutulo. Kabiji Naambile mba, “Twafwainwa kulombelela Mrs. Shepherd, nyenga awa

wajikutuma, ke mulunda waba Mrs. James Bell.” Nanchi twamulombejile, twabwelele mu mwanya.

⁵ Kabiji nanchi palutwe pepi nobe jikumi nangwa leveni koloko, juba jalondejilepo, Batumijile jikwabo. Kyajinga ke Billy. Kabiji aye waambile mba, kechi kyajinga ba Mrs. Shepherd ne, waambile mba kyajinga ba Mrs. Bell, abo bene, kechi balunda baba Mrs. Bell ne. “Kyajinga ba Mrs. Bell, kabiji baji mu kipatela, bakolwa bingi.” Kabiji pa kunyemena ku kipatela, bino bajinga baya. Aye Nkambo wibechile ba Mrs. Bell, ku Muzhi.

⁶ Mrs. Bell wajinga wakishika mu kupwila pamo ne ateba kuno ku kipwilo, pa myaka yavula. Balune wanji, ba James, ne Amiwa, twaingila pamo, ne bataata, myaka yavula yapita kunyuma, kuya, kasa tunyema...Twalondanga byangyangi, kufuma ku Pennsylvania, kufika ku Colgate kuno, myaka yavula yapita, Naketekela myaka sate yapita, nangwa kukilapo. Kabiji twamutemwa Nyenga Bell. Wajinga ke wakinkambo.

⁷ Kabiji Bambula mba wajinga na musongo wataata bingi wakisukwilo, kabiji abo...Dokotala wanji, wayukile alwa lukatazho bulongo, wajinga wabulamo mu tauni pa kyokya kimye. Kabiji dokotala wakataka ye waishile na kumumona, kabiji—kabiji wakambizhe kutumbula kwa bukiji bukiji, kabiji kechi wapulukile ku kyokyo ne. Kabiji—kabiji wajinga... Nalanguluka wanji...Jishinda mo nekilangulukila, amba dokotala wanji wajonse inge kechi wakambizhe mba—mba bamutumbule ne, mambo wajinga wabaya-mubiji kabiji kisukwilo kyajinga kyatama bingi. Kabiji wajinga na mabwe, Nalanguluka mba, nangwa kintu kimo mukachi kakyoko, kabiji—kabiji aye Nkambo wajinga na lusa. Wajinga na yoyo misongo kunyuma kabiji Nkambo wamulamanga ku bibye, bimye byavula. Bino kyamwekeletu kwikala ke... Kyawama, inge twikileta mo kyabaila, twakonsha kwamba mba: Lesa wamwichele Nyenga Bell, kabiji aje jajinga jishinda ja kusendelwamo, mwamona.

⁸ Kabiji Aye byo apushile...wikiletele kwi amiwa, kya kuuba Nalanguluka mba wajinga Mrs...wa Miss Shepherd. Amiwa kechi nayukile Miss Shepherd ne. Aye inetu wafwainwa kwikala muno, lukeelo luno, kabiji Amiwa nakonsha kumuyuka inge Nakonsha kumumona pa kilungi kyanji. Bino, kyaambiwe mba kyajinga Mrs. Shepherd. Kabiji kana kyaubiwe muyewa musango, pakuuba mba inge kya...Inge Nayukile mba bajinga ba Mrs. Bell bo bajinga muyewa musango, Amiwa kape ngenayile ponkapa ne kutatula kumulombelela ponkapotu. Kabiji pano, monai, mba, Lesa kechi wakebelenga atweba kuba kyokyo ne, kapepo. Nanchi, “Twayuka mba bintu byonse bingijila pamo ku buwame bwa boba batemwa Lesa.”

⁹ Kabiji Amiwa naketekela mba Nyenga Bell watemenwe Nkambo yetu. Wajinga mwanamukazhi wawama. Pano, wajinga umo wa mwiatweba. Muno, atweba kechi tujipo na mipaka ya mushobo ne. Kisemi kyakwa Lesa kechi kikalapo na mipaka ya mushobo ne. Nangwa twi bachila, bachilulukaka, bafita, nangwa kibobo, kechi oene mambo ne, kitoka. Mumusango yense ye kijimo, atweba twi balongo ne banyenga mwi Kilishitu. Kabiji nanchi atweba—atweba twamutemwa. Kabiji kechi tukamumonapo jibiji ne, mu tabbanako. Ngaa Amiwa kabula kumumona byepi, Nyenga Bell, aa abaya, akatampe, mawi achikama “amena” kwine kokwa mu koono. Kabiji pakumutwala kwiulu ku muzhi, wafwaijilwe kwamba pe Nkambo Yesu.

¹⁰ Kabiji umvwe Ne kikwatakanya bulongo, kechi na yukile ne poso bimye bicheche byapita, bino Nalanguluka mba kijilo kyanji kikekelatu monka muno mu kipwilo. [Mulongo Neville waamba mba, “Kijitu bulongo.”—Waku.] Akye Kibiji kibena kwiya pa [“Wanu koloko.”] wanu koloko. Kabiji Naketekela mba obewa ne Amiwa yetu tukatangijila [“Kijitu bulongo.”] mu mpwijilo yakikyeye kijilo.

¹¹ Bino, monka mu kipwilo, twabujilwa umo lukeelo luno, namambo akupana munema ku Nyengayetu Bell, twayai twimane pa kimye kicheche, byo tubena kukunyika mitwe yetu.

¹² Lesa wa bumi, Aye upana ne kusenda bumi, byonka byaambile Yoba wakala, “Aye Nkambo upana kabiji aye Nkambo wasenda; jitotwe Jizhina ja Nkambo.” Myaka imo yapita, Anweba watumine Nyenga Bell mukachi ketu, kwikala mulunda umo ngikazhi ne atweba, wa mukisaka kya Lesa. Kabiji twimusachila Anweba pa lutundaiko lonse loajinga nalo mukachi ketu, nga byo atemenwe kwimba ne kupana lushimuno, kabiji wayuzhiwanga bingi na Mupashi kufika ne pakipimo kya kubijika ne kujila. Kabiji kechi wajinga na buvu bwa Mamboawama a Yesu Kilishitu ne, mambo, kwi aye, Ajinga Bulume bwakwa Lesa bwa lupulukilo. Pakumona myaka yanji yapwa, kabiji kimye kiiya kyakuuba mba twafwainwa kukumbula atweba bonse. Kabiji Anweba mwamusenda kufuma kwi atweba, lukeelo luno, amba ekale mu Kyeenyi Kyenu. Mambo, ke kyakine kyakuuba mba, umvwe twafuma pano, twikala mu Kyeenyi kya Lesa.

¹³ Anweba Lesa, twi musachila Anweba pa byonse. Twalomba amba Anweba musa kupesha balume banji, mulunda nami, James; mwananji wamulume, banabanji babakazhi, bonse bo. Twaumvwa amba mwananji wamulume ubena kwiya nandeke kufuma ku Germany, kufuma mu jibumba ja mazhita, kwiya ku muzhi, mukupana mushingi wapelako wafwainwa kupewa, panopantanda, ku bainanji baya. Nga muchima wayewa mwanamulume wakyanyike byo abena kulukuta lukeelo luno. Namulombelela, Nkambo. Lesa, mupeshai. Peshai Jimmy, kabiji

nga aye...Mwamumona byo abena kwingila kokwa, kabiji mu bimye byakukoka, pakuuba mba amwene kisemi kyanji. Nalomba mba akye kisemi kikatampe kechi kikabenamo ne, pakuuba mba ndoonda ya kisemi kechi ikabenemo muyoya Ntanda kubushiya ne.

¹⁴ Lekai atweba, Nkambo, tunyingishe byakondo ne mukwato, kikale kyakosako, kabiji ne kuya kukondo pano, kulwa naumo wabujila kukila byo twajinga mulungu wapita. Twalomba amba Anweba musa kwitulama kabiji ne kwitukosesha, ne kwitukwasha byo tubena kutwajijila, kabiji juba jimo lekai tukapwile pamo ne jikwabo kulubaji lukwabo. Mambo twaipuzha bino Mujizhina ja Yesu. Amena.

¹⁵ Pano lekai mweo wa nyenga yetu waaya akokoloke mu mutende. Amiwa nakonsha kwamba mba kyanji—kyanji kijilo kikasapwilwa muno Pamulungu, nangwa Pakibiji, kabiji twafwainwa...Uji yense watambulwilwa kwiya wakonsha kwiya. Naketekela mba Mulongo Neville kuno uji nalunengezho, kabiji anweba mwajinga nalo. Pano, leelo, Amiwa naubatu...

¹⁶ Monai, kechi kuji byavula ne. Inge kwakonsha kwikala kipona kuntu kumo kiletwe kwi Mulongo ne Nyenga Slaughter kunyuma kokwa. Natambwile foni wenu, Nyenga Slaughter, kabiji ne kulombelela wenu...mukwabo Nyenga Slaughter, Nyenga Jean Slaughter na kikola kya mashika akalulu, lukuzha. Aye kine uji nalyo mu musango watama bingi, pakuuba tubena kuketekelatu Lesa amba usa kwikalatu bulongo.

¹⁷ Pano twakeba kutanga Binembelo bimo. Kabiji Amiwa nakebatu kufunjisha lukeelo luno, kasa ntekanya, mambo kufuma po Nabwelela nkonaile, ku Arizona, kyawama, kikolomeno kyami kyakatazhiwako.

¹⁸ Kabiji bino, Pamulungu pabena kwiya, kechi mwakonsha kulubakone, kabiji Nalanguluka mba Billy wapopa kala bya—bya kubulang'ana. Kabiji ikekala ke mpwijilo lalepa, byo twaketekela, nanchi mwaiya bukiji bukiji. Tubena kukeba kutapa, ponka nobe pa naini-sate, nangwa Natazha mukuuba mba, teni koloko. Kabiji kapepo, vulukai, pepi nobe wanu nangwa wanu...kapepo, nangwa twelufu-sate, wanu koloko, nobe byonkabyo, asatu nangwa ma awala foolo, nangwa kukilapo, Nakonsha kutemwa kusenda, kabiji kusendatu Binembelo. Mukalete pezulu wenu ne kipepala, kabiji ne kwibitachikatu bulongo. Inge paji jipuzho jonse, anweba mwaipuzha—mwikipuzha, mwamona, kabiji kapepo twakonsha kwikilondolola, kuuba byo twakonsha kuuba amba twimukwashe.

¹⁹ Pano twayai tutange Binembelo bimo, patanshi, pano. Njina patu pasatu mu Baibolo, po Nakeba kutanga. Kabiji kitanshi kyabyo, inge mwakonsha kutemwa kwi kinemba, kabiji umvwe muji na pezulu, Nakeba kutazha, lukeelo luno, ku bibaba

byavula abyo byo Nakonsha... nangwa Binembelo byavula, byonkabyo, byo Nakonsha kutemwa kutazhako. Kitanshi kisa kwikala ke Petelo Mutanshi 5:8-10, Efisesa 6:10-17, kabiji ne Danyela 12:1-14. Pano, mu kutanga, kasa twatekanyatu.

²⁰ Kabiji muntu yense inge kulondela waikala. Nanchi, bachechetu bakimana kunyuma kabiji ne mumbaji. Bino tusa kweseka kupwisha bukiji bukiji ne kwi mulupula, apo po tusa kulombelela bakolwa.

²¹ Njina inetu wachepa mubiji walala kuno lukeelo, ao wakolwa bingi. Naumvwa mba wajinga wakolwa bingi, ja keesha japita. Kabiji Amiwa—Amiwa na kukebangatu aye omvwe, lukeelo luno, patanshi, Amiwa kasa kyangye ku mulombelela. Kabiji Nayuka musango ye ajimo awe inetu wachepa mubiji. Kabiji wakolwa bingi, bino tuji na Taata Wamwiulu wabaya bingi Ao wakila kushinda misongo yonse. Kabiji Amiwa njina ka—kacheche...

²² Amiwa naipwizhe Mrs. Woods inge wakonsha kutanga, pakuuba aye—aye wajinga wakwibwelamo pa—pa kuuba mba obe kyokyo. Sawakya wanembwa, apo dokotala wamichi po a kumya bingi. Kimye, aye po ajinga kajimbulushi pa lubuko lwa Bulesa kabiji kyakuuba mba kechi wakonsha kuswisha ne muntu kwambapo mu ofweshi wanji ne; ne manase wanji, naji pamo. Nanchi, kyamwekele kwikala nobe, wajinga na mulwazi wajinga nalukatazho lwa kaasa, kaasa wabaya bingi. Aye kechi wakebelengapo kintu kimo kyakuba nakyo ne, nanchi wamutumine ku kiliniki kikwabo. Abo kechi bajingapo na kintu kimo kyakuba nakyo ne, nanchi bamubwezhezhe konka. Nanchi abo... Oo, kajinga pa kyaji, kabiji kyajinga musango watama bingi. Kabiji kikoba kyonse bekijiile. Kabiji kaasa, kaile bingi mujibele, kufika ne kumbavu. Naketekela mba mwakwatakanya Mo nekitazha.

²³ Bajinga nadokotala mulunda wa kamubiji kacheche kufuma ku Norway waikala netu lukeelo luno.

²⁴ Kabiji aye watolele byonse byanji bing'amba ng'amba, mambo aye waambile mba nayuka kuuba mba—mba aye wakebelenga kutumbula ne kufumya jibele. Kabiji wajinga mwingilo wa mashi bingi. Kabiji—kabiji aye watolele byonse byanji byalogwa, bintu byonse. Manase wanengezho inetu ne kumuleta mu kibamba kyakutumbwilamo, kabiji pano wabwelele na kusenda bingijisho... byafwainwa kwingijishiwa na dokotala ne nkwasho wanji, pakuuba mba jibele bejifumyepo. Kabiji nanchi bajinga na mataulo ne bintu kasa byaikalatu pe aye. Kabiji nanchi batatwile...

²⁵ Kimye kyo atatwile kuuba mba aluluke, mulume wanji wakebele kuyuka mba kana kyakonsheka kwikala ku mpelo ya kibamba na kulomba. Aye wajinga musapwishi waku holiness. Kabiji waikale byobya ku lubaji kwapelela mwanya, kasa abena

kulomba. Mambo, aye dokotala kechi wikyumwine bulongo kyokyo ne, mwayukatu, aye kwikala monkamwa. Bino kikulutu kechi ubena kutalapo ne, kabiji kechi kyakonsha kumukatazha ne, kika, “Naketekela mba kyajingatu bulongo; pakuuba mba—pakuuba mba kechi wakonsha kupungila ne.”

²⁶ Nnachi kimye kyo aikele, na kulomba, mwaishile kyeya mu kibamba. Kabiji dokotala waalulukile mba ngyenga. . . na byombesha byanji, na kutatula kufumya jibele. Aye wasolwele bivunda na bivunda. Kechi pajingapo nangwa mukovu pa jibele ne; nangwatu mukovu ne. Aye waambile mba, “Bushe—bushe kye. . . Bushe kyenda nyi?” Kabiji watatwile. . . Kabiji ne manase namupele lushimuno. Bonse babiji balupukilemo kabiji baikala ke bapetekosito, bayulwamo na Mupashi Wazhila, na kwingijila Nkambo. Nangwatu mukovu ne!

²⁷ Aye Dokotala Holbrook wapaine lushimuno, aye mwine, waambile mba, “Mineti umotu kasa tukyangye kufikapo ne, apa—apa pajinga mwanamukazhi kasa alala, kabiji manase, kabiji kaasa mukatampe wabaya wafumapo pa jibele janji. Kabiji minetitu umo palutwe, kechi pajingapo ne mukovu apa po kyafuma ne.” Awa ke umo wa madokotala bamichi bawama bingi muno na America. Aye waambile mba nashinijilwe ponkapotu. Kabiji aye, nangwa byonkabyo, wajinga dikoni mu kipwilo. Mwamona?

²⁸ Monai, bantu balanguluka mba kipwilo ke kintu kyakuyakotu, kabiji kiji, “Oo, muyako nakufunda byakwila wawama, nangwa kintu kimo kyayeo musango.” Abyo kechi ibyo ne, mulunda. Ine. Lesa ye Lesa. Aye ujitu mukatampe leelo byonka byo Ajinga, byo ajinga kala. Aye kimye kyonse ukekalatu musango umo. Kabiji Aye ye. . . Atweba twamutemwatu Aye.

²⁹ Pano, twasaka kutanga kufuma mu Peteleo Mutanshi, kyapitala kyabu 5, veleeshi wabu 8 ne 10, yakutatwilapotu.

Tekanyai, . . . ne kukenkenta; mambo mulwanyi wenu diabola, . . . nobe bonkwe wimba, upitang’ana, na kukeba ye konsha kuja:

Aye mwimenai kasa mukosa mu. . . lwitabilo lwenu, byo mwayuka mba bya lumanamo bimotu bibena kumweka ne mu balongo benu baji panopantanda ponse.

Pakuuba aye Lesa walusa lonse, yenkaye wi twichile mu lukumo lwanji lwa peenape mwi Yesu Kilishitu, pa kupwa anweba kumanama kwa kakimye kicheche, aye mwine ukemulumbulula, ne kwimwikajika, ne bulume, kabiji ne kwimukosessa.

³⁰ Ngaye Lesa byo akonsha kutakaikwa! Pano mu Buuku wa Efisesa. Twakonsha kuzhikula papo mu Buuku wa Efisesa, kyapitala kyabu 6, kabiji twakonsha kutanga veleeshi wabu 10 kufika ne ku 17, Amiwa na nshilapo.

Kabiji pano kyapelako, balongo bami, ikalai bakosa mwi Nkambo, kabiji ne mu bulume bwa mungovu yanji.

Vwalai byonse bya nkondo bya Lesa, pakuuba mba mukonshe kwimana saka mwakosa ku bya bujimuku bya diabola.

Mambo kulwa kwetu kechi kwakulwa na ba mibiji ya mashi ne, poso na bakatampe bene, ne balusa, ne bamfumu ba ino mfishi ya pano panshi—ya pano panshi, ne bapashi babipa ba mwiulu.

Oakao mambo shikulai anweba bene bya nkondo byonse bya Lesa, pakuuba mba mwikale bakonsha kwimana mu juba jibi, . . .ne pakupwa kuba byonse, saka mwaimana ponka.

Byonkabyo imanai, kasa mwanyingisha mukwato wa bukine mu bifuka byenu, . . .ne kuwala kyela kya pa kyaji kya bololoke;

ne kumwala ku mauulu enu makwabilo a kutengelela jimo kwa mamboawama a mutende;

Kabiji ne pa byonse bintu, . . .jikebo ja lwitabilo, ja kuleyelamo miketo ya mujilo yonse ya kwa aye mubi.

Kabiji mutole kipompo kya lupulukilo, ne mpoko ya kwa aye Mupashi, o mambo a Lesa:

³¹ Pano twayai mu Buuku wa kwa Danyela, Nakonsha kutemwa kutanga ne bikwabo. Pano, Danyela kyapitala kyabu 12. Nasaka kutatula kutanga pa bu 1, kabiji ne kutanga kibaba kya—kyalepa kya kikye, maveleeshi fotiini.

Mu kyonkakya kimye. . .Mikela ukemana, yekaye mukulumpe wa bamalaika ulama balongo bobo: kabiji kukekala. . .kimye kya malwa, abujile kumwekapo kala kufuma ku kimye kyatatwile kwikalako mikoka ya bantu kufika ne ku kyokya kimye ne: kabiji pa kyokya kimye bantu bobo bakapokololwa, yense muntu ukatanwa saka anwembwa mu buuku.

Kabiji ne bavula ba muboba balala mu mushiji bakansanguka, ne bamo ku bumi bwa myaka ne myaka, . . .bakwabo ku bumvu kabiji myaka ne myaka na kusulwa.

Ponkapo bamaana bakasama nobe kusama kwa jiulu; ne boba balulwila bakwabo—balulwila bakwabo bavula ku bololoke bakasama nobe kusama kwa tubangabanga twa mwiulu myaka ne myaka.

Pakuuba obe, Obewa Danyela, ushinke bino—ushinke bino. . .buuku, kufika ne ku kimye kya ku mpelo: bavula bakapitang'ananga kuku ne kuku, kabiji maana akayanga na kunanuka.

Ponkapo *Amiwa Danyela byo natajile, kabiji, talai, na mwene bakwabo babiji baimana, . . . umo ku kitulu kya ku bushiya buno bwa mukola, ne mukwabo ku . . . kitulu kya ku bushiya bwa mukola.*

Kabiji umo waambile ku muntu wavwajile kivwalo kya linenyi, wajinga peulu ya meema a mu mukola amba, Kwashala kimye kyalepa byepi kufika ku mpelo ya byo bino . . . bya kukumya?

Kabiji Amiwa naumvwine awa muntu wavwala kivwalo kya linenyi, wajinga peulu ya meema a mu mukola, kabiji aye suntwile kuboko kwanji kwa kilujo ne kuboko kwanji kwa kipiko mwiulu, ne kuchipa mwi yewa uji na bumi bwa myaka ne myaka amba kukekala kimye kimo, ne kimye, ne kimye kya afu; kabiji aye byo akapwisha konauna bulume bwa bantu bazhila, . . . bino bintu po po bikapwila.

³² Naketekela mba *Amiwa sakulekela ponkapo. Nakeba kusenda mutwe, inge kyakonsha kutelwa mba mutwe kufuma ponkapo, kufuma ku kyokyo, kuleta ino milanguluko ya: Nkondo Ikatampe Yabulwa Kulwiwapo Kala.* Akyo kyo Mbena kukeba kwingijisha ke mutwe.

³³ Pano, byo Naishile kwikala na kikye pakuuba mba kikale mutwe lukeelo luno: Atweba po twabwelatu; jibumba ja matulasiti, pano pa kipwilo, ne amiwa mwine, twajinga ku Arizona. Kabiji twaile, kine, na kwikala na mpwijilo ku Phoenix, na Mulongo Sharrit, pa tabbanako wanj. Bino byo Naishile kuyuka mba aye—aye mulongo wajinga mu tauni, kasa abena kupwijila mutente, kyawama, nanchi Naumvwineko kifwe pacheche pakuuba mba twikale na mpwijilo. Nalangulukile mba kapepo *Amiwa nkekale nanji Pamulungu mabaanga, pakuuba mba kafwako nangwa umo wakonsha kukatazhiwa mu bipwilo byabo ne. Bino, natana kuuba mba, aye uji ne na mpwijilo Pamulungu mabaanga, ne apo. Kabiji Najinga na—na kijikila pacheche pakuuba mba twikale na mpwijilo.*

³⁴ Kabiji nanchi atweba balongo, mukifulo kya kuuba mba tutwajijiletu juba jonse, byo twajinga mu bubinda, twaile mu muzhi mukatampe, kuya kabiji ne kwinengezha, kabiji twaile ku mpwijilo ya Mulongo Allen. Mulongo A. A. Allen waikelenga na mpwijilo. Nanchi twaile ku mpwijilo, kabiji Mulongo Allen wasapwijile mbila ya bulume. Twajinga na—na kimye, kimye kyawama, na kuteleka ku Mulongo Allen, na kumvwa aba—aba bakwimba, ne bintu bikwabo, byo baimbilenga, ne kubijika, kabiji twajinga na mpwijilo yawama bingi.

³⁵ Kabiji pano twamwene, monse mu mukwakwa, kuboko kwa Nkambo. Konsetu ko twaile, aye Nkambo Yesu witukumenyenga. Kabiji kujipo kintu kimo na mambo akwikala pa bunke bobo, amwa mu biselebwa. Pajipo kintu kimo pa

kyokyo, kyakuuba mba umvwe ujitu bunke muyewa musango, pajipo kintu kimo kikukoka. Kuuba mba, Naketekela, oene mambo amo Amiwa kyo Natemenwa aa mamupuzha-akungi. Umfuma ku bulume bwa mulwany, pakatampe nobe byotuji kuno.

³⁶ Diabola ujitu pepi pamo nobe wabula bulume kanatu waikala na kintu kimo kyakwingijilamo. Aye uji . . . Mwavuluka aba bademona bapangilwe mu Mazhita? Bajinga na . . . bakeba kuuba byavula byatama, nanchi bakebele kuya mu bangulu. Nanchi, badiabola bafwainwa kwikala na kintu kimo kyakwingijilamo.

³⁷ Kabiji abyo Lesa byo oba, naye. Aye wafwainwa kwikala ne atweba. Aye waketekela mwi atweba, kuuba mba engijilemo.

³⁸ Kabiji bavula baishile mu kimye kyotwajinga pa lwendo, na biloto. Kabiji aye Nkambo Yesu kechi wakakelwe kupana kilumbululo kyaitabilwa ne, kabiji kyajingatu ponka, monkatu mo kyaikela.

³⁹ Kabiji nanchi Aye wajinga wawama kwi atweba, kwitutangijila ku banyama ne kwitubula kobaji. Kabiji, mwayukatu, pa kwikalatu muyewa musango, ke kintu kyawama. Kwikala kasa mwazhokoloka, bufuku, ku mujilo, kwalepa na bantu, avula ma mailoshi ne ma mailoshi ne ma mailoshi, ne kumona alwa—alwa lubebe lwa mujilo monka mu mabwe amikuko. Kabiji, oo, kyajinga kintu kyawama bingi!

⁴⁰ Umo mulongo kokwa, ao waikela na lukatazho na bakazhi banji, aba bajinga . . . Myaka yapita, mwanamukazhi wasutwile mutwe wanji mu mpwijilo, ako Amiwa ko najinga na mpwijilo. Kabiji Nebepwizhe mba bakunyike mitwe yabo; pajinga mupashi watama ao wabujilenga kufuma mu—mu mwanamukazhi, ku pulatifomu. Kabiji awa inetu, kechi wajinga na munema ne, wasutwile mutwe wanji nangwa byonkabyo. Kabiji mupashi wafumine mu mwanamukazhi, ku pulatifomu, ne kuya mwi aye. Kabiji apo papita ke myaka nobe fotiini, kabiji awa inetu wajinga mulukatazho lwa baya bingi; pakatapetu, ne kulubakana kwa milanguluko, kufika ne ku kipimo kyakuuba bintu byalubakana. Nobe kyakumwenako, washile mulume wanji, wakasongolwa ku mwamulume mukwabo akwe kasa akiji mumasongola na mulume wanji; waambile mba kechi nayuka mba ne kyuba ne. Kabiji nanchi abo—abo ba esekele kumupimapima pa kikyee . . . Mwikitela mbaka akya, inge mwauba . . . Kavulamya? Akyo . . . Ami, monse mwatala joja jizhina. Naketekela mba abyobyoby, dokotala. Bino kechi kyajinga kyokyo ne. Kyajinga mupashi. Kabiji aye . . . Kabiji awa inetu wajinga mulundanami wawama. Pakuuba kufumatu kubobwa bufuku, kuya palutwe, aye wikyubijilemotu kya kupata ami. Mambo, mwakonsha kumona byo kyajinga.

41 Pakuuba nanchi mulume wanji waishile, kabiji wafukamine mu kibamba na kulomba, ponkapo Mupashi Wazhila waishile. Akyo kyajinga ikyo. Apo Aye wamwekele ku mulume wanji abwa bufuku, mu kiloto. Aye wabwelele na kiloto, aye walangulukile mba kyajinga bisela. Kwiya kutana mba, yewajingatu mukumbu ku lubuko lwa mukazhanji. Mujishinda mo e kyubijile aye Mupashi Wazhila!

42 Pakuya ku Tucson, na Mulongo Norman kabiji ne abo, kabiji konkakwa Nkambo watatwile kwingila jibiji na bikatampe, bintu byabulume kabiji ne kusolola bintu.

43 Bufuku bumo, akyo kyandetejile ku ino mpelo ya milanguluko, Amiwa naimene na Mulongo Wood ne Mulongo Sothmann. Kabiji twajinga...Kyajinga kimye kya teni koloko bufuku, kabiji Natajilenga mwiulu, ponkapotu moyo mukatampe wakwachile. Kabiji Naambile mba, "Pano talai! Aya yonse ikatampe, zhita ya mwiulu!" Kabiji Naambile mba, "Bintu byonse bijitu mulumvwang'ano."

44 Kabiji Mulongo Wood waambile mba, "Byo atajilenga pa tubangabanga twaikele pamo pepi pepi, amba, kitulengejile kumweka nobe kyeya."

45 Naambile mba, "Bino, mwayukatu, Mulongo Wood, mwaila saayasi, amwa monka mu Kitajilo, Kitajilo Kicheche, Kitajilo kya Kikatampe, atwa tubangabanga tumweka nobe twaikala kechi kupitaila pa maichesi abiji kuya pa kakwabo ne; kabiji tuji palepa bingi kamo kufuma pa kakwabo kukila byo twaikala atweba kufuma ko tuji. Kabiji umvwe twatatula kwiya panopantanda, kyakonsha kusenda, masauzande ama mailoshi pa awala umo, kyakonsha kusenda myaka ya ma aduleendi ne ma aduleendi pa kuuba mba tufike pantanda." Kabiji Naambile mba, "Mu byonse bye bikatampe, ndonda ikatampe kuno, kabiji nangwa byonkabyo betubuula mba batala mu magalashi, bakonsha kumona aduleendi kabiji myaka tweti milyoni ya kimye kyakyeya, monkamwa mukachi; kabiji momwa muji bang'ondo ne tubangabanga. Kabiji—kabiji, nangwa byonkabyo, Lesa walengele byonse bya. Kabiji Aye waikala mukachi kabyo."

46 Kabiji Naambile mba, "Kuntu kumo momwa, Natongwele kwi ami, mu kimye kimo mu kyamba kya katajilo, zodiaki; kutatula na Kisungu, kwiya kupita mu Nkulo ya Kaasa, kabiji nekuya panshi poso wapelako ke bonkwe, Leo aye bonkwe. Kwiya kutanshi kwa Kilishitu, kupichila mu kisungu; kwiya kwa bubiji, na Bonkwe wa kisaka kya Yunda." Kabiji Naambile mba, "Amiwa naeseka na maana ami onse mba mone zodiaki, kabiji Amiwa kechi nekimona ne. Bino, nangwa byonkabyo, kiji konka. Aba bafunjishiwa, bayuka mba kiji konka. Yoba wikimwene. Bantu bekimonanga. Kyajinga Baibolo, pa juba jimo. Pakuuba monse mu kuvula kwa mamilyoni ne mabilyoni a—a kyeya kya myaka, Lesa waikala mukachi ka byonse bye, kabiji Aye kasa

atala panshi. Paulo uji monkamwa. Bamaama baji monkamwa, kuntu kumo, kasa babena kutala panshi.”

47 Kabiji Nalangulukile pa ndonda ya mazhita a mwiulu, kechi pajipo nangwa umo wafuma mundonda ne. Yense ulama kimye kyanji, bulongotu. Lesa zhita yanji ikatampe! Nalangulukilenga pa bashilikale; nge kyakuba mba awa ng’ondo wakonsha kufuma mu ndonda, ntanda yakonsha kumvwetwa jibiji na meema, mu maminetitu acheche. Ntanda yakonsha kwikalatu nobe mukimye Lesa kyo akebele kwi yingijisha, pa kuuba mba ekale ne atweba kasa tuji ponka. “Yajinga yavulang’ana, kabiji yatuntu, kabiji mfishi, ne meema a kumbene konse konse mwapela ntanda.” Kabiji umvwe awa ng’ondo wakonsha kwenda, kyakonsha kumweka kintu kimo ne jikwabo. Inge ng’ondo wfumapo pacheche mujishinda ja ntanda, manyaki atatula kwiya. Inge waya panshi, kulondelatu manyaki. Ke zhita ikatampe yakwa Lesa. Kabiji byo Nalangulukilenga pa bibye. . . byo iji zhita ikatampe yakwa Lesa ijiko. . .

48 Pano, twaile na kulala. Kabiji ponkapo Natatwile kulanguluka mba pa byonse bye kafwako nangwa kimo kyafuma mu ndonda yabyo ne. Byonse biji mu bifulo byabo. Kabiji umvwe kwaikala kwenda, kuntu kumo, mwi abyo, nishi paji ene mambo, kabiji kikaleta lukatazho ku ntanda. Atweba tumonatu bifumamo mukikye, mambo bimo bya mwiabyo byaunda kuya mu bifulo byabo bikwabo. Ke kintu kingila. Kikatazhatu bintu byonse.

49 Kabiji Nalangulukile mba, nanchi, inge aya zhita ikatampe ya mwiulu, nobe byobya, byafwainwa kulama bifulo byabyo, pakuuba mba byonse bikale mu ndonda, panonga kivundang’anya kya zhita ya pantanda? Byepi, inge umo wafuma mundonda, byo kitayaula bintu byonse kufuma mundonda yabyo! Lunengezho lonse lwakwa Lesa lwikala lwalubakana inge membala umo wafuma mu ndonda. Twafwainwa kimye kyonse kwesekesha kulama ndonda ya Mupashi.

50 Kabiji Nafwaina, kwi Lesa, lukeelo luno, amba twafwainwa kuleta kikye ku mpwijilo yine ya lubuko, kuuba mba twafwainwa kulama lulwe lubaji. . . jibumba jo twabungizha mushi ya mutenge lukeelo luno, mu lumvwang’ano lumo, amba Mupashi Wazhila wakonsha kubika yense membela wa Mubiji, ao uji muno lukeelo luno, mu lumvwang’ano, lwakuuba mba kwakonsha kwikala lubuko lwa mubiji ne mweo, inge twakonsha kulamatu bifulo byetu.

51 Pano, monka mo Najikwambila pa kutatula, awe inetu uji na kaasa ao Dokotala Holbrook ye asendele. . . wailenga na kwikitumbulapo. Pano, aye Lesa walengejile kyongo kyaumvwanikilenga kwiya mukyokya kiliniki, kabiji wafumishopo kaasa kwakubula kushapo mukovu, kechi mwayuka mba awa Lesa yeka umo uji muno nyi? Kabiji kintutu

kimo Aye kyo abena kupembelela, ke kyakuuba mba Yanji—Yanji zhita ikale mubifulo byabo, nobe tubangabanga, tuji mu bifulo.

⁵² Pano, mwayuka mba, twaikala na mankondo ne mankondo, ne makuwa amankondo nyi? Kabiji inge ntanda yakonsha kwimana, tukekala na mankondo akwabo avula. Bino mwalanguluka mba kujitu bulume bubiji mu kyaalo kyonse? Byonse bya lupusano pakachi ka byalo, ne mapusano pakachi ka muntu umo ne mukwabo, kabiji ne bintu byonse, byonse byaimenatu pa bubwe bulume bubiji. Kujitu bulume bubiji, kabiji kujitu bufumu bubiji; bulume bubiji, ne bufumu bubiji. Byonse byashala, tubintu tucheche, twanungakana na lubaji lumo lwa bubwe bulume. Kabiji bonse bo bulume ke bulume bwakwa Lesa kabiji ne bulume bwakwa Satana. Abyo byo. . .Yonse nkondo, kulubakanya konse, bintu byonse biya, bitangijilwa na bulume bwakwa Lesa nangwa bwa Satana, mambo bobonka bulume bubiji bujiko. Kabiji abo ke bulume bwa bumi ne bulume bwa lufu. Pano, abo bobonka bulume bubiji.

⁵³ Kabiji Satana ubatu. . .Bwanji bulume, bo ajinabo, ke bulume bwatwalwa mungi bwakwa Lesa. Kechi ke bulume bwine ne. Ke kutwalwa mungi kwa bulume bwa Lesa, byonsetu byo aji nabyo Satana. Lufu ke bumi bwatwalwa mungi. Bubela ke bukine bwalondololwa mungi. Mwamona? Bukende ke—ke kyubilo kyatwalwa mungi, ke kyubilo kyaoloka kyatwalwa mungi. Mwamona? Bintu byonse byo aji nabyo Satana ke bintu bimo abyo byatwalwa mungi, pakuuba ke bulume.

⁵⁴ Kabiji atweba, leelo, twaikala muno, bumo nangwa bulume bukwabo busa kwitutangijila. Nanchi twayai tukane aye mubi. Twayai tutole bifulo byetu nobe tubangabanga twa meulu.

⁵⁵ Nobo byaamba Baibolo, “Totubangabanga tupitang’ana,” monka mu Buuku wa Yuda, “kasa oba kapofu monka mu buvu bwao.” Kabiji kechi tubena kukeba kwikala tubangabanga tupitang’ana ne; nakumya kana *kikye* kiji bulongo, na kumya kana *kyokya* kiji bulongo, na kumya kana *kika* mweka, na kumya inge. . .kyakonsha kwikala byepi. Kupitang’ana ne. Ikalai nobe totwa tubangabanga twa mwiulu, nobe mushilikale mwine mwine uji pa kifulo kya mwingilo wanji. Imana ponkapa, kasa waketekela! Bumi ne lufu.

⁵⁶ Bino, zhita, inge kine zhita, kyaalo kyakeba kwinegezha kuya nakulwa na kyaalo kikwabo, patanshi kyafwainwa kwikala panshi ne kupesapesa biji bulongo ne byatama, kabiji kana bakonsha kuya nakulwa na kyaalo kikwabo nangwa ine. Yesu wafunjishe kyokyo. Kabiji umvwe bantu bauba kyokyo, inge byaalo byakonsha—byakonsha kwikala panshi, ne kwimana kabiji ne kulanguluka pa byo byo bintu, mbaji onse ibiji, kechi twakonsha kwikala nankondo jibiji ne.

⁵⁷ Pano, twatana kuuba mba, inge muntu wabula kuba kyokyo, inge batangi ba bashilikale ba kyaalo babula kwikala panshi, patanshi, ne kupima kabiji ne kumona kana baji bulongo, ne nkebelo yabo ne kyo baimika kana kiji bulongo, kabiji kana baji na ngovu yafikilamo ne bulume bwakushinda zhita ikwabo, apo ipo pobekala na luketekelo lwakuya.

⁵⁸ Apo ipo Mukulumpe Custer po alengele kilubo kyanji kya kuleta lufu. Mukulumpe Custer, nobe byo Nayuka, wakambizhiwe ku kafulumende, amba kechi wakonsha kuya ku ntanda ya Sioux ne, mambo kyajinga kimye kya bupopweshi kyabo. Kyajinga kimye kya bupopweshi. Bajinga na kijilo. Pakuuba Custer wapendelwe, kabiji walangulukile mba wakonsha kwikyuba nangwa byonkabyo. Aye wakonsheshe kwabuka, nangwa yajinga mikambizho nangwa kechi mikambizho ne. Kabiji nanchi kine balozele bantu babula mambo, bebalozele. Nakatekela yafikijilepo bamo. Bajinga ba masikauti, balupukile, bakebelenga kajo, ka kujisha babo— bantu babo kimye kyo bajinga mu bupopweshi. Kabiji Custer, pakwabuka, wibamwene, kabiji walangulukile mba babena kukeba lubaji lwabo, kabiji nanchi balozele mu babo masikauti. Kabiji abo masikauti banyemene, kubwela. Baubile byepi? Benengezhe abo bene na byanso, kabiji ke beye ne kwiya. Kabiji ayo yo yajinga mpelo ya Mukulumpe Custer, mambo kechi waikela panshi ne kulanguluka ne, patanshi.

⁵⁹ Aye kechi wajingapo namwingilo kokwa ne. Aye kechi wajinga na sambu yakwikala kokwa ne. Aye wapangile Maindia kufuma ku Kitulu kya Kumusela, kuyatu kufika ne ku Muzhika, nangwa byonkabyo. Kabiji bajinga na kipang'ano, bino aye waonawine kipang'ano. Kabiji aye byo aonawine kipang'ano, nanchi washijilwe mu nkondo.

⁶⁰ Kabiji nanchi bashilikale, patanshi, mu kwinengezha ku nkondo, patanshi kwafwainwa kwikala basalululwa, bashilikale bamo. Bafwainwa kumvwala bya nkondo. Bafwainwa kufunjishiwa kulwa.

⁶¹ Kabiji Naketekela mba nkondo ikatampe ya lwiwapo kala, pano yanengezhiwa kuya mu kulwiwa. Naketekela mba Lesa uba salenga bashilikale Banji. Naketekela mba Aye ubebamvwikenga, ne kwibafunjisha. Kabiji lutwe lwa nkondo pano lwatachikwa, kwinengezha kuuba mba itatule.

⁶² Aye ikatampe, nkondo itanshi ayo yabulwa kulwiwapo, yatatwijilwe Mwiulu, kimye Mikela ne Bamalaika Banji balwilenga ne Lusifa ne bamalaika banji. Yatatwile patanshi, nkondo itanshi yajinga Mwiulu. Nanchi, bundengamambo kechi bwatatwijile pantanda ne, bwatatwijile Mwiulu.

⁶³ Kabiji pano yatailwe panshi kufuma Mwiulu, kwibapanga kufuma Mwiulu, kwiya pantanda, kabiji yafikijile pa bantu. Nanchi nkondo, kufuma kuba malaika, yaaluka ke mankondo

a bantu. Kabiji Satana waishile nakonauna bilengwa byakwa Lesa, abyo Lesa byo alengele kwikala ke byanji Ayemwine. Aye waji, Satana, waishile na konauna bibye. Abye byo byajinga nkebelo yanji, yajinga ya kwibyoonauna. Apo po patatwijiile ne nkondo pano pantanda, kabiji yatatwijiile mwi atweba, kabiji yatwajijilatu kufuma pakyokya kimye.

⁶⁴ Pano, nkondo iji yonse kasa ikyangye kutachikwa, abo bafwainwa kusala pa kifulo kya kusambakenapo, nangwa mpuzha apo nkondo po yafwainwa kulwilwa, mpuzha yasalwa.

⁶⁵ Mu Nkondo Itanshi ya Kyaalo kyonse, yabikilwe, pantu-pabula-bantu kabiji ne mampuzha po balwijilenga. Kabiji pafwainwa kwikala kifulo kyasalululwa.

⁶⁶ Kijitu pamo nobe Isalela byo aile ku nkondo na bena Filisitiya, kwajinga ka—ka—katumba kumbaji yonse ibiji apo po bakumejile. Kabiji ako iko Golyata ko alupukile ne kwita mazhita abena Isalela. Akwa iko Davida ko amukumenye, mu kipachiko, byo apichile ku kipabi kicheche akyo kyaya pakachi ka tutumba tubiji, aye ko atolele mabwe.

⁶⁷ Kwajinga mpuzha yasalululwa. Kabiji monkamwe, mwajinga pa—pantu pa itabilwa, kechi-pantu-pa bantu ne, kabiji balwila *ponka* pa iye mpuzha. Abo kechi bobatu, um walwila *papo*, kabiji mukwabo *papo*, kabiji umo wanyemena *kukwe*. Kuji lutwe lwa nkondo apo po bakumena ne kweseka bulume bwabo, ako kila zhita poyeseka ngovu yabo na zhita ikwabo, kifulo kyaitabilwa kusambakenapo. Pano, kechi (umvwai) mupuse kikye ne.

⁶⁸ Kimye aye nkondo ikatampe byo yatatwile pantanda, kwajinga mpuzha yakusambakenapo yaitabilwa. Kwajinga mpuzha yasalululwa pa kutatwila nkondo, kabiji pakuuba mba nkondo itwajijile. Kabiji akya kifulo kyankondo kyatatwijiilwe mu milanguluko ya muntu. Amwa mo mutatwila nkondo. Milanguluko ya muntu yasalululwe kwikala mpuzha ya nkondo, apo po yatatwijiile, kabiji mambo akuba mba kufukula kubiwa kufuma mu milanguluko, mu mutwe. Pano, kechi yatatwijiilwe kufuma ku kabungwe kamo ne. Kechi bekitatwijiile kufuma ku king'ambang'amba kimo kyanengezhiwa ne. Kifulo kechi kyatatwijiile kokwa ne. Onkao mambo, aka kabungwe kechi kakonsha ne, kwingila mwingilo wakwa Lesa ne, mambo bifulo kyankondo, po mwfawainwa kusambakana mulwanyi obe, ke mukachi kamilanguluko. Mwfawainwa kufukula kusalulula. Kimufwainwa anweba.

⁶⁹ Nakeba awe songwalume mucheche papo, ao wakolwa bingi, ekale winengezha kuteleka ku kikye pano, pepi pepi bulongo.

⁷⁰ Bibese mwakwingijila bilengelwa mu milanguluko, mu mutwe. Amo imo Satana mo akusambekena, kabiji ne fukwilo, mambo Lesa walengele muntu muyewa musango.

⁷¹ Pano, Amiwa njina (inge mwajikumonanga po nanemba papo) mapu acheche alengwa. Najinga nao kuno kechi kimye kyabaya kyapitapo ne, pa . . . kyaingijishiwe pa bboni. Muntu walengwatu nobe jipeke ja wichi. Ke lukunwa. Kabiji muntu ke lukunwa. Ku mubiji, obewa wi lukunwa wa bashobe ne bainobe; kabiji bumi bufuma ku bashaji, kabiji kyubulwa kifuma ku bainaji. Nanchi, aba babiji, pamo, jike kabiji ne—ne mashi, byaiya pamo. Kabiji mu keshi ka mashi mo muji bumi. Kabiji monkamwa mokatatula, kukoma, kulenga awa—awa mwaana. Bino, lukunwa yense uji na kibabulwa pangye; mukachi muji meema; kabiji mukachi ka meema muji keshi ka bumi. Kyawama, abye jo jishinda jo tulengelwamo. Atweba twi mubiji, mweo, ne mupashi. Kyapangye, mubiji, kibabulwa; mukachi kakyokya, ke milanguluko ne bikwabotu, ke mweo; kabiji mukachi ka mweo, ke mupashi. Kabiji mupashi ulama byonse bikwabo.

⁷² Pano, inge mwakonsha kwikala panshi pa kufika ku muzhi, ne kushila bizhingu bisatu bicheche. Mukatana mba mubiji wapangye uji na masesi faivi o anungakanako, kabiji abyo ke kumona, kutopa, kumwanyika, bwema, kumvwa. Ao o masesi faivi atangijila mubiji wa muntu.

⁷³ Mukachi ka mubiji muji mweo, kabiji awa mweo utangijilwa na kutwelelamo, kapingu, kulabijila, kulanguluka, kabiji ne butemwe. Akyo kyo kintu kitangijila mweo.

⁷⁴ Pakuuba, mupashi, ujitu nasesi umo. Aye mupashi . . . Oo, twayai twikimone. Aye mupashi uji na sesi umo, kabiji awa sesi ke, nangwa utangijilwa, na lwitabilo nangwa luzhinauko. Abyo byokiji. Kabiji kujitu jishinda jimo jakuya konka, ke kuuba mba nsambu yakufukula. Anweba mwafwainwa kwitaba luzhinauko nangwa kwitaba lwitabilo, pa bino mwakonsha kukeba kwingilako na kimo. Onkao mambo, Satana watatwijile pene pakachi ka kishina, kulengela mupashi wa muntu kuzhinauka Kyambo kya Lesa. Lesa watatwijile pene pakachi ka kishina, kubikamo Kyambo Kyanji muyewa mupashi. Byobyo kiji. Akyo byo kyubiwa.

⁷⁵ Inge akye kipwilo, ponkapano kyakonsheka kubikwa pamo, kabiji kyanungakana pamo nakyokyo kyakubamba muntu yense wakonsha kwikala na bu umo, kwakubula ne luzhinauko nangwa pacheche kuntu kumo ne, kechi pakonsha kwikala nangwa umo wakoka pakachi kentu ne, mu mamineti akwabo faivi apalutwe. Kechi pakonsha kwikalapo muntu nangwa umo ubena kukeba Mupashi Wazhila kana bakonsha ku Mutambula, inge wakonsha kuuba kyokya kintu kimo kyaubiwa bulongo. Pano, apo ipo nkondo po itatwila, monka mu milanguluko yobe, kana wakonsha.

⁷⁶ Pano vulukai, kechi Saayasi wa Bwinakilishitu ne, pano, milanguluko pa bintu ne. Akyo kechi kiji. . . Milanguluko iswa Bumi, akyo kyo Kyambo kya Lesa, kabiji amwa mufuma Bumi.

Milangulukotu yobe kechi ikyuba ne. Kana, Kyambo kya Lesa, kyaletwa mundonda ya milanguluko yobe. Mwamona? Kechi ke milanguluko ne, nobe mwambila Saayasi wabena Kilishitu, milanguluko pa bintu. Ine. Akyo kechi ikyo ne.

⁷⁷ Bino, milanguluko yenu Yiikiswa. Yiikikwatakanya Kikye. Milanguluko yenu itangijilwa naka? Wenu mupashi. Kabiji mupashi wenu ukwatakanya Kyambo kya Lesa, kabiji akyo kyo kintu kiji na Bumi mwi Akyo. Kileta Bumi mwi obewa. Oo, mulongo! Umvwe akyo kyaubiwa, inge Bumi bwaiya mu joja jishinda, mwi obewa, Kyambo kya Lesa kimweshwa mwi obewa. “Inge mwaikala mwi Amiwa, kabiji ne Kyambo Kyami kyaikala mwi anweba, nanchi ipuzhai kyonse kyo musaka kabiji kikemubilwa anweba.”

⁷⁸ Pano akyo kyubaka? Kufuma pakachi ka muchima, ao ye mweo, kufuma momwa biya, na kupana ku jishinda jonse. Lukatazho lujipo ke luno, twaimana muno kasa tuji na luzhinauko lwavula bingi, na kweseka kuswa kijiko *kokwa*. Mwafwainwa kuswa kuleka kyokyo; kabiji ne kwiya mujoja jishinda na Kyambo kya Lesa kyakine, kabiji kyabwela kyalupukamo, akyo kine, ponkapotu. Kijitu ku kyokya kiji mukachi. Akyo kyo kintu kibalwa, ke mukachi.

Satana nyingijilo yanji ke kufumina mukachi.

⁷⁹ Pano, mwamba mba, “Amiwa kechi ngiba ne. Amiwa kechi toma ne. Amiwa kechi nguba bibye bintu ne.” Akyo kechi kijipo na kintu kimo kya kwingila nakyo ne.

⁸⁰ Monai, ke mukachi. Nangwa mwikaletu bawama byepi, byubilo byenu biwame byepi, mwikale ba bukishika byepi, abyo bintu byapewa mashingi. Bino Yesu waambile mba, “Inge muntu ne kusemwa jibiji ne.” Mwamona? Kwafwainwa kwikalapo kintu kimo kyamweka mukachi. Inge kuuba byobyo ne, ke kintu kyalengwa kyabikwapo-peulu, mambo mukachi ka muchima obe ubena kukeba kwikyuba nangwa byonkabyo. Kechi kyakonsha kwikala kyakulengwa ne. Kyafwainwa kwikala kyakine.

⁸¹ Kabiji kujitu jishinda jimo ajo jakonsha kwiya panshi, kabiji ke kupichila mujishinda ja muntu mwine kwikala wakwifukwila, kwiya mu mweo, kupichila mu milanguluko yobe. “Monka muntu moalangulukila mu muchima wanji, nanchi byo aji.” “Inge waamba kuyuwe mutumba, ‘Enda,’ kabiji wabula kuzhinauka mu muchima obe, ne kuketekela kuuba mba byo waamba bisa kufikizhiwa, wakonsha kwikala nakyo kyo waamba.” Mwi kyumvwa nyi? Abyo byo kiji. Mwamona? Amo momuji kifulo kya nkondo. Inge wakonsha kutatulako, patanshi.

⁸² Tulukusha bingi michima mukukeba bintu mba byubiwe. Twikala balukutu bingi michima kumubilapo kintu kimo Lesa. Awe inetu uji bingi...walukusha muchima, kechi

kyakuzhinauka ne, kulukusha muchima amba ekale na bumi. Aye ubena kukeba mba ngikale bulongo. Bakwabo baji muno, babena kukeba kwikala baji bulongo. Kabiji umvwe twaumvwa pa lolwa lukatazho, nobe ba dokotala, kusanguka kwa bafwa, bintu bikatampe abyo Lesa wetu byo auba, nanchi twikala babena kulukuta michima. Kabiji kine kintu byo kiji, atweba tukeba kwingijisha masesi, kutola kintu kimo muno, kiji nobe kapingu.

⁸³ Nanchi bantu bavula, bimye byavula, batwala mungi Kyambo. Kabiji namambo akikye kechi bangyuka bulongo, mambo akwita bantu ku kitapisho. Naambile mba, “Amiwa kechi natemwa bya kwita bantu ku kitapisho ne,” kechi kyalumbulula mba kechi wafwainwa kwita bantu ku kitapisho ne.

⁸⁴ Pakuuba muntu umu wasenda muntu umu pa kuboko, ne kwamba mba, “Oo, Mulongo Yoano, wayuka kine kintu nyi? Amiwa ne obewa twalamakana mungikelo kimye kyonse kye. Iya kuno ku kitapisho, ikala panshi.” Aye ubena kubaka? Nalanguluka mba inge najinga na pakunemba muno, Nakonsha kwimumweshwa byo abena kuba. Aye ubena kweseka kwingijila mu mweo wanji, pa butemwe. Abye kechi kingila ne. Ajo kechi jo jishind ne. Kinetu, kechi ijo ne.

⁸⁵ Kape aye ubena kwingijila mu (muka?) mu kulabijila, kupichila mu sesi wa mweo wanji. “Oo, Mulongo Yoano, wajinga na bainobe bawama. Abo bafwile kalakene.” Ke kulabijila! Mwamona? Obewa kuuba wauba kyokyo ne.

⁸⁶ Kyafwainwa kwiya kupichila mu ndonda ya kufukula kobe obewa mwine. Obe, obewa mwine, leka Kyambo kya Lesa . . . Obewa kechi wiya mambo ba inobe bajinga bawama ne. Obewa kechi wiya mambo momwalamakana bawama ne. Obewa wiya mambo Lesa wakwita mba wiye, kbiji wamutambula Aye namambo a Kyambo Kyanji. Akya Kyambo kyo kyalumbulula bintu byonse. Akya Kyambo! Inge wakonsha kufumyamo bintu byonse mujishinda, kapingu obe yense, masesi onse, kabiji ne kulekatu Kyambo kyaiyamo, akya Kyambo kikalupula kiji byonkabyo.

⁸⁷ Kuno, monai byo Kyamvvetwa nakyo? Anweba mwaamba mba, “Kyawama, pano,” anweba mwaamba mba, “kyawama, abo, kapingu ne masesi, kabiji ne bikwabotu, kechi kijipo na kintu kimo kyakwingila nakyo ne, Mulongo Branham?” Kyakine, kyubiwa. Pakuuba umvwe mwaleka Kyambo kyaiyamo, ne Kwikimvweta pa kapingu, nanchi kechi Kyakonsha kukoma ne; kikekala ke kyambo kyalemana.

⁸⁸ Mwakimonapo jipeke jawama ja jitaba jabyalwa mu mushiji, kabiji mwalekelapo kinchi kyaponena peulu yakyo? Jikakoma na kuzhobakana. Kyonse kijimwa, kintu kyonse kikoma, kikooba, mambo kintu kimo kikikanya.

⁸⁹ Kyawama, alo lolukatazho luji na Lwitabilo lwetu lwa kipentekosito leelo. Twaleka bintu byavula kwi Kishikijila, Lwitabilo lo twafujishiwa, aye Mupashi Wazhila byo aikala mwi atweba. Tuji na bintu byavula bingi, kasa bibena kutala pa muntu mukwabo.

⁹⁰ Kabiji diabola kimye kyonse ubena kweseka ku kutongwela kukakalwa kwa muntu umo, bino aye weseka kukukanya kufuma kulwine lushimuno lwakine. Aye ukakutongwela ku kafutufutu, bimye bimo, bayile na kupashang'anya kintu kimo. Aye kechi wikyubile ne, mambo aye wapashang'enyengatu. Pakuuba inge kyafuma kunsulo yakine ya Kyambo kya Lesa, "Meulu ne ntanda bikapita, pakuuba Kyambo Kyami kechi kikapitatu ne," Kyafwainwa kwikala byonkabya.

Anweba mwikimona, nyenga?

⁹¹ Kyafwainwa kwitabilwa mu milanguluko, apa mino kyaitabilwa na muchima. Apa mino Kyambo kya Lesa pokikala kituntulu, apa mino sesi uji yense wa mweo ne mubiji bichinishiwa na Mupashi Wazhila. Apa bino sesi wenu wa Lesa, kapingu wenu wa Lesa, kintu kiji kyonse kiji bulesa, kipita mwi obewa. Kechi kujipo luzhinauko kuntu kumo ne. Kechi kujipo kintu kimo kyakonsha kwimana ne.

⁹² Kechi kujipo kintu kyakonsha kwiya mu kulabijila ne, ne kwaamba mba, "Kyawama, Navuluka ba Miss Jones byo baesekele kuketekela Lesa, kabiji ba Miss *Kananga-ne-kananga*. Miss Doe waesekele kuketekela Lesa na mambo alubuko, kimye kimo, kabiji wakakelwe." Mwamona?

⁹³ Bino umvwe mu aja jishinda mwafumishiwa biko kabiji ne kutokeshiwa, ne kuyuzhiwamo mukachi na Mupashi Wazhila, akyo kechi kiyapotu ne mu kulabijila ne, nangwa kikale byepi na ba Miss Jones ne byo aubile. Ke obewa ne Lesa, pamo, kabiji kafwako mukwabo kanatu anweba babiji. Byobyoyo kiji. Ayo yo nkondo yenu. Mwipayai pa ntendekelotu. Mukanyai mu jishinda janji. Kechi kyaila kubanda kwa nkondo ne. Kana, kwiikanya ponkapotu!

⁹⁴ Inge mwakonsha kwiya, ne kulama byakulabijila ne kapingu, kabiji ne byonsetu, nakulangulukapo, "Kyawama, Nakonsha kukakalwa. Kape kechi kiji bulongo ne." Kechi mwakonsha kuuba kyokyo, nangwa pachechetu ne.

⁹⁵ Anweba tayai kulubaji lungi bintu byonse, ne kushikula jishinda, kabiji ne kwaamba mba, "Lesa, Kyambo Kyenu kyo kine Peenape, kabiji Kyokyami. Inge kipwilo kyonse kyakakalwa, inge ntanda yonse yakakalwa, nangwa byonkabyo Amiwa kechi nakonsha kukakalwa ne, mambo Mbena kutola Kyambo Kyenu." Ayo yo nkondo. Akyo kyo kintu.

⁹⁶ Kika Lesa wa Bulume bonse kyoakonsha kufumyapo kaasa pa jibele ja mwanamukazhi, kwakubula ne mukovu, kabiji ne kuleka mwaana walala na kufwa? Ine, mwane.

⁹⁷ Kasaongwakazhi kanyike kaishile kuno, kechi papita bimye byabaya ne, kufuma ku sukuulu wapeulu. Ba inanji bangichile, ne kwaamba mba, “Mulongo Branham, songwakazhi wami uji na kikola kya Kuvimba lenda.” Ao ye kaasa, ulenga byatutumana. Kabiji badokotala batolele kanyama kufuma pa kikolomeno kyaji, ne kwikatuma, kabiji kyajinga ikyo kikola kya Bitumbwatumbwa.

⁹⁸ Nanchi aye waambile mba, “Kyalondelapo kitumbila ku muchima wanji. Inge kyauba byobyoy, nishi wafwa.” Waambile mba, “Aye kechi uji na . . . Jishinda mobibena kutumbila, uji na, konse konse, pepi nobe bang’ondo basatu, bakwamba mba ekale na bumi.”

⁹⁹ Bainaji baambile mba, “Ngube ka Amiwa? Mutumai abwele ku sukuulu?”

¹⁰⁰ Waambile mba, “Mulekai aye, mambo kapepo ukayatu kyakubazhimukila.” Kabiji waambile mba, “Mulekaitu ayenga kabiji akekale bumi buji bulongo, monka mo kyakonshekela. Kumubuula nangwa kimotu pakikye ne.”

Nanchi inetu wang’ambijile mba, “Kika kyo Nakonsha kuuba?”

¹⁰¹ Naambile mba, “Muletai kuno kabiji ne kumubika mu mulaini wa milombelo.” Kabiji Naambile mba, “Anweba iyai naji.” Naumvwe pacheche ng’umvwino yapusanako mu mubiji.

¹⁰² Kabiji songwakazhi mucheche byo aishile, alwa lukeelo, na mivumbo ibena kumweka-kifufya, ya-kupeta, kabiji nobe byonka bikambizha sukuulu. Kabiji—kabiji awa muntu mucheche waishile. Amiwa kechi nayukile kana yeng’anyi; usa kungita pa foni ne. Namukwachile pa kuboko kwanji. Naambile mba, “Mwabuka byepi, nyenga.” Wajinga byobya. Wajinga iye. Mukakimyetu kacheche, natajile pashi ku bainanji kabiji ne bamwene bonse babiji kwakubula Lesa, kwakubula Kilishitu. Naambile mba, “Mwakosha kuketekela byepi lubuko muyuwe musango? Mwakonsha kutambula Yesu Kilishitu kwikala ke Mupulushi wenu?” Naambile mba, “Mwakonsha kwiya pa kikye kizhiba kyameema ne kubatizhiwa mu Jizhina ja Yesu Kilishitu mululekelo lwa mambo enu nyi?”

Baambile mba, “Tusakuba kyokyo.”

¹⁰³ Oo, mwayuka kyamwekele. Awa mwanamukazhi kape waikala muno lukeelo luno. Anweba bavula mwayuka lulwe lukatazho. Mulongo Mike Egan, umo wa matulasiti kuno, wamwenenga kyaubiwe. Akyo kyajinga pepi nobe foolo nangwa myaka faivi yapita. Awa songwakazhi wamucheche watwajilwe jibiji kwi dokotala, kechi mwatainwepo nangwa pachechetu akya kikola kya bitumbwatumbwa ne.

¹⁰⁴ Lukatazho lwajinga luka? Mwashikwile jishinda, patanshi. Mwafwainwa kutambula Mushilikale, aye Mupashi Wazhila,

abikwe palutwe ya kifulo kyankondo, akyo kisendatu Kyambo kya Lesa. Aye ye Kyambo. Kabiji Aye wimana ponka, kafwako nangwa kimo kyakonsha Kwikikanya ne. Kafwako nangwa kimo kyakonsha. . . Mashinda onse akwabo anengezhiwa. Kijitu pamo nobe kibili kiji na mupaipi mulupukila bwishi mwashika; mwabikamo mujilo, kintu kyenu kikalajika. Alo lolukatazho luji na bavula Benakilishitu bala-jika, ke mambo akuuba mba kechi bawamisha mashinda ne, kechi baya mukachi ne. Mwafwainwa kwikitokesa, bumuntu, kulabijila, milanguluko, byonse kwibifumyako, kabiji ne kulupuka kufuma mukachi, na kyokya Kyambo kya Lesa kyabula kumvwangakana, amba Ke kya Bukine.

¹⁰⁵ Nangwatu inge teni sauzande bafwa ku *lulwe* lubaji, leelo, na kuketekela; teni sauzande bafwa ku *lohwa* lubaji, keesha, kasa baketekela; akyo kechi kijipo na kintu kyakuuba kwi amiwa ne. Amiwa ne muntu pa bunke bwami. Amiwa yami mbena kwi kiketekela. Amiwa yami ne kitabila. Kabiji tumona kunyuma konkwa, inge twakeba kushikula mashinda etu, inge twakonsha, ne kumona. Twatana *yuwe* umo ne *yewa* umo, kabiji *yuwe* umo ne *yewa* umo, masauzande mwiabo, babena kushimuna.

¹⁰⁶ Bino diabola weseka kubwela jibiji. Monai, inge wakonsha kutwela momwa, nangwa pacheche, aye onauna zhita yenu ponkapotu.

¹⁰⁷ Inge uji na masesi obe, kumona, kutopa, kukwata, kunusha, ne kumvwa, bijitu bulongo, bino kechi mwakonsha kwi biketekela ne kana bya itabazhanya na Kyambo. Bijitu bulongo, bino, umvwe byabula kwitabazhanya na Kyambo, kechi mwakonsha kuteleka kwi abyo ne. Pano, kutwelelamo, bumuntu, bya kulabijila, bya kulanguluka, kabiji ne bya kufwalama, bijitu bulongo inge bya itabazhanya na Kyambo. Pakuuba umvwe kufwalama kechi kyaitabazhanya na Kyambo ne, kifumyepo. Mwakonsha kulala muyengo wabwishi, bukiji bukijitu. Mwamona? Inge kulanguluka kobe kwabula kwitabazhanya na Kyambo, fumaiko ku kyokyo. Abyo ibyo. Aya ingini. . . Inge kulabijila kobe, inge kutwelelamo kobe, inge buntutulu bobo, kiji kyonse, kyabula kwitabazhanya na Kyokya kiji mukachi, kifumyepo.

¹⁰⁸ Kika kyo uji nakyo pano? Uji na musango wandonda ya bya mwiulu. Aleluya! Ke Lesa ye wabikile tubangabanga mu ndonda ne kwaamba, “Kobama popa poso Nakwita!” Bekala ponkapa. Kafwako nangwa kimo kikebendesha ne. Inge Lesa wakwata muntu mu maboko Anji, poso waikala na masesi, bumuntu, ne byonsetu byafumishwamo, poso kyaimana na Lesa kunyuma yakyo, mu mupashi, kechi kujipo diabola mu ntanda wakonsha kubikamo luzhinawuko momwa ne. Abyo ibyo.

Aye wiya kouji ne kwamba mba, “Obewa kechi waumvwako bulongo ne.”

109 Bumuntu bobе bwaya ne kuya, ku kyokyo. Awa muyengo watoka bingi, ubijika, “Alelula!” Amwa mwakulupukila mwaimba ne kapyelele, “Lukumo kwi Lwesa!” Kibeka bingi, kine, kijitu kyatoka ne kyabulamo biko, pakuuba mba Kyambo kya Lesa kingijilemo, Bulume bwa Lesa. Mwamona? Akyo kyo kine kintu.

110 Akyo kyo kifulo kyenu kyankondo. Kifulo kyenu kya nkondo kiji konka kuno ku ntendekelo, kunyuma kukwe mu mweo, kunyuma ku milanguluko yenu ishikulako. Aye—aya milanguluko kyo kibelo kyakuya ku mweo, kibelo kyakuya ku mupashi, nagwa byonkabyo. Milanguluko yenu ishikuka ne kutambulwila mupashi, nangwa ku mukaana mupashi. Wakonsha kwikala na bumuntu bucheche, ne byakukwatakata, ne icheche ng’umvino ya ku mubiji, byonse bye bintu. Akyo kechi kijipo na kintu kimo nakyo ne. Abyo ke ng’umvwinotu icheche ya ku mubiji ne bintu bikwabo. Pakuuba umvwe kyafika pa kintutulu, milanguluko yobe ikishikula. Milanguluko yobe ikiswisha nangwa kwi kikana. Byokiji, balunda.

Lesa, kechi muleke nangwa umo kimupite ne.

111 Monai, ke milanguluko yobe ishikula kibelo; nangwa kushika kibelo, kabiji ne kuteleka ku bumuntu bobе, kuteleka ku kulabijilakobe, kuteleka ku kufwalama kobe. Bino umvwe milanguluko yobe yishika ayo ine ku bibye bitu, ne kuleka Lesa, aye Mupashi wa Kyambo Kyanji, watwelamo, Kilupula bintu byonse pangye. Kuzhinauka konse kufumamo. Moyo yense ufumamo. Byonse byakumvwaumvwa byaluzhinauko bya kumubiji bifumamo. Ng’umvino yonse ifumamo. Kechi mwikalapo kintu kikwabo ne kanatu Kyambo kya Lesa, kabiji Satana kechi wakonsha kulwa Nakyo ne. Ine, mwane. Aye kechi wakonsha kulwa Nakyo ne. Pano, twayuka mba akye ke kine.

112 Ao mankondo atwajijilatu kufuma kujuba ja mu bujimi bwa Edena, nkondo iji mu milanguluko ya muntu. Satana wiitatwile. Kika kyo aubule byo a musambakene Ewva? Aye kechi wakaine Kyambo ky Lesa ne, pakuuba Wikipetele kitoka. Aye waimikile mashinda amo acheche kukwe kutu kumo. Aye waambile mba, “Bino kine Lesa. . .” Ntendekelo 3:1. Mwamona? “Kine, Lesa, byonse bye bintu Aye—Aye—Aye walaile. . .” Aye wayukile mba Kyambo kijitu bulongo. Bino aye wayukile mba kuuba naiyatu patoka na Kwikikajipila ne, kwikilengulula muyewa musango ne, bino aye—aye—aye Wikibikile-shunga.

113 Nobe bamaama byo baubanga pakuuba mba tutome muchi, kabiji baesekanga kubika lutobya tobya lwa olingi mu manyi akasita. Amiwa, kyawama kutomatu manyi akasita kwakubula lutobyatobya lwa olingi ne! Kintu kyonse kiji na bukafutufutu! Mwamona? Abo. . . Twatemwanga kubuuka

pa kimye kya bufuku, ne kwitupa manyi amashanga, na kikola kifuma ku bazolo. Kabiji babikanga manyi amashanga, ne kubikapo shunga; monai, ke musango wa bukafutufutu. Pakuuba kyasonkangatu peshingo, pepitu, pa kuya panshi, panyuma ya kufumako shunga.

¹¹⁴ Kyawama, abyo byo kiji, mulunda. Satana weseka kwi—kwikala wabukafutufutu pa kikye. Aye weseka kwi mumweshapo kintu kimo kyawama, jishinda japela, mutachi ubena kumweka kwikala wamaana. Bino kechi kujipo tachikilo ya maana kukila yoya yabikileko Lesa ku ntendekelo ne, Kyambo Kyanji. Kwachijilai kyokyo Kyambo. Kwachishai pe Akyo. Kilekai Akyo kikukwachishe. Ikalai ponkapo Nakyo. Akyo kyo—akyo kyo kintutu.

¹¹⁵ Aya nkondo watwajijile mu kimye Evwa kyo ashikwile milanguluko yanji, mu kuteleka ku ndangulukilo yanji. Awa ye muyengo mo kyatwelejile. Aja jo—jo jishinda mo kyapichijile, kulanguluka kwanji. Aye, mu mweo wanji, walangulukile.

¹¹⁶ Meso anji ajinga kyakumwenako. Wamwene muloolo. Aye wajinga wawama, mwanamulume walamba, kukila kuwama ne mulume wanji. Aye wajinga wajimuka kukila bilengwa byonse bya mu bujimi, kabiji aye kape wajinga mwanamulume wa kutalwa bulongo kukila mulume wanji. Aye wamwekelenga nobe lukinyama mukatampe wa kyanakilume waimene popa. Wajinga wabaya bingi! Kabiji aye waesekelenga ku mubula byo kyajinga kintu kikatampe.

¹¹⁷ Kabiji kintu kitanshi kyo aubile, washikwile milanguluko yanji. Kabiji byo aubile, ndangulukilo ya bumuntu yiikikwachile. “Kika, bushe akya kechi kyakonsha kwikala kintu kyawama nenyi?”

¹¹⁸ Akyo kyo kintu kyo oba ku mwanamukazhi leelo. Mwanamukazhi umo uji na mutemwe wamulume mucheche, watana umo mukatampe, wabaya, mwanamulume uji na misunyi misunyi. Awe muntu ukakeba kushikula milanguluko. Vulukai, awa ke Satana. Awa ke diabola. Nangwa, kutwala mulubaji lukwabo, mwanamulume ku mwanamukazhi, mwanamukazhi ku Mwanamulume, mu musango uji yense. Aye uba byepi? Wingijila mu bonkabwa bulume bwa kulanguluka, abwa bumuntu nangwa kintu kimo, kyatatula kupichilamo.

¹¹⁹ Pakuuba pana kifulo kitanshi ku Kyambo kya Lesa. Muntu kechi wakonsha kwiya ku...Aye kechi wakonsha kulenga mambo ne...Aleluya! Abye byokiji. Akwe ke kwaluka, bumuntu. Muntu kechi wakonsha kulengamambo ne kana patanshi wataya kulubaji lungi Kyambo kya Lesa. Aye kechi ne *kulengamambo ne*, akwa ke “kubula lwitabilo,” kanatu patanshi wataya Kyambo kya Lesa, Kyeenyi kya Lesa, kechi wakonsha kulengamambo ne.

¹²⁰ Evwa kechi walengelepo mambo ne poso byo atujile Kyambo kya Lesa ku lubaji, kushikula jishinda janji ja milanguluko kupichila mu mweo wanyi, kabiji watatwile kulanguluka. “Kika, kyakine. Balume bami kechi bakimbulapo bibye bintu ne, bino Naketekela mba obewa. . . Aye wambujile mba kechi nafwainwa kuuba bibye bintu ne, pakuuba, mwayuka, obewa wikyamba bulongo bingi kabiji kijitu patoka. Na—Naketekela mba kyakonsha kwikala kyawama, mambo ubena kulondolola kwikileta patoka kwi amiwa.” Monai, aya yo yajinga nkondo itanshi. Kabiji, kupichila muyoya nkondo, yo yaletelela nkondo iji yonse. Kabiji kwichilwa kwa mashi konse kwikalako, kwaletelwe monkamwa mu Edena. Aye wajimbulwile Kyambo kya Lesa.

¹²¹ Kabiji inge jishinda jimoto jicheche ja Kyambo kya Lesa ja jimbulwilwe, kyaleta makatazho onse ajiko, pano twakonsha kubwela byepi, kasa tubena kujimbulula Kyambo? Kuuba mwikyuba ne. Mwafwainwa kushika byonse bye bintu bikwabo, bumuntu, bya kulabijila, kabiji ne kwamba. . . kulanguluka, kabiji ne byonse bye bintu bikwabo. “Tayai bya kulanguluka.” Atweba kechi tulanguluka pakikye, nangwa pacheche ne, kafwako nangwa kimo ne.

¹²² Atweba twitabatu Kyambo monka mo kyaikela, “Lesa ye waambile byo byo,” kabiji kilenga kakola pakachi kobe ne Lesa. Jishinda jonse jishikuka pakachi kobe ne Lesa, apa ponka.

¹²³ Aya yo nkondo, yajinga itanshitu, yatachikilwe kulutwe. Kechi twingijishe laifo wa .22 ne; twayai tutole—atomiki mbomba. Twayai twingile mwingilo bulongo. Twayai tutole atomiki mbomba wa Lesa. “Kyo kika, Mulongo Branham?” L-w-i-t-a-b-i-l-o mu Kyambo Kyanji. Ao ye atomiki mbomba wa Lesa. Kisansaula misongo ne badiabola, ku kilujo ne ku kipiko. Ki—ki byonauna. Kileta misalululo. . . Oo, kiji. . . Akyo kyonaunatu. Akyo kisalang’anya bintu byonse bya bumbulwalesa. Inge awa mbomba wa lwitabilo waponena popa, na Kyambo kya Lesa panyuma yakyo, kisansaula diabola uji yense, bikola byonse, misongo yonse.

¹²⁴ Mwaamba mba, “Abyo ibyo nyi, Mulongo Branham? Pano kika kyo kyubila, ku bamo, kabiji ku bakwabo ne?”

¹²⁵ Ke mambo a jishinda. Mwakonsha kukeketa kabiji ne kwikimona. Bino wafwainwa kwikala nakyo *mumwe*, pa kutala *kukwe* ku jishinda. Kechi *kokwa*, na kutalamo; wafwainwa kwikala mukachi, kasa ukeketa. Mwamona? Anweba kechi mwakonsha kwiya kupichila mu milanguluko ne. Anweba kechi mwakonsha kwiya kupichila mu bibye bikwabo ne. Anweba mwafwainwa kwishila mu jishinda jakwa Lesa ja kikye, monka mu mweo. Kabiji anweba mwikyuba byepi? Ngajishinda japelako jojepi?

126 Kikaleta milangu-...kufika ne panshi. Anweba mwamba mba, masesi, “Oo, Amiwa—Amiwa nakonsha kwikyumvwa. Ee, byo kiji. Uu-uu. Oo, Amiwa—Amiwa nakonsha kwi kinusha, nangwa ne bikwabotu. Abye bintu kobiji. Ee.” Kintu kyalondelapo, obewa ulanguluka, “Kyawama, kyamweka nobe wafwainwa kuyuka kyo abena kwambapo. Aye dokotala waamba mba Amiwa kechi nakonsha kukosa ne. Abyo byo kyafwainwa kwikala.” Mwamona, ponkapo anweba—anweba mwaya mungi. Awa ke diabola waimana popa. Awa ke diabola ubena kuleta bibye bintu kwi obewa. Kechi mwikitabile ne.

127 “Alelula! Kyambo kya Lesa kyaamba mba Amiwa nkoba... ‘Pabintu byose, Nakonsha kutemwa mba mwaikala bumi bwawama.’ Abyo ibyo.” Wakonsha byepi kwikala mushilikale wakine koko? Monai, “Nakeba mba anweba mwikale na bumi bwawama.”

128 Byokiji, ponkapo, aa mashinda. Mwaikalatu nao, ashikuka. Kechi mwi apitailetu ne.

129 Nanchi inge Satana kutwela kupita momwa, kupichila mu bumuntu ne byonse bye bintu, nanchi aye ufika ne panshi kupelo ya mweo, mu milanguluko. Pano, inge wakonsha kukutana obewa...Obewa kechi ukoba—obewa kechi ukatala pa kimo kyabyo ne kana patanshi wamuswisha mu *mumwe*. Wafwainwa ku muswisha kutwela. Pano umvwe watwela mukachi, uji na luusa. Pano uuba byepi? Aye utaula kwingijisha bumuntu. Aye utatula kwingijisha *kikye*, utatula kwingijisha *jije* jishinda. Kyokika? Kumona, kutopa, kukwata, kunusha, kumvwa; bya kutwelelamo, bumuntu, kuvuluka, milanguluko, bya kufwalama. Aye utatula kwingijisha onse o mashinda aacheche apusanapusana, kikulu wakonsha kutwelamo, peulu *yayuwe* uji papo. Aye wafwainwa kwiya mu milanguluko yobe, patanshi, kabiji ne obewa wikiswisha. Kyakonsha...Telekai. Kyakonsha kukulwisha, bino kechi kufika kwi obewa ne poso wikiswa.

130 Kimye Satana kyoaile kwi Ewva, ne kwamba mba, “Wayuka, kipangwa kyawama bingi,” aye waimene pa kimye kicheche. Oo, apa ponka po aubile kilubo, byo aimene pa kakimye kacheche.

131 Kechi wafwainwa kwimana pabula kintu ne. Uji na Mbila. Yesu uji na bumi. Lesa aye Ubuka. Ayo yo Mbila. Kechi wafwainwa kwimana pabula kintu ne, kechi kulanguluka ne, kafwako nangwa kikwabo.

132 Bino aye waimene pa kimye kicheche. Apa ipo Satana po atwelele muyoya milanguluko. Waambile mba, “Kyawama, kibena kumvwanika mba muji maana.” Oo, kechi wakonsha kuuba kyokyo ne. Toolatu kyaambile Lesa.

133 Abulahama, kyabyepi umvwe waimene na kulanguluka, byo Amubuujile mba ukekala na mwaana kwi Sala, kabiji mwanamukazhi wajinga na sikisite-faivi ne aye sebeta-faivi?

Kabiji byo ajinga aduleendi, kabiji mwanamukazhi kasa aji—kabiji wajinga na naite, aye, watwajijiletu, aye—aye—aye washimwine mba Kyambo kya Lesa kyakine. Kabiji aye watelele byonse byo bintu, abyoyabujilweko, nobe pobiji. Mwamona? Aye. . . Ne luketekelo, kwajingapo luketekelo? Aye kechi waingijishe luketekelo ne.

¹³⁴ “Kyawama,” mwaamba mba, “Amiwa Naketekela mba nakonsha kwikalatu bulongo. Amiwa Naketekela mba nsakwikalatu bulongo. Amiwa Naketekela mba nakonsha kutambula Mupashi Wazhila. Amiwa Naketekela mba ne Mwinakilishitu. Amiwa Naketekela mba nguba *kikye*.” Anweba kechi mukeba kyokya ne.

¹³⁵ Abulahama kechi watajile ku kyokyo ne. Amena. “Pabula luketekelo, aye watwajijiletu nakuketekela Kyambo kya Lesa.” Lwitabilo lwakila luketekelo. Lwitabilo lufuma kunyuma *kukwe*, monka mukachi. Lwitabilo lufuma *mumwe*.

¹³⁶ Wakonsha kutwelamo byepi? Kupichila mu iye milanguluko, akye—akye kibelo, lutwe lwa nkondo kasa lwaimana byobya.

¹³⁷ Pano, umvwe nkondo yaalwa! Bino, daibola waikala ponka pepipepi pa muchima yense, lukeelo luno. Aye waikala, ku muchima wayuwe songwakazhi wa mucheche. Aye waikala ku michima yenu. Aye waikala konse konse. Aye ubena kwamba mba, “Oo, Nakumwene kasa weseka kuyuma. Naumvwapo kala kyokyo.”

¹³⁸ Mupangaimo. Byobyoka. Mupangaimo. Baibolo waamba mbaka papo, pa kibaba kyetu? “Mupangaimo.” Abyo ibyo. “Mupangaimo.” Atweba twafunjishiwa.

¹³⁹ Amiwa nalanguluka mba, “Lukatazho luji kwepi ne atweba basapwishi?” Nakumya kana musangoka walufunjisho lo twapitamo.

¹⁴⁰ Lesa ubena kufunjisha na mambo a iye nkondo ikatampe. Mateyo 24 waamba byobyoyo, kabiji ne aye Danyela 12, waamba mba, “Kukekala kimye kya lumanamo, akyo lwabujilwe kumwekapo kala pantanda.” Kabiji tubena kwikalala mu kyokya kimye, kimye kismewa, ne kufunda, ne bintu bikwabo, byamvweta pa Kyambo kya Lesa, kabiji ne kutwela mu kulanguluka languluka ne bikwabotu. Aya nkondo ko iji ponka pano. Ng’anyi ukemana? Aleluya! Aye nkondo yanengezhiwa kutatula. Watatama kala pano. Monai kwitwimena byo kwabaya ko tuji nako kulutwe.

¹⁴¹ Ing’anyi ukekala nobe Davida? Waambile mba, “Anweba mwaimanatu ne kuleka awa mwina Filisitiya wabulwa kusembululwa kuzhilulula mazhita a Lesa mumi? Nsakuya ndwenaji.” Amena. Lesa ubena kukeba banabalume ne banabakazhi lukeelo luno bakonsha kwimana ne kwamba mba, “Amiwa sakulondela Nkambo mwaila Kyambo Kyanji.” Amena. Nangwa kwikale kukakalwa, ako *akye* ne *kyokya*, kabiji ne

kyaubile *awa* umo. Akyo kechi kijipo na kintu kimo kya kwingila nakyo ne. Anweba ba Saulo, ne bakwabotu, inge muji na moyo wa kumuchina, bwelai kunyuma ko mwafwainwa kutanwa. Pakuuba, zhita yakwa Lesa ibena kuyatu kulutwe, amena; bantu ba bulume, bantu ba—ba—ba lwitabilo, bantu babulume, bantu bakwatakanya. Abo kechi bakeba kwikala bajimuka ne. Abo kechi bakebewa kufunda ne. Bafwainwa kwikala mashinda. Lesa usenda onka aa mashinda acheche.

¹⁴² Aye waimene pa kimye kicheche, na kulanguluka, ne kwamba mba, “Kyawama, pano, twayai yumone.” Kyawma, kijitu pomo nobe, pano inge. . .

¹⁴³ Awe inetu wakepa mubiji, lukeelo luno, kechi kyaluzhinauko mba dokotala wamubuula mba, ujitu pepi nobe kupelo ya mukwakwa, “Kechi kujipo kintu kimo kyakonsha kubiwa ne.” Kyawama, pano, awa yeyewa dokotala. Amiwa kechi na muzhachisha ne. Awa muntu ke muntu wakisaayasi. Aye umona akya kikola kyashinda mubiji wamwanyike. Kyakila pa kintu kiji kyonse. Aye kechi uji na muchi wa kwikikanya ne.

¹⁴⁴ Nanchi awa kaasa washijile awa mwanamukazhi; kine, lufu lwashinda awa mwaana walukeke; pakuuba Kapiteni wetu Mukatampe, aleluya, wa iye zhita ikatampe, Aye ye lusanguko ne Bumi. Kafwako nangwa kimo kyakonsha kumushinda Aye ne. Aleluya!

¹⁴⁵ Aa maana a mazhita aikala mwi ba kapiteni wabo, abwa bujimuku. Rommel, mu Germany, wajinga maana a Germany; kechi Hitler ne. Rommel! Abyo ibyo. Eisenhower! Bantu bashilikale! Patton! Aba bantu bajinga kulutwe, kilondelatu mujepi jishinda jo asakupainamo mikambizho. Londelai kapiteni wenu, inge aye ye jenulo wafwainwa. Inge aye iye wafwainwa, inge aye ye jenulo wa masita-foolo, inge washinikishiwa, umvwe washinikishiwa mba ye wafwainwa, mulondelai. Nangwa kimyeke nobe kyatama, kwi obewa, yangatu kulutwe. Uba byonka byo akubuula.

¹⁴⁶ Aleluya! Tuji na Jenulo wa masita-faivi, wasopelelwa mba Y-e-s-u, wabika masita faivi pe atweba, l-w-i-t-a-b-i-l-o. Aye ukyangye kushindwapo munkondo. Aleluya! Aye washijile lufu, kalunga kabafu, ne kilende. Fumyaimo ba diabola mujishinda. Aye ye mukatampe Kapitawa Mukulumpe. Nanchi, diabola kechi uji ne mukipikichala ne.

¹⁴⁷ Aya nkondo ikatampe yabulwa kulwiwapo, ibena kubikwa na kwiningezha ponkapano. Kyakine, byokiji. Oo! Aleluya!

¹⁴⁸ Inge Amiwa ne kilanguluka! Inge Naimana ne kumutala Aye byo oba bintu, kumumona Aye kasa asolola bintu, washikula bintu, kwamba mba, “Ji kekala *jije* jishinda kabiji ne *joja* jishinda,” byokiji! Oo, talai panyuma *papo*, ne kwamba mba, “Awe ye ng’anyi Kapiteni mukatampe?” Oo, Amiwa kechi mona kunyuma ne kabiji ne kumona

kana Dokotala *Kananga-ne-kananga*. Amiwa mona byaambile Kapiteni. “Aye ye Kapiteni wa lupulukilo lwetu.” Aleluya! Nga lupulukilo loluka? Bupokolweshi! Lukumo! “Aye ye Kapiteni wa bupokolweshi bwetu.”

¹⁴⁹ Kimye kikatampe kyakuya kulutwe kyafika. Aleluya! Mushilikale, na bya nkondo kasa bibena kubengeshima, misombelo kasa ibena kumweka! Lwitabilo ne luzhinauko bibena kukubika kutatama, mu uno tabbanako, lukeelo luno; luzhinauko ku lubaji lumo, lwitabilo ku lukwabo. Bashilikale, imanai pa kifulo kyenu kyamingilo. Aleluya! Kapitawa Wetu, awa Ntanda Wakumakya, kasa abena kutangijila. Aye kechi ubwela kunyuma ne. Aye (kechi) wayuka kyambo kya kyakubwela kunyuma ne. Aye kechi ubwela kunyuma ne. Amena. Kyakine.

¹⁵⁰ Nkondo ikatampe ayo yabulwa kulwiwapo, ibena kulwiwa ponkapano, ee, mwane, pakachi ka lufu ne bumi, pakachi ka misongo ne bumi bututulu, pakachi kalwitabilo ne luzhinauko, oo, ami, pakachi ka bwanabwabene ne buzha. Nkondo iji koka! Wamishai mafumo enu, bashilikale. Tokeshai bivwalo bya nondo. Lesa ubena kunengezha bashilikale Banji kwikala benengezha. Amena. Lesa ushinga manyi zhita Yanji.

¹⁵¹ America umvwika bashilikale banji mujishinda jawama ajo jo bakonsha kumvwajilamo: bipopo bya byela, ne bivwalo byankondo, kabiji ne byonse byo banji nabyo, mataka abyela, byonse byo baji nabyo.

¹⁵² Lesa umvwika zhita Yanji. Aleluya! Ng’anyi musango wabingijisho byo twingijisha? Aye Mupashi Wapoko, Kyambo kya Lesa! Amena! “Akyo Kyambo kya Lesa k yatwa kukila poko yatwa-kubiji,” Bahebelu 4, “kusabakanya kufika ne kukwabanya kwa manungi, kufika ne—ne mukolokofwa wa kikupa, kabiji Alondalonda ne kupima milanguluko ya muchima ne mo yaila.” Kyo Kyambo kya Lesa! Kwitabila Kyambo Kyanji, kabiji ajo jojishinda Lesa jo amvwikilamo.

¹⁵³ Akyo Aye kyo apaine kwi Evwa nobe kya kulwilako. Kabiji aye waonawine kiwalo kyankondo. Wikyubile byepi? Kupichila mu kushikula muchima kumilanguluko. Anweba kechi mwakonsha kulanguluka na Kyambo kya Lesa ne. Kechi kijipo na milanguluko ne. Obewa. . . Ke Kyambo tu kya Lesa. Kechi kujipo—kechi kujipo kuzhinauka pa Kikye ne. Kechi kujipo kulanguluka pe Akyo ne. Ke Kyambo kya Lesa. Akyo kibipwisha byonse. Byonse bijiko. Akyo kibipwisha byonse myaka ne myaka.

¹⁵⁴ Mona mo Nekitazha, mutemwe? [Aye nyenga waamba mba, “Amena.”—Waku.] Ke Kyambo kya Lesa. Lesa wikilaile. Lesa ye waambile byoabyo.

¹⁵⁵ Baambile kwi Abulahama, “Wayuka byepi mba ukekala na yewa mwaana?”

“Lesya ye waambile byo byo.” Akyo kibipwisha byonse.

“Kyawama, kika kyo wabujilakyo?”

156 “Amiwa kechi nayuka kimye kyo Nkekitambula ne. Lesya ye waambile byo byo. Akyo kechi kikandekesha nangwa pachechetu ne.” Aye wita- . . .

157 “Kika kyo wabujila kutwajijila kuya kasa ubwela ku muzhi kobe, konka ko wafumine?”

158 “Amiwa nafwainwa kwikala kang’enda ne mwenyi mu ino ntanda.” Amena! . . . ? . . . “Lesya wapaine mulaye. Lesya ukapa mwaana monka muno mu ino ntanda Aye mo atumine.” Aleluya!

159 Lesya wakonsha kukubuka mukyoka kino kimye kya kyabu Mupashi Wazhila, ako Aye ko akutumine. Lesya ukekipana kwi obewa. Anweba kiketekelaitu. Amena. Shikulai miyengo yonse ya mweo ne mubiji, masesi, ne kapingu, kabiji ne kulekatu Kyambo kya Lesya patanshi kyafika ponse ponse, tolai yoyo milanguluko. Apo popaji kifulo kya nkondo.

160 Kechi kwamba mba, “Kyawama, inge Nakonsha kwi kyumvwa, inge Nakonsha kumvwa lukumo lwa Lesya byo lubena kwikila panshi! Oo!” Akyo kechi kijipo na mwingilo umo nakyo ne; nangwa pachechetu ne.

161 Shikulai aya milanguluko. Akya kyo kifulo kya nkondo. Apa ponka ipo nkondo po inengezhiwa, monkamwe lolutwe lwa nkondo, ya milanguluko yobe. Ishikule, ne kwamba mba, “Amiwa . . . Luzhinauko lonse, Nazhinauka luzhinauko lwami.” Amena. “Amiwa mbona kuzhinauka luzhinauko lwami pakino kimye. Amiwa mbona kuketekela Kyambo kya Lesya. Abo ngiya Amiwa, Satana.” Kintu kimo kasa kubiwa. Kine, kyakonsheka. Ee, mwane.

162 Aye ushinga manyi bakalume Banji na Mupashi Wanji. Aye wibatamina bamalaika. Bantu baleta bisela ku kyokyo, bimye bimo, “bamalaika.” Lekaiami—lekai ami ngye ku kintu kimo papo ne anweba, pa kakimyetu kacheche. Twayai tuzhikule mu Bahebelu, pa mineti umotu. Bahebelu kyapitala kyabu 4, kyapitala kyabu 4, kabiji twayai. . . Natazha mu kuuba mba, kyapitala kyabu 1 kya Bahebelu, kabiji twayai tuzhikule ku veleeshi wabu 14.

*Abo bonse kechi bo bapashi bengila mingilo nenyi,
batumwa kufuma . . . batumwa mu kwingijila mingilo
aba bakaswana lupulukilo?*

*. . . ng’anyi umo wa bamalaika ye anena mba . . . Ikala
obewa ku kilujo kyami . . . ?*

. . . bonse bamalaika ba Lesya . . .

163 Pano, papo Baibolo waiya ne kwitubula papo, amba Lesya utuma bamalaika. Lukumo! Bobang’anyi? “Mipashi ingijila.” Lukumo! Mipashi ingijila, yatumwa (kwepi?) kufuma

ku Kyeenyi kya Lesa. Nakuba ka? Nakwingila Kyambo Kyanji. Amena! Abo kechi bakwingila bya ku masukuulu a mamboawama a jibumba ja dinominesheni, kana na kwingila Kyambo Kyaji. Byokiji. “Mipashi ingijila, yatumwa.”

¹⁶⁴ Twayuka byepi amba byobaji? Aye Baibolo waamba, mba, “Akyo Kyambo kya Nkambo kyaishile ku ba ngauzhi.” Abyo ibyo nyi? Abo bamalaika basapwila Kyambo Kyanji, kupichila mu Mupashi Wanji; kusapwila Kyambo, kupichila mu Mupashi Wazhila. Kabiji aye Mupashi ne Kyambo byaishile ku bangauzhi, kabiji bangauzhi bajinga na Kyambo kya Lesa. Ao oene mambo kyo baubilanga byakukumya byo baubanga. Kechi kyajinga muntu ne; kyajinga Mupashi wakwa Lesa mu muntu, aye Mupashi wa Kilishitu mu muntu. Mambo Kyambo kya Lesa . . . Kika kyo aubile? Watoksha jishinda jiji jonse. Lesa wamusajile, kabiji washingilwe manyi na Mupashi Wazhila. Kabiji kechi kyajinga aye ne. Aye kechi waubilepo kintu nangwa kimo ne kana patanshi wikimona mu kimonwa. Elaija waambile mba, pa Mutumba wa Kamela, “Abye byonse ne byuba mwaila kukambizha Kwenu. Pano, Nkambo, lekai kiyukanyikwe amba Anweba yenu Lesa.” Oo, lukumo lwikale kwi Lesa!

¹⁶⁵ Amiwa ne kimona bimye byavula bingi, inge mwamona Mupashi wakwa Lesa wafika pantu, kabiji ne kyokya kifulo kikala kya shingwa! Inge aje jibumba jicheche muno lukeelo, jakonsha kusendatu awe muchima, ne kufumyamo kuzhinauka konse kuji mujishinda! Wakonsha kuzhinauka jikwabo byepi, inge wamona bafwa—bafwa basanguka, bilema ke byende, bampofu ke bamone, ne bakamama ke bomvwe?

¹⁶⁶ Aye Malaika wa Nkambo, ne kipikichala Kyanji kyakobama pa kibumba, kyafwachikwa na sayaasi, konse konse. Kika Aye kyo oba? Kwikala na Kyambo. Amena! Kichiba diabola uji yense. Ee, byo Kyuba. Kyo Kika? “Yo mipashi ingijila, yatumwa kufuma ku Kyeenyi kya Lesa,” mu kushinga manyi basapwishi ba Kyambo, aba bekala na Kyambo. Kabiji Aye ushinikisha Kyambo na biyukilo kasa bilondela, kileta Yesu ke umo kesha, leelo, ne myaka yonse. Awa byo Anji.

¹⁶⁷ Twakonsha kuzhinauka byepi, kasa Aye ujitu byonse pamo bya masayaasi, bya kumubiji, ne ku mupashi, jishinda jiji jonse jakonsha ku shinikishiwa, Aye washinikishiwa *papo*?

¹⁶⁸ Lukatazho lweepi? Luji mu milanguluko yetu. Tushikula michimma yetu ku kintu, ne kwamba mba, “Kyawama, pano, Amiwa kechi nayuka ne kana kyakonsha kwikala nangwa ine. Kapepo, inge Nakonsha kumvwa bulongo keesha.” Oo, akyo kechi kijipo na kintu kimo kyakwingila nakyo ne.

¹⁶⁹ Nobe Amiwa byo kelwa kwamba, Abulahama wafwaijilwe kwambila Sala . . . Awa wapita pa kipimo kya—kya kwikala ke mwanamukazhi. Mwayuka mo Nekitazha; ke kimye kya bumi, moba anji tweti-eiti. Monai, aye wajinga na myaka sikisite-

faivi. Aye kape wapichilepo, pa fifitiini, myaka tweti. Kabiji aye waambile ku mwanamukazhi, kape, moba acheche alondelapo, waambile mba, “Waumvwa kyapusanako nyi, mutemwe?”

“Kechi pajipo lupusano nangwa pacheche ne.”

¹⁷⁰ “Akyo kechi kijipo nakintu kimo kyakuba na kikye ne. Atweba twa twajijila kuya, nangwa byonkabyo. Kyawama, pano, inge mwatatula kubwela kunyuma nobe awa—awa mwanamukazhi mwanayike jibiji, twayuka, kupichila mu oa mashi abumi, kyawama, nanchi, twatana kuuba mba amwa muji mwanekena mwakwikala mwaana, kabiji ne bintu byonse bisa kwikalatu bulongo. Pano, mwaumvwako lupusano leelo nyi? Papita ke ng’ondo kufuma Aye po andajile. Waumvwapo lupusano, mutemwe?”

¹⁷¹ “Nangwa pachechetu ne, Abulahama. Kechi kujipo kiyukilo kya kintu kimo ne. Ami—Amiwa njitu nobe byo Na—Naikala pa myaka icheche yapita. Kechi kujipo nangwa lupusana lucheche ne.”

“Lukumo lwikale kwi Lesa! Tukekala nanji, nangwatu byonkabyo.”

¹⁷² “Mwalanguluka mba, Abulahama, pajije . . . Talai, inge Aye wakulaile, kine Aye uketupa kiyukilo mu *jije* jishinda. Kine Aye uketupa kiyukilo.” Uu! Aleluya!

¹⁷³ “Kisemi kya ubi ne bukende kikeba biyukilo.” Abyo ibyo. Aye wajinga na kiyukilo. Kyajinga kika? Kyambo kya Lesa. Akya kyajinga kiyukilo.

¹⁷⁴ Nga Lesa wakonsha kubuka yuwe mwanayike byepi? Kyambo kya Lesa byo kyaamba; inge Naumvwa bya kumvwaumvwa ku mubiji, nangwa kwakubula bya kumvwaumvwa. Inge Ami. . . Nangwa kyubiwe byepi, Lesa ye waambile byobyoy. Akyo kipwisha byonse.

¹⁷⁵ Abulahama waambile mba, “Tola bisochi byobe ne byonsetu pamo, tubena kuya ku ntanda.”

“Ubeni kuyapi?”

¹⁷⁶ “Amiwa kechi nayuka ne.” Amena. “Bino, tubena kuya, nangwa byonkabyo. Apo ketuye!” Twalonga ke tuye. Aleluya! Akyo kyo kine Kyambo kya Lesa. Kika kyamukwachilenga kulutwe yanji? Mulaye wa Lesa, Kyambo kya Lesa. “Atweba tusa kwikalala nako.”

¹⁷⁷ “Fuma mukachi ka bantu bobo, Abulahama. Baji, kintu kine ke, bazhinauka kabiji babula luketekelo. Bakakubika mu lukatazho lumo. Lupukaimo. Iabanye obewa mwine, kabiji wikeele Amiwa.” Kyokika? “Sha kapingu obe yense ne masesi kunyuma yobe, byobya. Shikula muchima obe yense, kabiji vuluka, ke Ami. Iya, wikale ne Amiwa.” Amena.

178 Lesa ubena kwita lukunwa yense wakwa Abulahama, lukeelo luno, ku yewa musango umo wa bumi. Nkondo ikatampe ko iji, ponkapano, ntanda yonse. Lesa usaka bana Banji kwibabanya kufuma kuka? Kumona, kutopa, kukwata, kunusha, kumvwa; Bya kutwelelelamo, kapingu, bya kulabijila, kulanguluka, kufwalama; bintu byonse. Shikulai michima yabo ne kuleka Kyambo kyaiyamo, kabiji ne kuya na Kyambo. Awa ye mwine mushilikale.

179 Ajo jo jishinda ja imenamo tubangabanga. Tachikilo ya bya mwiulu kechi byakingya ne; awa zodyaki. Ntaanda wa kumakya usela pa kifulo kyanji kya mwingilo, kila lukeelo, byonkatu byo aubilenga kimye ntanda po yalengelwe. Ntaanda wabufuku usenda kifulo kyanji; kabangabanga konsetu. Awa Mwela Washasha, kabiji ponka pa kimye kyato, twikalatu ponka po kafwainwa kwikala. Aye Katala Baja wimana kasa ashikama kwakubula kwenda ne. Aleluya! Bintu byonse bizhokoloka konka ku Ntaanda waku Kabeta kabuyeke, ne tosetu twashala, mambo awa uji pakachi ka kyaalo.

180 Awa ye Kilishitu. Amena. Aye wimana popa, ne kukambizha zhita Yanji nobe Kapiteni mukatampe.

181 Nobe Mosesa pa mutumba na maboko anji peulu, kabiji Isalela walwilenga, na kuchibakanya pakachi akwe nakuya, kabiji waimene na maboko anji peulu. Aye waimene na maboko anji peulu poso juba byo jazhikile. Bamukwachile maboko anji peulu. Awa wajinga Mosesa.

182 Aye wajinga kipasha kya Kilishitu. Pakuuba mba maboko Anji ekale peulu, maboko Anji apopelwe pa musalabu. Aleluya! Kabiji Aye wakajijile ndandalashi ya Lukumo, leelo, na byakuvwala Byanji Byamashi kumeso akwa Lesa, ku kilujo kya Bukata Bwanji Konka. Kabiji nkondo, ku yense mushilikale, ukachibakanya jishinda janji. Amiwa kechi nasakamana kika kiyamweka ne; na Kyambo kya Lesa, aye ukekasulula mwine kuya ku bwanabwabene. Amena.

183 Nobe zolo mu jike, ibyepi inge uji na moyo wakusumbila? Ibyepi inge uji na moyo wakusaba jike? Ibyepi inge kazolo ka kacheche mukachi ka jike, kang'onnyi kacheche, kaji na moyo wakupuma ku kibabulwa kya jike? Ibyepi inge wakonsha kumvwa kyongo pangye, amba, "Kechi upume ku kibabulwa kya jike ne, wakonsha kwikozha obewa mwine?" Pakuuba kitemwa akyo kine, kiji mu ng'onnyi, kimubula mba, "Kyase muvumbo! Saba kipeze mu jike."

184 Lekai tubungwe twakala twambe mba, "Moba a byakukumya apita. Usa kwikozhatu obewa mwine. Ubena kuyatu mu kisangajimbwe."

185 Saba konka ku kibabulwa, nangovu yonse. Aleluya! "Satana, fumapo! Amiwa mbena kufumamo muno." Aboyo byokiji. "Aniwa kechi nsakulala muno ne, ne jikwabo. Amiwa

kechi mbena kwikala muno ne, ne jikwabo. Amiwa kechi nji pa kifulo kyakala kya diabola ne. Amiwa mbena kusaba ndupuke, lukeelo luno. Amena. Amiwa ne mpungu.” Amena! Aleluya!

¹⁸⁶ Pakuuba awa mpungu wakala mucheche, aya shingo ya sando kunyuma kokwa, na kusaba ku kibabulwa. Nangwatu kibabulwa kyakosa byepi, kisaba kupulakanya. Kintu kitanshi mwayuka, nanchi, wakonsha kubakama byapi byanji pacheche. Aye wajingatu bulongo.

¹⁸⁷ Saba pa kulupukila. Abyo ibyo. Mwikyuba byepi? Kwikisaba na, “ABYO BYOBYAAMBA AYE NKAMBO. ABYO BYOBYAAMBA AYE NKAMBO. ABYO BYOBYAAMBA AYE NKAMBO.” Pakupezhako, watatula kunusha mwela wawama. “ABYO BYOBYAAMBA AYE NKAMBO.” Uji na mutwe obe walupuka pangye. “ABYO BYOBYAAMBA AYE NKAMBO.” Shijika na ngovu pano, ubena kulupuka!

¹⁸⁸ Aye kechi ubwela jibiji mu kibabulwa kya jike ne. Amena. Aye wakasuluka. Oo, ami! Akya Kyambo inge kyaikalatu panshi, kupita mo onse masesi ne tupingu kabiji ne bintu, pakuuba mba mwikale panshi *papo*, kabiji ne yewa muchima washikula kabiji Wikiswisha. Anweba Lesa, ngubilai lusa! Kechi kujipo kintu kya kwikibika mubuzha jibiji ne. Obewa wakasuluka. Aye yense mwaana ye akasulula wafumamo mu kibabulwa. Dinominesheni obe kechi wakonsha kukubwezha jibiji ne. Aye diabola kechi wakonsha kubapo kintu kikwabo pe obewa ne. Aye wakonsha kwita mulozhi ne kunyinyita, nanchi.

¹⁸⁹ Pakuuba obewa uji Mujishinda jikatampe, kunyema lubilo lwabaya, oo, ami, kunyema mu Jishinda jikatampe ja Mfumu, mushilikale wamusalabu washingwa manyi. Kabiji ke anweba yeka bampungu, na lwitabilo, na kushimuna Yesu, Kyeya kya pantanda, nyema kuya Jishinda jabaya ja Mfumu. Kine. Ee, mwane!

¹⁹⁰ Aye yo “mipashi ingijila,” yatumwa kufuma ku Kyeenyi kya Lesa, kwikala ba mwingilo, kuba mba bengile (kika?) Kyambo Kyanji; kechi bimo bya masukuulu a mamboawama ne, kana Kyambo kya Lesa. Ke mipashi ingijila, yatumwa kufuma kwi Lesa, mu kwingila. Mipashi ingijila! Oo! Kabiji, vulukai, inge kya ingila kintu kikwabo kyapusanako na Kyambo, kechi kyafumine kwi Lesa ne. Mambo, “Kyambo Kyenu kyashinikishiwa Mwiulu.” Kimye kyonse, Mwiulu, Kyambo kya- . . . Lesa wi Kimona. Kabiji Aye kechi ukatumapo mupashi na kwingila kintu kikwabo kyapusanako na Kyambo ne.

¹⁹¹ Aye kechi ukatuma mupashi uji na bikatampe byabaya ma D.D.D., Ph.D., kabiji ne mateneshi obazhalulula kutala kunyuma ne bikwabo biji nobe byobo, kwamba mba, “Kyawama, nangwa byonkabyo, moba abya kukumya apita. Atweba twayuka kyokyo.” Ine, ine. Akya kechi kyafumine kwi Lesa ne. Kyapusanako na Kyambo ne. Amena.

192 Aye utuma boka basapwila Mupashi wa Kyambo. Amena.

193 Oo, Najinga na bintu foolo nangwa faivi bikwabo, bino Amiwa nsakwibileka, ne kutwajijila Pamulungu ubena kwiya. Kijitu bulongo.

Satana ne bademona banji bashingwa manyi.

194 Inge aye mipashi ya bamalaika ya shingwa mu kuleta kwi anweba Kyambo, kwi mulengela anweba kuketekela Kyambo, pano mwakonsha kumona pepi apo pomukomvwa ngauzhi, ngauzhi wakine wa Lesa, kukana Kyambo kya Lesa? [Kipwilo kyaamba mba, "Ine."—Waku.] Ine, mwane. Kika kyamwekele kimye tubungwe twa mujuba jabo byo twaimene na kwamba mba, "Pano, waya mungi"? Aye waimenetu kulubaji lwaji, kabiji waimenetu bunke. Aye waambile mba, "Kijitu bulongo."

195 Monai kwi Mikaya pa joja juba, walang'ana panshi-wazhila muचेचे, monai, mwaana Imula. Kwajinga foolo aduleendi bashingwa manyi, baketekelwa kwikala, bangauzhi bashingwa manyi baimene, bonse bajinshiwenga bulongo, kabiji baikajikwa, kabiji ne madingili abaya akatampe, kabiji bajinga bafunda bingi ne kwikala na fujilo ya peulo. Waambile mba, "Yanga, mfumu wetu wanemekwa. Aye Nkambo ekale ne anweba. Akye kiji kulubaji lwetu. Yoshiwa wikipaine kwi atweba. Nanchi yainga mu kekitambule. Akyo kine ibyo. Yainga mu kekitambule. Kika..." Aye waambile mba, "Kyawama, Yoshi-..."

196 Anweba yukai, Yehoshafwata waambile mba, "Bushe kechi pajipo mukwabo, kuntu kumo nenyi?" Kyawama, bajinga na foolo aduleendi. Mambo ka kyakubula ku ketekela boba foolo aduleendi? Aye waambile mba, "Bino, kine muji na mukwabo umo, kuntu kumo."

197 Waambile mba, "Ami—Ami. . . Kyawama, tuji na umo. Kuji ne mukwabo, bino, oo, Namushikwa." Uu! Mwamona?

198 "Kuji—kuji, awa ye mulumendo ye Nakonsha kutemwa kumvwako, mwamona." Waambile mba, "Muletai kuno. Lekai tumone byo asakwamba."

199 Kabiji baile na kumubula, amba, "Pano, telekai. Busapwishi bobе bwikaletu bulongo, lukeelo luno, mambo usa kusapwilanga ku bamfumu. Obewa usa kusapwilanga ku ba... bonse ba—ba mukabungwe kabasapwishi ba *kananga-ne-kananga*, mwamona, ba mu Palasitani, kabungwa konse ka basapwishi. Bino muvulukai, abye byo baambile. Nobe wambetu bintu bimo. Obewa waketekelatu bintu bimo." Abya bicheche. . .

200 Aye—aye wajinga na muntu ungi popa. Awa muntu wafumamo mu ndangulukilo yakala. Aye wawasha miyemgo mwakulupukila bwishi, monai, kapinguwanji.

201 "Kabiji, kyawama, kika, mwayuka byo basakuba? Inge nobewa usakwamba bintu bimoto, Naketekela basa kukubika

pa kifulo kya bukulumpe pa disitilikiti. Kapepo bakekyuba. Abo ba—abo ba kakubika jenulo ovasiya wa pa disitilikiti kuno, inge anweba mwakonsha—anweba mwakonsha kuswang’ana nabo.” Awa kechi wajinga muntu wakine wa Lesa ne.

²⁰² Kika, miyengo yanji yatokeshiwa, kapingu wanji yense ne byonsetu patoka. Milanguluko yanji yashikukile ku Kyambo kya Lesa. Kabiji Kyambo kya Lesa, kyonka, kyo akonsha ku ketekelatu. Aya mipashi ingijila. Awa ke mupashi wingijila.

²⁰³ Aye waambile mba, “Amiwa kechi nayuka pano bya kwamba ne. Bino, Amiwa mbena kwimubuula kintu kimo, Amiwa sakwambatu kyonka kisakumbula Lesa.”

Nanchi abo bapembejile abwa bufuku. Aye wamwene kimonwa.

²⁰⁴ Lukeelo lwalondejilepo, Nakonsha kufwanyikizha Mikaya keapituluke mu Binembelo kabiji ne kwamba mba, “Pano, twayai tumone. Bushe akya kimonwa... Pano, bonse banabalume, kujipi kintu kimo kyatama pantu pamo, mambo Kyapusanako na kyo baambile. Kawama, Kyaamba mba ka? Twayai tumone kyaambile Elaija kunyuma, aye ngauzhi, mambo twayuka mba wajinga ngauzhi. Monai kika... Akya Kyambo kya Nkambo kyaishile kwi Elaija. Ee. Kabiji Kyaambile mba ka? ‘Kabiji bakabwa bakakabula mashi obe. Yezebeli, bakabwa bakamuja. Kabiji mambo a bololoke bwakwa Ahaba... waoloka Naboth.’” Aye waambile nanchi... Byo amwene kyokya, wamwene mba kimonwa kyajingatu bulongo na Kyambo kya Lesa, nanchi, awa Ahaba wakala wajinga nakyo kyaishilenga kwi aye.

²⁰⁵ Waendeleo kuyako konka, ne kwaamba mba, “Yaingatu. Bino Najikumona Isalela...” Monai aye kechi wajinga na buvu bwa kubulang’ana kimonwa kyanji ne, mambo kyajinga Kyambo kya Lesa. Aye wayukile mba kusenda kyokya kintu mo kyalumbulukila. Kika? Aye washikwile muchima wanji, milanguluko yanji, ku Kyambo kya Lesa, kabiji ne Kyambo kya Lesa kyasolokele kunyuma, nanchi aye wayukile mba akya kyajinga Kyambo kya Lesa kyalumbuluka.

²⁰⁶ Bino, anweba mwamba mba, “Oo, inge Nakonsha kwikala Mikaya!” Obewa wakonsha. Byo uji. Byo uji, ne obewa, mutemwe. Obewa yobe Mikaya, ngauzhi. Wakonsha kuba byepi? Shikula milanguluko yobe. Kika Amiwa kyo mbena kwi mubuula anweba lukeelo luno? Akya Kyambo kya Nkambo. Mwamona? Shikula milanguluko yobe, ne kwamba mba, “Pano, mwayuka, Amiwa Naketekela mba Nakonsha kubukwa.” Kyawama, kyo Kika, pano? Bushe Ke Kyambo kya Nkambo? Kine, Ke Kyambo kya Nkambo.

²⁰⁷ Kabiji *awe* shetu kukwe waamba mba, “Moba abya kukumya apita. Anweba kechi mwakonsha kwikyuba ne *kikye*. Kabiji anweba...” Lubaiko ku kikye. Tangizhaiko Lesa patanshi.

208 Pano Kyambo kya Nkambo kyaiya, kabiji Wikyambile, kabiji Kyajinga byonkabyo.

209 Pano, Satana waubile byepi? Satana wajinga na bakwabo bashingwa manyi. Bino, Satana ushinga manyi bakalume banji. Oo, kine. Uu-uu. Kine. Aye ushinga manyi bakalume banji. Bika byo ebashinga manyi nabyo? Na kubula luketekelo. Satana ne bademona banji bashinga manyi mutundu wa muntu kubula kuketekela Kyambo kya Lesa.

210 Pano, inge mubena kukeba kwikajika kyokyo, anweba zhikulai mu Ntendekelo 3:4. Zhikulitu kokwa ku nyuma ne kuteleka ku kikye, pa ka kimye kamo, kabiji ne kumona kana aya kechi yongubilo yanji itanshi ne. Akya kyo kintu kitanshi kyo aubile. Aye kechi uleka ngubilo yanji imo ne. Aye wikyuba kimye kyonse. Pano, monaitu inge kikye—kikye byokiji. Bino, aye kechi wapachikile na Kyambo ne. Aye wamulengejiletu kwi Kipusanyakotu pacheche, mwayukatu, nobe kwi Kyubatu kyaumvwanika nobe mujishinda aye Jo asakilamo mba kyumvwanikilemo, kechi kusenda kyonse Kyambo ne. Bino, Ntendekelo, Amiwa njinaji papo, Ntendekelo 3:4. Twayai tumone kana byo kyaamba. Kijitu bulongo.

*Pakuba mulolo wamwambijile mwanamukazhi mba,
Ine anweba kechi mukafwa ne:*

211 “Kine kechi mukafwa ne.” Monai byo e kyambwile kwikizhobakanya? “Oo, twaketekela mba moba abya kukumya apita. Atweba kechi twaketekela mba kuji kintu kya kutambula Mupashi Wazhila nobe byo kyajinga pa Pantekositi ne. Oo, mujishinda jiji jonse jo wabatizhiwamo, kechi kijipo nalupusano ne.” Mwamona diabola? Monai byubilo byanji? “Kyawama, inge ba dokotala bakubujile mba obewa ukekalatu bulongo, akyo kyapwisha byonse.”

212 Bino, kechi kulengulula ne, kechi kubula kuketekela dokotala ne. Awa dokotala ubena kwingila mu ndonda ya byasayaasi. Kabiji dokotala wauba byonse byo akonsha kuba, mu kupulusha bumi bwa bantu, kabiji kechi kyakonsha kupuluka ne, mambo kechi kujipo kintu kikwabo kyo ayuka kuba ne. Aye uji pa mpelo ya ng’ambilo yanji. Muntu uji na bukishika. Bino, pano, kinchi kya maana kijitu bulongo, pakuuba inge mwaya palepa po kyakonsha kufika, nanchi ke kufumako ku Kinchi kya Bumi kabiji ne kutwajijilatu. Amena. Byokiji. Kikengilatu kufika pano. Ee.

213 Pano, nga byubilo byakwa Satana? Waamba mbaka papo? Pano monai yabu 1 kabiji ne—ne veleeshi wabu 2. Pano lekai—lekai ami tange veleeshi wabu 1 papo, kufika ne pa 3.

*Pano mulolo wibikijile kujimuka byonse, bilengwa byumi bya mubujimi aye YEHOBA Lesa byo alengele.
Kabiji aye wamwipwizhe mwanamukazhi mba, Ee,*

nanchi *Les*a kechi wimwambijile mba, *Anweba kechi mukajeko . . .ku kinchi kyonse kya mubujimi nenyi?*

214 Telekai kwi aye pano, byo ajinga nabyubilo byatama, kabiji aye—aye byo amvwetele pa Kyambo. Mwamona? Aye. . . Ubena kukeba kuba ka? Kutwela mu milanguluko yanji. Mwamona? Aye ubena kwamba kwi aye, panyuma akya Kyambo kyapewa kala bukikizhi.

215 Pano, kechi muleke Satana amvwete kintu nangwa kimo ne. Mwamona? Obewa ulama Kyambo kya Lesa kasa kyazhijikilwa mu muchima obe. Mwamona? Ne obewa waubatu kintu kimo. Pano tazhisha, anweba ba Mikaya.

. . .*mwanamukazhi wamukumbwile mulolo mba, Ku bipangwa bya ku bichi bya mu bujimi twakosha kujakotu: bino aye. . .*

Pakuuba ku kipangwa kya ku kyokya kichi kya pakachi (pakachi, monai) ka bujimi, Lesa. . .waambile mba, Kechi mukajeko ne, nangwa anweba kukwatakotu ne, kuchina mba mwakafwa.

216 Monai, pano, akyo kyo Kyambo. Aye ubena ku Mupitulukilamo. Pano talai.

Pakuba mulolo wamwambijile mwanamukazhi mba, Ine anweba kechi mukafwa ne:

217 Mwamona bujimuku bwanji nyi? Mwamona? Kika kyo abena kweseka kuuba? Awa muntu mutanshi, ubena kweseka kushinga manyi awa mwanamukazhi kokwa, Mwanawamukazhi wa Lesa, na kubulwa luketekelo lwa Kyambo kya Lesa. Akyo kine kyo abena kukeba kuuba mba obe.

218 Abyo byoasaka mba obewa ube, mutemwe. Abyo ibyo byoeseka kupana ku umo umo amba obe, konkwa, a kushinge maana. Kabiji kintutu kimo kyo wafwainwa kuuba pano ke. . . Obewa wi muntu wakasuluka kuuba kyonse kyo usaka. Bino wakonsha kwi kitambula umvwe ubena kusaka. Pakuuba kipange. Inge Eva kechi waimene pa kyokya kimye ne, kuuba mba ateleke! Kechi wakonsha kwimana patutu ne. Kechi wakonsha kwimana ne.

219 Kimye—kimye Elaija byo abujile Gehazi, waambile mba, “Senda kitambala kyami, yanga ukekiteteke pa mwaana wafwa. Kabiji umvwe muntu uji yense waamba kwi obewa, kechi wafwainwa kumukumbula ne. Inge uji yense waeseka kukukanya, obewa watwajijilatu kuya.”

220 Monai mwanamukazhi byo aichile kalume waji. Aye waambile mba, “Kasulula mbongolo uyenga kulutwe, kabiji kechi wafwainwa kwimana ne kanatu Amiwa na kukambizha.” Abyo byokiji.

221 Inge uji na Mbila, twajijilatu na kuya. Amena. Kwaamba mba, “Amiwa kechi nakonsha kwenda jibiji ne. Ine, Amiwa

mbena kumvwa kukooka.” Twajijilatu na kuya kulutwe. Kechi wakonsha kwimana ne. Shaa bintu byonse kulubaji lumo, obewa twajijilatu na kuchiba kasa uya. Mulongo, uji na poko mukuboko kobe, twajijilatu nakuchibaula.

²²² Naile mukibaza kyapila, kimye kimo, kabiji nailenga na kusapwila. Kabiji Naimene pa kibelo ne kukeketa peulu, peulu popa. Panembwa mba, “Kechi bukata bwa kabwa buji mu kulwa ne. Ke bukata bwa ndwilo buji mu kabwa.” Nanchi akyo kyo kishinda nkondo. Mwamona?

²²³ Anweba mwaamba mba, “Kyawama, talai. Talai pa bipwilo byonse bikatampe byo bashikwa Kikye.”

²²⁴ Amiwa kechi natako muchima na mambo abukata bobaji nabo ne. Ke bulwi buji mu kabwa, akyo kyo kibalwa. Ke lwitabilo luji mu muntu umo. Inge obewa uji na moyo, bwela ukwachishe ku lukasu obe. Bino, mulongo, inge wi mushilikale, imana ponkapa. Popaji nkondo. Kyatama ne kyawama byatwelamo. Twayai tulwe.

²²⁵ Nobe Peter Cartwright, waile mu muzhi umo, ne kwaamba amba, “Nkambo wambujile kwi—kwiya kuno na kwikala na kusangululwa.” Aye wafwetele shitolo mwakulamina bintu mwakala, watwelele mukachi ne kutatula kuwamishamo.

²²⁶ Kabiji mukatampe wanshita muyewa tauni, ne pisito kasa akobeka ku lubaji lwanji, waile konka. Watolele bizhilo. . . Bamo bamwiabo, baambile mba, “Ngawa shetu kika kyo abena kuba konkwa?”

²²⁷ Waabile mba, “Aye ke musapwishi. Usakwila na mbung’eno, byo aabile.”

²²⁸ “Kyawama,” waambile mba, “naketekela Amiwa sakuya konka ne kumutaya mu mukwakwa, kabiji ne kumupanga kufuma muno. Byo byonka. Atweba kechi tubena ku keba mbung’eno paino mpuzha ne.”

²²⁹ Nanchi waileko konkwa, waimikile kizhilo. Kabiji Peter Cartwright wamvwajile kochi wanji, mwayukatu, kabiji aye waomvwelenga mawindo ne bibumba. Ke mulongo wakepa ka mubiji, mwayukatu.

²³⁰ Awa musapwishi wakala ke amuseke, mwayukatu, pa kuja nzolo kwingijisha maboko anji; akyo ke kintu kyayukanyikwa bingi leelo, mwayukatu.

²³¹ Nanchi aye waomvwelengatu ma windo ne kuwamisha patama. Awa wanshita mukatampe watwelele, wandoosele mu konchi wanji, ne pisito kasa akobama ku lubaji lwaji, ne kwamba mba, “Ubeni kuuba kika?”

²³² “Oo,” aye waambile mba, “Amiwa mbena komvwa mawindo.” Kabiji watwajijiletu na komvwa mawindo, mwayukatu. Aye wajinga na nkebelo imo. Lesi wa mubujile kwikala na kusangululwa. Komvwa mawindo, nakuyamotu.

Aye waambile mba, “Atweba kechi tuswisha kusangululwa kuno ne.”

²³³ Aye waambile mba, “Oo, bino Nkambo wambujile kwikala na—na kusangululwa.” Mwamona? Aye watwajijiletu, na kuba kinto yanji. Mwamona? Mwamona?

²³⁴ “Kyawama,” aye waambile mba, “kuji kintu kimo kyo wafwainwa kuyuka.” Aye waambile mba, “Amiwa tangijila uno tauni kuluno lubaji.”

²³⁵ Aye waambile mba, “Oo, byo uba?” Kabiji watwajijiletu na komvwa mawindo, mwayukatu.

²³⁶ Aye waambile mba, “Saka mukyangye kwikala na kusangululwa, wafwainwa kupuma na kamama patanshi.”

Aye waambile mba, “Oo, Amiwa ne kyube nyi? Kyawama, Nsakuba kyokyo nanchi.”

²³⁷ Aye wavujiletu mukukumba wanji. Waile koajinga, kabiji wamukwachile ku teneshi, ne kumutaya panshi, kabiji wakilukila ne peulu panji. Waambile mba, “Nafwainwa kulwa, inge Nafwainwa kwikala mu bufumu. Mvuzhai kushipa kwami, Nkambo.” Fumyaimo manenekela mwi aye.

Waambile mba, “Anweba muji na byavula?”

²³⁸ Aye waambile mba, “Ee.” Aye waimene ne kusukanya kuboko kwanji. Aye watambwile lupulukilo bonkabwa bumfuku, mu kipwilo.

²³⁹ Abyo byokiji. Mwamona? Ke, kutola Kyambo kya Lesa kabiji ne kuchibaula byonse byaluzhinauko. Kimonai? Kine, byokiji. Ao yemwingilo walondelapo, twayai tuleke kyubiwe. Ibyo. Kintu kyalondelapo Amiwa kyo nakonsha kuuba ke kufuma ku luzhinauko, bichibaulai. Ao yemwingilo wami walondelapo, ke kufumyamo byakututwisha. Inge masesi ami ambula, “Kyawama, waumvwa bibi,” kyalondelapo kuuba ke kuchiba kyokyo kintu. Abyo ibyo.

²⁴⁰ Anweba mwamba mba, “Kyawama, anweba...Bambula kyokyo...Mwayukatu, kapingu wami wambula, Mulongo Branham, mba Amiwa...” Kyawama, mwafwainwa kuchiba akyo kintu. Anweba kechi mwakonsha kukila pa kyokyo ne. Monai mba mwingilo obe walondelapo waubiwa. Vulai kochi obe ne kumusenda. Twajijilatu kuya kultatwe. Kintu kimo kyakwimanapo, “Amiwa nsakushinda.” Amena. “Amiwa kechi nakonsha kushindwa ne. Amiwa nsakushinda.” Amena.

²⁴¹ Satana ushinga manyi. Mwamona? Ing’anyi kyubilo kyanji kitanshi? Ing’anyi kifulo kyanji kitanshi pakufikila? Ke milagaluko. Aye waimene pakakimye kacheche, na kuteleka ku byobya byo aambile. “Oo, kechi bamba byobyo ne?”

²⁴² Apo ipo bavula banabakazhi babacheche pobalenga bilubo byabo; ibyo, waimeko pa kimye kicheche, waimenekotu pa kimye

kicheche. Bimye binga Amiwa byo namona mambo akupwa masongola kabiji ne bintu byamweka, pa kyokyo.

243 “Kyawama, Nakubula, Mulongo Branham, aye waichile wiso nobe ‘witi-wi’, mwayukatu, kabiji Naimene, kabiji, wakishika, Amiwa—Amiwa kechi nakutazha momo ne.” Uu-uu. Abyo byokiji.

244 “Oo, aye, Amiwa naikele kubushiya bwa tebulu kufuma kulubaji lwanji. Aye—aye wajinga na meso akila bingi kuwama!” Mwamona? Uu-uu. Mwikimona? Abyo byokiji.

245 Aye diabola uba bintu bimo. “Oo, dokotala wambujile mba Amiwa kechi kekala bulongo, nanchi Amiwa...” Abyo byobyoyo kiji, kintutu kim, monai, nkondo ikatampe ayo yabula kulwiwapo.

246 “Kyawama, bambula mba... Namona *Kikananga-ne-kikananga* bamba mba baji na Mupashi Wazhila.” Ee, mwatajiletu pa kafutufutu wakala umo. Pano ngaboba kine bajinga Nanji? Uu-uu. Ee. Aye diabola ukakutongwela ku kikwangala wakala umo, bino kechi ukakumwasha kunda wakine ne. Uu-uu. Abyo ibyo. Aye kechi ukakumwasha kyokyo ne, kabiji aye ukekifya akya kwi obewa.

247 Oo, aye ke wankondo, ne aye, vulukai. Pakuuba mukatampe ke wetu... “Mukatampe ke Aye uji mwi obewa, kukila yewa uji muntanda.” Bino kwachijilaitu ku Kyambo kya Lesa; Kiketekelaitu, anweba bakapiteni wa mazhita kuno. Kwachijila nsakwa yobe, mulongo. Abyo ibyo, kwachijilai kifulo kyenu kya kwingijilapo.

248 Nanchi, Najinga na songwakazhi mucheche kuno, kimye kimo. Inetu kape waikala muno pakino kimye. Jizhina janji jajinga Nellie Sanders. Kimye kitanshi kyo Namwene demona wapangwamo. Twaikele, pano, inge Nakonsha kutambulatu yoya mpuzha; kabiji ne kwikala bishimikwa bisatu kufuma pano, kupitaila ku bilende. Kabiji po Naiketletu musapwishi, kabiji Nasapwijilenga ponkapono pa kuchipukila, na pwijilo ya mutente.

249 Kabiji awa mwanamukazhi wamucheche wajinga umo waboba bayukile bingi kuzha. Waile ku sukuulu wapeulu kushi kukwe, ne aye kabiji ne Lee Horn. Kabiji bavula ba mwi anweba mutauni mwamuyuka Lee Horn muno, ye uji na luusa lwa mukibamba mwakukaila. Kabiji nanchi abo, aye ne Lee Horn, bajinga bajinga bayuka bingi kuzha mu kyaalo. Aye ke Katolika, aye mwine. Mambo, bupopweshi kechi bwajingapo na kilumbululo kwi abo ne, nanchi pano... Nellie ne abo. Nanchi, mwanamukazhi wajinga wakila bingi mukuzha, kabiji ne aye wajinga, ne aye pamo. Kabiji bajinga na mazha atelwa mba “mbulaki mbotomu,” ne “zhilo yakala,” kabiji bintutu bikwabo. Kabiji aye wajinga... Abo babiji bajinga bakifya mu kyaalo.

²⁵⁰ Juba jimo, aye waishile kuno, bufuku bumo, kwajinga mpwijilo. Apa ipo po aponejile panshi, ku kitapisho, Nellie wamuचेche. Mweo wanji apeshiwe. Walajile ponka pa kitapisho. wasutwile mutwe wanji. Kabiji wajijile, ne mipolo ke ipopoloke kupita pa mabuta anji. Waambile mba, “Billy. . .” Wangyukile ami. Waambile mba, “Amiwa na keba kupuluka, kyabaya bingi.”

²⁵¹ Kabiji Baambile mba, “Nellie, wakonsha kupuluka. Yesu wakupulusha kala, songwakazhi. Obewa wafwainwatu kwikiswa ponkapano monka mwaila Kyambo Kyanji.”

²⁵² Kabiji waikele ponka. Kabiji wajijile, ne kulomba walombele, kabiji wabujile Lesa amba kechi katelekako ku bintu bya muntanda jibiji ne. Ponkapotu, butemwe bwawama bwaishile mu mweo wanji. Waimenepo kufuma popa, kasa abijika ne kutakaika Lesa, na kutumbijika Lesa.

²⁵³ Kabiji pepi nobe sikisi nangwa bang’ondo eiti kufuma popa, waishilenga monka mu Spring Street, bufuku bumo.

²⁵⁴ Pano, songwakazhi mwanyike, wajingatu mu bwanyike bwanji, pepi nobe wa myaka eitiini. Kabiji waishile kwi amiwa, ne kwamba mba, “Hope. . .” Ao wajinga mukazhami, yeka watangilapo kala. Waambile mba, “Amiwa nanchi inge Najinga nobe Hope ne Irene.” Waambile mba, “Mwayuka, abo kechi bailepo mu byantanda ne.” Waambile mba, “Ntanda ibiika kiyukilo pe obewa.” Waambile mba, “Amiwa njina mwekelo yatama.” Waambile mba, “Bino, Nafuminemo mu bya kwipeta-peta ne bintu bikwabo, bino Amiwa mweka bingi kutama. Ne mwekelo yami, mukilungi,” waambile mba, “Mweka kutama.” Waambile mba, “Bamweka bingi kubula mambo kabiji ne bwanyike.” Waambile mba, “Amiwa nanchi inge kechi Naubile kyokya ne.”

²⁵⁵ Naambile mba, “Nellie, Mashi akwa Yesu Kilishitu akutokesha ku mambo onse, mutemwe. Yangatu, kiketekelai.”

²⁵⁶ Wayne Bledsoe, anweba bavula mwamuyuka muno, mulunda nami bingi, kabiji myaka ne myaka. Wajinga utoma. Kabiji waishile muno na mulongo, Edward. Kabiji watomene kuno monka mukwakwa, kabiji Namutolele, mambo bakapokola inge bamukwachile. Kabiji Namuletele kuno. Kabiji Najinga musapwishi ne kwikala naikalanga kuno, ba maama ne bataata, kunyuma kwine Amiwa kasa kyangye kusongola ne. Kabiji Namusendele, ne kumubika pa mwanya mukachi. Amiwa nalajile. . .nalajile pa mwanya wakuchipa. Kwajinga jibumba jikatampe bingi jabena Branham, mwayukatu, twajinga teni. Nanchi twajinga na ma lumu foolo, kabiji twajinga babiji babiji, pacheche. Nanchi, Najinga na mwanya wakala wakuchipa ye Nalalangapo. Namuvungulwile *bibye*, kabiji—kabiji ne kulala ne Wayne pa mwanya umo ne amiwa. Watoma, na musendele kumutwala munzubu ne ku mulajika.

257 Kabiji ne Amiwa nalala byobya. Naambile mba, “Wayne, kechi ubena kumvwa buvu ne, muye musango?”

258 Kabiji aye waambile mba, “Uu, Billy, kung’ambila amiwa byobyo ne.”

Kabiji pano Namubikile kuboko kwami peaye. Naambile mba, “Amiwa nsakukulombelela, Wayne. Lesa akupeshe.” Kabiji Najinga wapuluka pepi nobe, oo, Nalanguluka nobe, kapepo mwaka umo.

259 Kabiji nanchi, ponkapotu, kamo—kamo kamotoka, kepumine mu kizhilo pangye, kabiji muntu umo watatwile kukokosha nangovu. “Mulongo Bill! Mulongo Bill!” [Mulongo Branham wakokosha pa pulupiti—Waku.]

260 Nalangulukile mba, “Ami, buwame, muntu umo ubena kufwa.” Natolokele, akya kibelo; natolele kintu kyami kyakala, ne kumvwala mapajama ami, nobe *bibye*, kabiji ne kumumvweta Wayne, Nanyemena ne kukibelo.

261 Kyaumvwanikile nobe jiwi ja mwanamukazhi. Nashikwile kizhilo, kabiji awe songwakazhi mwanike waimana pa kibelo. Waambile mba, “Oo, Nakonsha kutwela nyi?”

Naambile mba, “Twela mukachi.” Kabiji Naambwile malaiti.

262 Kabiji bino aye wajijilengatu byobya, kabiji waambile mba, “Oo, Billy, Amiwa—Amiwa—Amiwa naya! Amiwa naya!”

263 Naambile mb, “Lukatazho lwepi, Nellie? Obewa uji—uji na kikola kya muchima?”

264 Aye waambile mba, “Ine.” Waambile mba, “Mulongo Bill, Naji kwiyaanga monka mu Spring.” Waambile mba, “Kyakishika, Mulongo Bill! Kyakishika, Mulongo Bill, Amiwa kechi naji kutazha mukuba kintu kiyatama ne. Amiwa kechi naji kutazha mukuba kintu kiyatama ne.”

265 Naambile mba, “Lukatazho lwepi?” Nalangulukile namba, “Kika kyo Nsakuba nanji pano?” Amiwa kechi nayukile kyakuba ne. Ami, najingatu mwanike. Kabiji Na . . .

266 Waambile mba, “Oo, Mulongo Bill,” waambile mba, “Amiwa jitu—Amiwa jitu—Amiwa jitu wasansaika.”

Naambile mba, “Pano, zhindama, nyenga. Mbule byonse byobji.”

267 Kabiji waambile mba, “Kyawama,” waambile mba, “Naishilenga mu mukwakwa, kabiji ne Kishimikwa kya Redman . . .” Kabiji baikalanga na mazha bufuku Pakibelushi monkamwa. Kabiji waambile mba, “Najinga na kisapi, kyo Nailenga namba kasone ndeleshi yami ku nzubo.” Kabiji waambile mba, “Naumvwine kokwa kwimba.” Kabiji waambile mba, “Mwayuka,” waambie mba, “Naimene pa kaminetitu kamo.” Kabiji waambile mba, “Kyatwajijiletu na kumvwanika

bulongo. Nanchi Nalangulukile mba, ‘Mwayukatu, kechi kyakonsha kukozha ne inge Naimana ponkapa.’”

268 Apa ponka po aubile kilubo, waimene pa kakimye kacheche. Aye watelekeleketu.

269 Waambile mba, “Kyawama, Amiwa nsakulangulukapo.” Waambile mba, “Anweba Nkambo, Mwayuka byo Nemutemwa Anweba, nangwa byonkabyo.” Waambile mba, “Mwayuka byo Nemutemwa Anweba, Nkambo. Bino kine Nakonsha kuvuluka kimye Lee ne Amiwa byo twakyombeshanga onse—onse makomoki, ne bikwabotu.” Waambile mba, “Ami, Navuluka aya nyimbilo yakala byo yakebulanga. Pano kechi yuba ne.”

270 Uu-oo, uu-oo! Umvwe walangulukatu amba kechi yuba ne. Yakutana kala, ponkapatu. Akyo kyawamatu monka mo akebela, ponkapatu. Mwamona?

271 Banga bayukile Nellie Sanders? Kyawama, Naketekela anweba bonse muno. Ee. Kine. Nanchi abo—abo bajinga—abo bajinga. . .

272 Amba, aye waambile mba, “Kyawama, mwayuka kine kintu nyi?” Waambile mba, “Kape inge Nakonsha kwenda kuya patampulo peulu,” amba, “kape Nakonsha kushimuna kubamo ba mwiabo.”

273 Oo! Monai, uji kulubaji lwa kifulo kya kwa diabola. Fumaimo mwiakyo. “Kanai mwekelo yonse yabubi.”

274 Bino aye waile ponka, peulu ya tampulo, kabiji waimana ponkapa pa mamineti acheche. Kabiji kintu kitanshi mwayukatu, wajinga mu maboko a songwalume umo, ponka panshi.

275 Apo ipo po abwelele mu milanguluko yanji. Kabiji waimene ponkapa, na kujila ne kutwajijila, waambile mba, “Oo, Amiwa nalubilamo pano, kikaputu. Na . . .”

276 Nalangulukile mba, “Kyawama, Amiwa kechi nayukishatu bulongo pa Baibolo, bino Naketekela mba Yesu waambile kikye, ‘Mu Jizhina Jami bakapangilamo bademona.’” Ami . . .

277 Kabiji Wayne wajijile ne mipolo, pacheche, kabiji waimene ponkapa, na kutajisha. Mwamona? Nanchi Naambile mba, “Pano, diabola, Amiwa kechi nakuyuka ne, pakuuba mbeni kukubula ponkapano, awe ke nyenga yami, kabiji obewa kechi uji na mwingilo wakumukwachijila ne. Aye kechi wajikutazha mu kwikyuba ne. Aye waimenetu pa mineti.” Apo ipo po aubile kilubo kyanji, nangwa byonkabyo. Naambile mba, “Bino obewa usa kufumamo mwi aye. Anweba mubena kung’umvwa nyi?”

278 Kabiji nanchi kwashai, Lesa, pa Kipona Kyabuchibishi bwamambo, mwayukatu. Akyo kizhilo kya magalashi kyatatwile kwishikula ne kwishika akyo kine, pa bunke bwakyo. “Pumpu, pumpu,” apa ponka pa kibelo. “Pumpu, ka-pumpu, ka-pumpu.” Nalangulukile mba.

Kabiji aye waambile mba, “Bill, tala popa. Tala popa.”

Kabiji Naambile mba, “Ee. Kyokika kyo?”

Aye waambile mba, “Amiwa kechi nayuka ne.”

Naambile mba, “Nangwatu Amiwa kechi nayuka ne.”

279 Kabiji kizhilo kyatwajijiletu na kuuba mba “pumpu-mpu, ti-mpu,” na kwishika byobya. Amiwa nalangulukile mba, “Lukatazho lweepi papo? Lukatazho lweepi?”

280 Natajilepo ne jikwabo, byo *bya*. Kabiji Naambile mba, “Muleke, Satana! Mu Jizhina ja Yesu, lupukamo mwiaye!”

281 Byo Naambiletu byobyo, kyamwekele nobe kafifya mukatampe, uji nobe *bibye* bula, waimene kunyuma yanji, na suki yalepa ibena kupepela mu mapi ako kabiji ne kumaulu ako, nobe *byobya*. Wailenga, “Oooooh.” Watatwile kwiya konji, nangovu yonse.

282 Amiwa naambile mba, “Anweba Nkambo Lesa, Mashi akwa Yesu Kilishitu akikizhe ku kyokya.”

283 Kabiji Wayne wakilukile kufuma pa mwanya, ne kukeketa. Kabiji byo kyajinga, nobe kivule kikatampe, kyazhokolokele, kyaile peulu kabiji kyapita kunyuma ya mwanya. Kufuma mushi ya mwanya Wayne waile, mu kibamba kikwabo, lubilo lwabaya. Nanchi atweba . . .

284 Nasendele Nellie ne kumutwala kunzubo. Ne kubwela na bwela, kabiji Amiwa kechi . . .

285 Bamaama batwelelemo ne kusukenya malata ne bintu byonse. Kechi mwajingapo nangwa kimo mushi yayewa mwanya ne. Kyajinga kika? Demona walupukile mwiaye. Kika kyamwekele? Aye waimene pa kimye kicheche. Byo byonka.

286 Kwimana ne, nangwa pacheche ne. Umvwe Lesa watwezha Kyambo Kyanji mu muchima obe, obewa tolatu yoya Poko ne kutatula kuvikaula kabiji ne kuchibaula. Aleluya!

287 “Amiwa kechi njipo na kimye kyakupembelela kintu kiji kyonse ne. Naabukatu kubushiya, kechi Njipo na kimye kyakwikala panshi ne.”

288 Aye waambile mba, “Kyawama, kabiji tola kitambala kyami ne kwikibika pa mwaana. Kabiji umvwe uji yense waamba kwi obewa, kechi wakonsha kwibakumbula ne.”

289 Inge diabola waamba mba, “Obewa, wayuka byo ubena kumvwa nyi?” Kechi wakonsha kwamba nenaji. Twajijilatu kuya.

290 Diabola, mwayukatu, diabola wamba mba, “Bino wayuka kine kintu nyi? Mwayuka, *Kikananga-ne-kikananga*, umvwe banji na Mupashi Wazhila, anweba vulukai mba abo—abo balubakana mu milanguluko yabo.” Kwamba nenaji ne. Twajijilaitu nakuya. Anweba kechi mwayuka ne pe *Kananga-ne-kananga*.

291 Kiji pe obewa ne Lesa. Abyo ibyo. Lama Lesa. Aye ushinga manyi bakalume Banji. Nafwainwa kupelawizhako. Lesa ushinga manyi bakalume Banji. Mwamona?

292 Bino Nafwainwa kukilukapo bino byanembwa papo, pakuuba Nafwainwa kwamba kino. Apo, telekai pano, bulongo.

293 Inetu mucheche, pano teleka bulongo.

294 Apo twamona ng'ingijilo yakwa diabola. Tube byepi? Bino, Njina Binembelo byavula bingi papo, bya bangauzhi ne bintu, apo poaishile kwi abo, kabiji bantu bapusanapusana mu Baibolo, kabiji baubile kintutu kimo. Kimye kyonse yong'ingijilo yanji, ke kweseka kulengela bantu kubula kwitabila Kyambo kya Lesa. Telekai, anweba bashilikale ba musalabu. Umvwe mwabula kwitabila Kyambo kya Lesa kyanembwa mu Baibolo, obewa washalatu kwakubula bilwilo.

295 Waketekela kyokyo, mutemwe?

296 Obewa waikala kwakubula bilwilo. Anweba ipanai, obewa songameno. Mvwala byankondo byonse byakwa Lesa. Amena. Atweba tuji mu nkondo. Kyaambile Lesa kya bukine. "Kyambo kyonse kyamba muntu kya bubela." Mwamona? Bino aku ubatu... wakulengela obewa wateleka ku kintu kimo, ayo yo ng'ingijilo yanji, obewa waangatwa bilwilo.

297 Bintu binga Evwa byo atelekeleko? Kimotu. Aye ponkapotu waangachilwe bilwilo. Kika kyo aubile diabola? Kyapichile monka mu milanguluko yanji, kuya mu mupashi wanji, kabiji ponkapatu waalwilwe ke kingi. Abyo ibyo nyi? Aye waalwilwe mu yekawa mineti po aangachilwe bilwilo, kimye kyo alekele kuketekela Kyambo kya Lesa. Kijitu bulongo. Apano twamona ng'ingijilo yanji.

298 Lesa bashilikale banji bakambizhiwa "Kumvwala byankondo byonse bya kwa Lesa." Abyo ibyo nyi? Pano, inge mukeba kunemba kyokyo Kinembelo, kitanwa mu Efisesa 6:10 ne 13. Mwamona? Twakwikitanga kimye kyapita panyuma. Kyo kibaba kyetu kyalufunjisha. Kijitu bulongo. Monai. "Mvwalai bya nkondo byonse bya kwa Lesa." Twayai... Muji na kimye kicheche nyi? [Kipwilo kyaamba mba, "Amena."—Waku.] Twayai tubwele kunyuma pa kakimye kacheche. Twayai tumone bya nkondo byonse bya kwa Lesa byo biji. Kijitu bulongo. Twayai tutatwile pa veleeshi wabu 10. Pano, telekai bulongo. Twayai tumone bya nkondo byonse bya Lesa. "Pano kyapelako, balongo bami..." Pano, Nayuka mba Amiwa mbena kuya... Amiwa...

299 Ke mamineti tweti, ponkapano, kufika pa twelufu, pepi nobe byonkabyo. Amiwa—Amiwa kechi... Amiwa kechi najikukebanga kwimufunjisha pa kimye kyabaya ne, leelo, bino Amiwa—Amiwa kape kuuba naikala na ikwabo Mbila ne kana imo poso byo Nkafumapo mu malwendo ami a kimye kya kisalo, mwamona.

300 Kabiji mwayuka kine kintu nyi? Mwayuka kyo Mbena kubila bibye nyi? Amiwa nsakwimubula. Aja juba jikwabo Najinga na kiloto. Amiwa inge kechi naji kwi kyamba ne, bino kijitu mu milanguluko yami. Amiwa nafwainwa kwikyuba, kana Nkambo wapa kilumbululo.

301 Nalotele mba Amiwa mbena kwabuka mukola mukatampe, kuya mu mingilo ya mishonyi. Kabiji pano, kitanshi, Najinga kokwa na bakazhi bami. . .

302 Kabiji banga bayuka George Smith, sikisi-wabubiji Smith, muno mutauni? George Smith, songwalume wanji uji mu bukapokola kuno. Aye, kamulanda George, ke kitomi bingi pano. Bino wajinga umo waboba balwanga bingi bulongo. Aye ye wafunjishanga ami, saka kyange ne kuya ku Y.M.C.A. kabiji kuji konse. Aye witufunjishanga. Kabiji wajinga lubilo, lubilo bingi. Aye wajingatu wakinemenezhi kyapela, wa mapaundi aduleendi-fote-faivi. Kabiji wafunjishishe. Kabiji waimananga pa bimye byavula, ne kutaya jikofi janji, byonka *bya*, ne kunyimba munda, wangimika ku kibumba, monai, bino, kabiji kechi kyapangapo kijikila ne. Aye wafunjishangatu, kechi kwajingapo kintu kikwabo ne kanatu nkufunjisha.

303 Kabiji pano Amiwa—Amiwa nalotele, bufuku bukwabo, amba Namona sikisi-wabubiji Smith. Bino, kechi kyajinga kimonwa ne. Kyajinga kilota. Kabiji Namumwene sikisi-wabubiji Smith, bakitwala baiyanga na kumulwisha, mu lwesitilingi. Kabiji aye, awa mwanamulume mukulumpe, pepi nobe, oo, Nalanguluka. . .Amiwa njina fifite-tu. Aye uji pepi nobe fifite-eiti, sikisite. Kechi kwajingapo nangwa bamo balumendo bakonsha kumukwata ne, mu musango uji yense ne. Aye wabavungakanyatu mu kakono, nobe *byobya*, ne kwibalajika panshi ne kwibakwata na maboko anji.

304 Kabiji Nalangulukile mba, “Akye ke kyenyi.” Nalangulukile mba mukazhami wajinga pamo ne amiwa, kabiji Naambile mba, “Akye ke kyenyi.” Naambile mba, “Wayuka kine kintu nyi, Meda? Ye wajinga mufunjishi wami.”

Aye waambile mba, “Na—Navuluka kyokyo, anweba nkumbula pa kyokyo.”

305 Naambile mba, “Ee, mwane. Na lufunjisho lwanji lwawama, Nashijile bulwi bwa kulwila mali bimye fifitiini, kabiji nalekele abwa—abwa busulu; ke kusapwila Mamboawama.”

306 Ponkapotu kyapipwilwe, kabiji Natatwile kwabuka aa—aa meema. Pakuuba kimye kyo Nailenga, Nailenga na bwato bwa ingini. Nakeketele, kwaikele babiji ba mubalongo bami baikala popa, kasa baji mukikondo, kasa benengezha kuya pamo ne amiwa. Amiwa naambile mba, “Anweba kuuba mwauba kyokyo ne, balongo. Uu-uu. Amiwa nafwainwa kuya bunke.”

307 Kabiji uvuwa bwato waishile, ne kwamba mba, “Abuno bo bwato bobo,” kyajinga kikondo kine kine kya pulasitiki.

Naambile mba, “Ine. Uu-uu. Kechi kyokyo ne.”

308 Aye waambile mba, “Kyawama, wakonsha kunyema *kuya* nakyo, fifite mailoshi pa awala umo.”

Naambile mba, “Bino Nafwainwa kwabuka mu *joja* jishinda.” Mwamona?

“Kyawama,” waambile mba, “yanga *nabo* balumendo.”

309 Amiwa naambile mba, “Abo kechi bavuwa mato ne. Abo kechi bayukapo byavula pa kyokyo ne. Baumvwatu lusekelo. Abo kechi bakonsha kuvuwa ne. Bonse babiji bakonsha kuloba. Abo kechi bakonsha kwikyuba ne.”

Kabiji aye waamble mba, “Yobe... wakonsha kuketekela...?”

310 Naambile mba, “Telekai, Amiwa—Amiwa nayuka bya mato kukila byo bayuka, kabiji Amiwa kechi nakonsha kwi kyendesha na kyokya ne, na bingijisho bya musango yewa.” Naambile mba, “Kyafwainwa kwingijisha bwato bwa ingini pakuuba mba wabuke kyokya.” Naambile mba, “Kisenda kyabaya kukila pa kyokya.”

311 Kabiji Namumwene kasa akeketa na kuzhokoloka, ku umo mulongo, ne kwamba mba, “Obewa wiuvuwa bwato nyi?”

Balongo baambile mba, “Ee.” Mwamona?

Naambile mba, “Akyo kyatama.”

312 Kabiji uvuwa bwato wabwelele. Aye waambile mba, “Kubule byo usakuba.” Waambile mba, “Bakutemwa. Bakuketekela. Bino,” waambile mba, “inge wakeba kwabuka na bwato bwa ingini, bakakulondela mu bwato bwakikondo. Bonse babiji bakafwa, mwamona.” Waambile mba, “Kechi bakonsha kukulondela ne.”

Kabiji Naambile mba, “Kyawama, kika kyo Nakonsha kuba?”

313 Kibiji awe uvuwa bwato pa kitulu, waambile mba, “Obewa ubwele kunyuma *kokwa*.” Waambile mba, “Kujitu imo nzubo mwakulamina bintu mukino kyaalo kyonse, imo nzubo ya icheche mwakulamina bintu. Kabiji bikaitu bipe byavula,” waambile mba, “ne abo bakekalatu ponkapano. Abo ba—abo bakekala kuno obewa kasa—obewa kasa waya. Bino,” waambile mba, “wafwainwa kubikatu bipe byavula.”

314 Kabiji Nabungizhengatu misango yonse ya kabiki, ne myungu, ne makalota, kabiji ne bikwabo, ne kwibilumbika byobyaya. Apo Amiwa po nabukile.

315 Amiwa kechi nayukile mokyatala ne, pakuuba pano Nayuka. Monai, tubena kuleta bipe, balongo. Abwe ke bumi bo wafwainwa kwenda bunke bobe.

316 Leo, wavuluka akya kiloto kyo wajinga nakyo akya kimye kitanshi kyo waishile kuno? [Mulongo Leo Mercier waamba

mba “Amena.”—Waku.] Pa pilamenda, kabiji walangulukile mba ukatwela momwa. Naambile mba, “Leo, kafwako nangwa muntu umo ufika kuno ne. Lesa ye wafwainwa kubika muntu pano peulu. Wakajijile kibese kyonse kya bumuntu kya konsheka kukajila.” Naambile mba, “Obewa kuba waiya kuno ne, Leo. Mwamona? Bwela panshi. Kabuletu bantu mba kyafuma kwi Lesa.” Mwamona? Mwamona?

³¹⁷ Ke kintu obewa kyo—kyo wakonsha kubula kuketekelamo, byo bawama balongo ne banyenga, ne kipwilo kyami kabiji ne bintu byonse, kabiji kuwama kwawama bipwilo bikwabo, ne balongo, konse konse.

³¹⁸ Pano, Amiwa kechi nakonsha kuleka kutanwa kuno ku kipwilo ne. Muntu umo waamba, “Kyawama, kika kyo uyila pamo na boba bantu, ba Ketekela mu wiabanya pasatu, byonse *bye, abya*, kabiji ne *bikwabo*, kabiji ne ba Oneness, ne ba Jesus Name, kabiji ne byonse bintu bijiko? Kika kyo ukwatakena pamo nabo, nangwa pachechetu?” Bami bo. Nangwatu bobo kyamusango ka, ke bami. Bo bapulupiti wami.

³¹⁹ Kimye Isalela kyo baubile bubi bukampe, poso Lesa wabula ne Mosesa, mba, “Ipatuleko obewa mwine. Amiwa katatula upya—upya mukoka ne obewa.”

³²⁰ Mosesa witaile aye mwine mujishinda, ne kwamba mba, “Kasa Anweba mukyangye kwibasenda, sendai amiwa.”

³²¹ Nangwa bobetu kyamusango byepi, ibo Amiwa bobatumako. Aye utuma Kyeya, kechi kusama akwa kuji Kyeya ne. Akwa kuji mfishi, akwa ko kulubaji lwa Kyeya. Kabiji wafwainwa kufwenya ku bantu. Wafwainwa kwimana nabo, nangwa kikale byepi, wafwainwa kuuba, monka mukilubo kyabo.

³²² Isalela walubakenye monka mwaila kulubakanya. Balubakenye bingi poso Lesa wibalekelako. Bino, Mosesa, kimye yonse Amiwa kumya byo kyaubilwe kyokya, kana yenka Mupashi wa Kilishitu wajinga mwi Mosesa. Mwamona?

³²³ Mwamona, atweba bonse twalubakanya. Aye waimejileko atweba bonse kimye kyo twajinga mukilubo.

³²⁴ Nangwatu bekale mukilubo byepi, kechi twabane nabo nangwa kwikanya atweba bene na kintu kiji kyonse ne. Kikulutu twakonsha kuleta mweo, twayai tuyemo na “kujimuka nobe mulolo, kabiji wabula kintu nangwa kimo ne nobe kunda,” monai, kabiji esekai kuleta mweo yense ye twakonsha kuleta.

³²⁵ Pano, akye Kyombena kwamba lukeelo luno, ke kufya Kajo. Kufya Kajo, pakuuba mba wikale na bya kuja, pakuuba mba wikale na kintu kimo kya bukijilo. Kitana pa matepu. Ikalai mu kibamba kyatalala. Kapepo, Amiwa inge njikwalepa, anweba mukatwajijila bibye bintu mba byakine. Ikalai mu kibamba kyenu ne kuteleka. Mwamona? Kabiji ako ko Kajo, kufya, mu butala. Amiwa kechi nayuka kuji lulwe lwendo ne, bino, konse

koluji, Aye wayuka ko Abena kutangijila; Amiwa kechi nayuka ne, Amiwa ndondelatu.

³²⁶ Pano, waamba mbaka papo? Telekai bulongo.

Pano kyapelako, balongo bami, ikoseshainga mwi Nkambo, ne mu ngovu ya bulume bwanji.

. . . ikalai bakosa . . . mu ngovu ya bulume bwanji.

Vwalai byonse bya nkondo bya Lesa, namba anweba mukonshe kwimana saka mwakosa ku bya bujimuku bya diabola.

Mambo kulwa kwetu kechi kwa kulwa na bamibiji ya mashi ne, . . .

Kuloza masaase ne kuchiba na mipenyi, monai, akyo kechi ikyo ne.

. . . poso na bakatampe bene, ne baluusa, ne bamfumu ba ino . . . mfishi ya pano panshi, . . .

³²⁷ “Bamfumu bamfishi.” Bang’anyi batangijila ntanda? Aye diabola. Kyakine. Ng’anyi ulengela byonse bye kutwajijila, byonse bye bya bumbulwa koloka bibena kubiwa, kuzhokoloka konse konse, monse muno, kabiji atwe tufulumende, ne bikwabotu? Byonse ke diabola. Aye Baibolo byobyobyamba. Aye diabola utangijila mu United States. Aye diabola utangijila Germany. Aye diabola utangijila kyaalo kyonse pantanda. Mbena kwiya ku kyokyo, mu mamineti achechetu, kabiji tusakutana kana byo oba, nangwa ine. Kana . . . Bufumu bonse bwaikalako kabiji ne bukekalako, poso Lesa waimika bufumu Bwanji, butangijilwa na diabola.

³²⁸ Amiwa kechi natazha mu kubamba muntu yense ujimo ke diabola ne, pakino kimye. Muji bantu ba bulesa mu—mu maofweshi a kafulumende.

³²⁹ Musakwikala umo muno mu mafuku acheche, monka muno, mu kumweshi kipikichala muno na Mulongo Arganbright, pa kino kifulo. Aye wajinga tomesha wa bandamabyalo faivi bapusana pusana, Mulongo Rowe. Kabiji aye . . . Ukekala kuno, Naketekela mba pepi nobe mulungu wabubiji wa Mulombola. Mulongo Neville usa kubijika. Kabiji aye ke muntu wawama bingi.

³³⁰ Aye waambile mba wakonsha kwamba mu milaka eiti yapusana pusana, Naketekela. Bino aye byo atambwile Mupashi Wazhila, kechi wajingapo na mulaka wakwambilamo kwi Nkambo ne, nanchi Nkambo wamupeletu umo, byo aambile, nanchi aye waambile kwi Aye na yekawa umo. Wamupele mupya, ao ye abujile kufundapo. Kijitu bulongo.

. . . bapashi babipa ba mwiulu.

Onkao mambo . . .

331 Pano telekai, anweba bonse bashilikale, saka tukyangye kutatula mulaini wa kulombelela.

. . . shikulai abya . . . byenu (b-y-o-n-s-e) byonse (kechi lubaji lumotu ne) . . . byonse bya nkondo bya Lesa, namba anweba mukonshe kwimana kasa mwakosa mu juba jibi, . . .

Aje ke juba jo tubena kwikalamo.

. . . kabiji ne pa kupwisha kuba byonse, kasa mwaimana ponka.

Mwaimana . . .

332 Amena. Wikyumvwa nyi? Wamona, mutemwe? Byonkabyo pa kupwisha kuba byonse, kasa mwaimana ponka. Kwenda ne.

Byonkabyo imanai, kasa mwanyingisha mu bifuka byenu . . .

333 Telekai ku kikye. Telekai kuno, kyo kika kye. “Mukifuka kyenu.” Alo lo lubaji lwa pakachi, apo, monai.

. . . kasa mwanyingisha na bukine, . . .

334 Nga Bukine bobuka? Kyo Kyambo kya Lesa. Abyo ibyo. “Kyambo Kyenu bo bukine.” Kijitu bulongo.

. . . ne kuvwala kyela kya pa kyaji kya bololoke;

335 Ko kuuba mba, “Ubai bya oloka.” Muji na Kyambo kya Lesa mwi anweba, kasa muba bya oloka. “Kyela kya pa kyaji kya bololoke.”

Kabiji ne kuvwala ku mauu enu makwabilo a kutengela jimo mambo awama a mutende;

336 Yainga kuji konse, mpuzha iji yonse, kimye kyonse, mauu kasa avwala Mambo awama. Mwamona? Kabiji talai:

Kabiji pa byonse, pa byonse, mushikule jikebo ja lwitabilo, . . .

337 Ijo jipapula miketo, monai, “Jikebo ja lwitabilo.”

. . . jakuleyelamo miketo ya mujilo yonse ya kwa aye mubi.

Kabiji mutambule kipopo kya lupulukilo, . . .

338 Ao ye mweo . . . Yo milanguluko—yo milanguluko, mukachi mwe, mutwe; umvweta mutwe.

. . . kabiji ne—kabiji ne poko ya Mupashi, kyo Kyambo kya Lesa:

339 Musa kulekelelako byepi awe kapopo, kyuba byepi? Ke bukikizhi. Kipopo kyalengwa kuka? Lubemba. Lubemba kechi bakonsha kwikikokomeka ne; kyakosa, kyakosa kukila kyela kya kapotwe. Kivwalo kya lubemba kya ku mutwe, (kyo kika?) lo lupulukilo, maana a kuyuka kikye, “Kabiji lubuko lwami lufuma kwi Lesa. Lupulukilo lwami lufuma kwi Lesa. Byakupitamo

³⁴⁸ Mwayukatu, anweba mwafwa. Bumi bwenu bwafiwa. Kyokika *kufwa*? Obewa wafwa ku masesi obe. Obewa wafwa ku kapingu obe. Kuswa kwa bumuntu bobo kwakonsha kwamba mba, “Ee, Naketekela Amiwa . . .” Kufwa ku milanguluko yobe. Kufwa ku byonse bye bintu. Kabiji wazhikwa mu Jizhina ja Yesu Kilishitu; kabiji ne kusanguka Nanji. Kabiji konse konse koanji Aye, ne obewa uji konka.

³⁴⁹ Kika kyamwekele kwi abo, umo waboba bazhinauka, byo afikile Mwiulu? Lesa wamupangilemo. Kabiji kika Aye kyoaambile ku bashilikale aba basangukila mwi Kilishitu? “Inge diabola waiya, mupangai. Mupangaimo.” Kimye Yesu kyo afunjishe zhita Yanji, ne kwibatuma konse konse kwapela ntanda, “Yainga pano pantanda ponse, na kusapwila Mamboawama ku bilengwa byonse. Aye waitabila ne kubatizhiwa ukapuluka; aye wabula kwitabila ukazhatwa. Kabiji abye biyukilo bikebalondela baitabila, bashilikale Bami. Mu Jizhina Jami bakapangilamo bademona; kwamba na jimi ipya; mukatola milolo, nangwa kutoma bintu bifwana, kechi bikemubeleka ne; inge bateteka maboko abo pa bakolwa, bakakosa.”

Twayai, Benakilishitu bashilikale!
Kuya ku nkondo,
Namusalabu wa Yesu
Kasa antangijila.

³⁵⁰ “Amiwa nampopwa Nanji pamo, nangwa byonkabyo ne Mumi; kechi ke ami uji na bumi ne, kana Aye wikala na bumi mwi ami.” Akya Kyambo kasa kibena kuya, kulutwe, Lesa kasa abena chibaula, na Poko Yanji yatwa-kubiji.

³⁵¹ Nanchi, kechi kyakukumya ne, kimye Grant kyo atambwile Richmond, kabiji ne yewa mwanamukazhi muचेचे mubiji waku kabeta kabulenge ubena kwiya, mupashi wamukwachile. Kabiji waambile mba:

Meso ami amona lukumo lwa kwiya kwa
Nkambo;
Aye ubena kunyata majimi amo magelepu a
bukaji mo abikwa;
Aye walekelelako kubesha kwa lutwe lwanji na
kwiya Kwanji kwakatazha kwa na Poko ya
lubilo;
Anji mazhita abena kwiya.

³⁵² Amena. Nga Grant waangachile byepi Richmond? Ponka pa kwiyatu konka. Amena. Abyo byo aangachile Richmond.

³⁵³ Abyo ibyo bashilikale ba Lesa byo boba na bubu, misongo; ponka pakwiyatu kwi akyo. Amena. Abyo byo byo bashijile luzhinauko lwabo, ne moyo, ne bikwobotu. Umvwe umo waimana, bamuchibaula. “Mfumamo mu jishinda!” Oo, ami!

Byokiji. Lesa wibapangamo, nobe Aye byo aubile Mwiulu. Wetu Kapiteni Mukatampe witumwesheshe byo kyubiwa. Amena.

³⁵⁴ Roy Roberson ne Mulongo Funk, ne anweba bavula bakala muno, mwayuka mwine kapiteni byo aji.

³⁵⁵ Kimye kimo Amiwa... akye kipamo kicheche kitala pa mujilo mu Jeffersonville muno. Pfau mpuzha yanji yakwachilwe na mujilo. Kabiji kipamo kitala pa mujilo mu Jeffersonville kyafikile popa, kabiji ne kapitawa waendaukilenga na kuzhokoloka, waambile mba, “Sansa meema acheche peulu *papo*.” “Sa-sa-sa-sa,” nobe jitumbo jajicheche papo. Pano kwaiya ba ku Clarksville, “Sansa meema acheche *papo*.” “Sa-sa-sa.” Pfau kishimikwa kyanji kyaapile.

³⁵⁶ Baichile ba ku Louisville. Pano baiya bantu bafunjishiwa. Oo, aa mambelu ajijile konse konse!

³⁵⁷ Kabiji aye kapiteni mukatampe waiya mwine, wa kikye kipamo kitala pa mujilo, ne kwamba mba, “Sansa meema acheche peulu *papo*. Sansa meema acheche panshi *papo*.” Bantu babulwa kufunjishiwa.

³⁵⁸ Mulongo, ponkapotu motoka byo aimene, ng’anyi watangijilepo pa ndandalashi? Aye kapiteni. Ndandalashi byo yatwajilwe peulu, aye waile nayo. Byo alajile windo, aye saka akyangye kufika ku windo ne. Watolele katemo kanji ne kwikataya kupita mu windo, ne kwaamba mba, “Twayai, basongwalume.” Kabiji ne mujilo wazhimine, mu maminetitu acheche. Kapiteni!

³⁵⁹ Kechi kapiteni, kwamba mba, “Sansa meema acheche *papo*. Eseka pacheche *papo*.”

³⁶⁰ Pakuuba, “Iyai, basongwalume!” Amena. Aye wantangijile jishinda. Witumwesheshe byo kyubiwa.

³⁶¹ Nalangulukile mba, “Akye ke kipamo kya mujilo kyafunjishiwa-bulongo, bazhimishe mujilo mu mamineti achechetu.” Kika? Bajinga na kapiteni ao wayuka byo aubilenga.

³⁶² Mulongo, ambai pa bya kufunda masukuulu pa mamboawama mo musakila. Madinominesheni enu alengwanabantu, tubungwe twenu: Kayainga nabyo.

Amiwa nji na Kapiteni Mukatampe ao wambujile mwakwikyubila.

Kwamba mba, “Kyawama, inge Nakonsha kwikinusha, kwi kyumvwa.” Oo, kechi muji maana ne!

³⁶³ Aje jo jishinda Kapiteni Mukatampe waambile mba byo kyubiwa, mu Luka kyapitala kyabu 4. Amiwa kechi nji nakimye kya kwikitanga ne. Kitangai, anweba bene. Kijitu bulongo. Luka kyapitala kyabu 4, kutatwila pa veleeshi 1.

364 Aye kechi waambile mba, “Pano Amiwa ne mubuula. Yainga *kukwe* kabiji mukalenge kabungwe kakatampe ne. Anweba ikalai na bakulumpe, ne badikoni, kabiji, nangwa mwikale na makadino, ne mambishopu, ne kwikala ne *bibye*.” Aye kechi waambile byobyu ne.

365 Kimye Satana kyo amukumenye Aye, waambile mba, “Pano Obewa wafwa zala. Alula ao mabwe ke shinkwa.”

Aye waambile mba, “Kyanembwa mba . . .”

366 Aye waambile mba, “Pano peulu, tusa kukutwala peulu papo ne kukumwesha Obewa kintu kimo.”

“Bino kyanembwa mba . . .”

“Amiwa koba *kikye*, inge obewa wikyuba.”

“Kyanembwa mba . . .”

367 Abyo Kapiteni Mukatampe byo aambile mba byo kyubiwa. Kyubiwa byepi, nyenga? “Kyanembwa mba, ‘inge bateteka maboko pa bakolwa, bakakosa.’” “Kyanembwa mba, ‘Mu Jizhina Jami bakapangilamo bademona.’” Amena. Kyokika? “Kyanembwa mba!” Ayo yo mikambizho ya kwa Kapiteni. “Kyanembwa mba, ‘Yense umvwa Byambo Byami ne ku mwitabila Aye watuma Ami, uji na Bumi Bwapeenape.’ Kyanembwa mba! Kyanembwa mba! Kyanembwa mba!” Ayo yo—yo mikambizho. Ao ye mushilikale. Ajo jo jishinda. Abyo byo bilwilo byo twenda nabyo.

368 Waubile byepi? Aye waile konka kwa, kwi Golyata. Aye wamwesheshe . . . Nga dauida wamwesheshe byepi mazhita byo kyubiwa? Nga Dauida wamwesheshe byepi Isalela byo kyubiwa? *Dauida* kyalumbulula mba “watemwikwa, mupulushi.” Mwamona? Nga Dauida wi kyubile byepi? Aye waambile mba, “Ajino jo jishinda ja kwikyubilamo. Ketekelaitu mu Kyambo kya Nkambo.”

369 Kabiji Golyata waishile, ne kwamba mba, “Mwayuka nyi? Amiwa nsakukutola kupelo ya jije jifumo, kabiji ne kukujisha ku bang’onyi.”

370 Aye waambile mba, “Obewa wakumanya nobe kabungwe. Obewa wakumanya nobe wamasayaasi wakatataka. Obewa wakumanya na poko yobe ya fotiini-futu ikatampe. Obewa wakumanya na kipopo kyobe kya lubemba, ne na jikebo jo Nakonsha kubula kushikula kufuma panshi. Obewa wakumanya nobe mushilikale wafunjishiwa. Obewa wakumanya na Ph.D., ne na L.L.D., kabiji ne abiji ma-L.D. Obewa wakumanya mu byonse bye bintu. Pakuuba Amiwa naiya mu Jizhina ja Yehoba Lesa wa Isalela, kabiji leelo Amiwa nsakukuchiba mutwe obe kufuma ku mapuzhi obe.” Amena. Aka ka kintu kacheche kwiya na kulwa na kilobo, bino wayukile po aimene.

Isalela, kasa abena kuzakamatu kunyuma, “Oo, kamulanda mulunda mucheche.”

Golyata waambile mba, “Nsakukumweshwa byo Nsakuba.” Kabiji ke eye ne kwiya.

³⁷¹ Aye wajinga na l-w-i-t-a-b-i-l-o, mwamona, m-w-i Y-e-s-u, mabwe faivi, mabwe faivi. Kamo kajibwe momwa, ka kutatwilapo. Kwijishumba na kuzhokoloka byobya, Mupashi Wazhila wakwachile jibwe, kabiji byobyo jaile. Golyata byo apone ne panshi. Abye byo kyubiwa.

³⁷² Ajo jo jishinda Yesu joaambile mba, Aye kyo aambile. “Pano, inge anweba balongo mubena kuya mu mwingilo, inge mukeba mwakushijila babo bademona, Amiwa nsakwimumweshwa mwakubila.”

³⁷³ Satana waambile mba, “Amiwa nsakukukumanya.” Golyata, “Amiwa nsakukumweshwa Obewa byo Nakonsha kuuba. Obewa wafwa zala. Inge Obewa wi Mwaana wa kwa Lesa, Amiwa na kununusha Obewa. Obewa wamba mba Amiwa ne Mwaana wa kwa Lesa. Amiwa nakununusha Obewa. Inge Obewa wi Mwaana wa kwa Lesa, alula ao mabwe ke shinkwa. Ja; Obewa wafwa zala. Kabiji umvwe wi Mwaana wa kwa Lesa, Obewa uji na ngovu ya kwikyuba.”

³⁷⁴ Aye waambile mba, “Pakuuba kyanembwa mba, bino, ‘Muntu kechi ukekelatu ku kajo konka ne.’” Oo, ajo jojishinda Kapiteni Mukatampe mo ekyubijile.

Wamutwajile Aye peulu ya jinkoka ja nzubo ya zhila. Aye waambile mba, “Inge Obewa wakonsha kwitaya Obewa mwine panshi,” waambile mba, “Obewa wayuka mba ne akyo kyanembwa mba . . .”

³⁷⁵ Aye waambile mba, “Ee.” Amba, “Kyanembwa, ne jikwabo, ‘Obewa kechi ukeseke Nkambo Lesa obe ne.’” Monai Aye byo etelele Aye mwine? “Aye Nkambo Lesa obe.” Uu-uu. “‘Obewa kechi ukeseke Yehoba Lesa obe ne,’ kyanembwa, ne jikwabo, byonkabyo.” Mwamona? Oo, ami!

³⁷⁶ Waubile byepi Aye? Aye wamushijile, na Kyambo kya Lesa. Ng’ingijilo yakwa diabola ke ku kulengela obewa kubula kwitabila Kyambo kya Lesa. Kabiji Kapiteni Mukatampe waambile mba, “Tolai Kyambo kya Lesa ne kwi Kyuba. Mu Jizhina Jami bakapangilamo bademona.”

³⁷⁷ Oo, Satana, kapiteni wabo mukatampe, oo, ee, mwayuka, bamo ba ao madinominesheni beseka kubulang’ana mba uji na mukono, mwayukatu, kabiji ne mukila waabanapo, kabiji ne byonse bya bintu. Kechi mwi biswe ne. Aye kechi uji mu yewa musango ne. Ine, mwane, mulongo. Aye wabujimbijimbi. Kechi muketekele mba aye uji na byobyo ne. Bobatu byobyo mu kuleta kichinya kwi anweba. Awa kechi ye diabola ne. Diabola kechi uji na mukono ne, kya kutatwilapotu; Amiwa ne kizhinauka bingi. Aye ke mupashitu. Aye diabola ke mupashitu. Aye kechi uji na mikono ne bintu biwabo ne, nobe byonka byo mulanguluka. Ine, ine.

378 Bino, aye wajimuka. Mulongo, aye ke muntu wajimuka, wafunda kufikapo, kimye kyonse byoaikala, mu maana a muntanda. Oo, ee. Aye walamba. Ubungizha mazhita anji na maana a muntanda, poso, mulongo, kechi wakonsha kweseka—kweseka kwamba byambo byobe ne. Obewa wafwainwa kuyuka kyo ubena kwambapo inge wakumanya umo wababo bantu, baamba mba, “Moba abya kukumya apichile kala.” Ine, aye kechi uji na—aye kechi uji na mukono waabanapo ne. Aye, oo, aye—aye—aye popo afumatu kusukuulu. Aye wapeulu, mulongo. Natazha mu kuuba mba, aye wajimuka, Ph.D., L.L.D., Q.U.S.T., ne byonse byashala. Mwamona? Byonse monka mwa, aye wajimuka bingi byonka byo afwainwa kwikala. Wa maana, kine, aye ye mulolo, wajimuka bingi mu bonse. Suki yafika ne panshi, mulongo, kabiji, Natazha mu kuuba mba, mu vwajilo, kabiji kechi muji mikonya mu konchi ne. Wajimuka, wamaana ne kujimuka byo akonsha kwikala. Abyo ibyo.

379 Kechi wakonsha ku mukosamika ne kana wayuka kyo ubena kwambapo. Abyo ibyo. Oo, bino twayuka yanji yakala—yanji yakala nyingijilo. Twayuka kyo abena kusaka kuuba: kwitulengelela atweba kubula kwitaba Kyambo kya Lesa.

380 Kabiji kechi uji na mikono yafutuka ne. Ine, ine, ine. Pano, twatana kua mba inge kechi uji na mikono yafutuka ne, nanchi wafwainwa kwikala kintu kingi. Aye mujimbijimbi. Aye uji maana, wafunda, uji mu bukabungwe. Mulongo, aye uji nazhita yanji.

381 Monai, kimye kimo, amwa mu Switzerland. Amiwa kechi namwenepo mpuzha pa kwimana ne, balunda. Kuji ka—ka... Amwa mu Switzerland, kwaishile mazhita abena German, na kufo-... ne bamubyaalo bingi baishilenga. Kika, kyamwekelenga nobe kibumba kya mambilikisi kyashimikwa; muntu yense wafunjishiwa, kila jifumo jaikele *bibye*, eiti nangwa teni fiti kulutwe. Kabiji bafikile ne ku mwina Swiss kamulanda kokwa, kika kyo bajinga nakyo? Abo bilwilo byabo byajinga bya—byajinga mipenyi yafuma ku bikwakwa byakuyokolako nsono, binchi ne mabwe, kabiji byo byo baimene. Kwajinga ba kwibakwasha. Bushiyatu bwa katumba kwajinga mizhi yabo. Apo mazhita abena Swiss baile na kwibakumanya. Kafwako nangwa kimo kyo bebobile ne. Baishiletu na kutambula ntanda yabo.

382 Kika mu ntanda kyo auba awe mwanjike, mwanjike mwine? Satana, byo byo anji, wakonsha kusenda bumi bwanji inge wakonsha. Kyakine. Abyo byo anji; mu kimye kyabula kufikilamo. Mwamona?

383 Mwina Swiss kechi waubilepo kintu nangwa kimo ne. Bajingatu bantu bawama. Abo baesekelenga ku kikizha mizhi yabo, bino baimene kokwa na kupana bukikizhi. Pakupitapo kimye, kwajingapo umo wajizhina ja Arnold von Winkelried.

Yaiya zhita yanji. Bajingatu bazhokolokwa bonse. Waambile mba, “Kika kyo tusa kuuba?”

³⁸⁴ Konse konse, kwajingatu banabalume bavula, bafunjishiwa-bulongo. Abye Satana byo ekyuba. Bafunjishiwa-bulongo, jifumo janji jatongolatu bulongo, kila muntu wajinga mu tampulo: wanu, tuu; wanu, tuu; na kuyuzhamotu muzhita yanji icheche. Abo—abo batwajijiletu na kwenda, byo byonka byo baubilenga, kabiji bebasendelengatu, bonse, na mapoko. Mafumo apichilengatu mukachi kabo. Akyo kyafwaijilwe kupwisha zhita yabena Swiss. Kyafwaijilwe kwikalatu bonse. Konka kubushiwa bwa mutumba ko kwajinga manzubo abo ne batemwe babo. Banabakazhi babo inge balengelwe mambo ne kubilwa byatama, kabiji ne banababo banyike babakazhi, ne baana babacheche kwipaiwa, kabiji ne manzubo kusokwa, ne bintu byonse, kajo kusendwa, bang’ombe ne bintutu, kuya. Abye byo bajinga.

³⁸⁵ Kika kyamwekele? Lutundaiko lwa mupashi lwakwachile umo wajizhina ja Arnold von Winkelried. Aye waambile mba, “Banabalume bena Switzerland, jino juba Mbena kufwila Switzerland.” Amena. “Jino juba Mbena kufwila Switzerland.”

Baambile mba, “Kika kyo usa kuba?”

³⁸⁶ Aye waambile mba, “Anweba ndondelaingatu ne kulwa nabyonse byo muji nabyo.” Aye waimene popa; wataile jifumo janji panshi, ne ka kinchi ko ajinga nanko mu kuboko kwanji, nobe *byobya*. Kabiji wabijikile, na maboko anji asutulwa peulu, byonka *bya*, kabiji ne kunyemenako, kasa abijika mba, “Lengai jishinda ja bwanabwabene!” Wanyemene na ngovu, kuya konka ku mazhita. Kabiji, byo aubile byobyoy, watolele onse mafumo oa konsheshe kutola, ne kwi ataya monka mu kakuji kanji *byobya*, ne kufwa wafwile.

³⁸⁷ Aye wibabujile, kasa akyangye kuya. Waambile mba, “Kuji kanzubo kacheche kokwa, mukazhami ne baana babacheche bo Mbena kusha, ne kanzubo kacheche ko Napotatu.” Kabiji waambile mba, “Amiwa—Amiwa ne batemwa, bino, leelo, Mbena kufwila Switzerland. Aye wapaine bwami...” Aye waambile mba, “Napana bumi bwami mu kupulusha kyaalo.” Kabiji awa waikele ke kilobo. Abo bakyangye kwikalapo na nkondo kufuma pa kyokya kimye. Akya, akya kibipwishishe.

³⁸⁸ Kyaonawine aya zhita, na bobwa bu kilobo bo amwesheshe, poso kechi kwajingapo. . . Aa—aa mazhita avundakeene. Bena Swiss bebalumwijile mabwe, ne kwibapangamo mu kyaalo; kabiji kechi bakibwelako kufuma pakyokya kimye ne. Akyo kyajinga myaka pano ke maaduleendi apita. Mwamona? Kika? Akya kyajinga kyubilo kikatampe.

³⁸⁹ Bino, oo, mulongo, juba jimo, kimye bulubi, byakupandawila, luzhinauko, kulubankana, ne moyo, byalengejile bantu ba kwa Lesa kubwelatu mu koono, kwajinga

Umo watelwa mba Yesu Kilishitu: “Jino juba Mbena kufwila bantu.” Abyo ibyo.

³⁹⁰ Kika kyo aambile kuzhita yanji? “Ndondelainga na kulwa na byonse byo muji nabyo. Inge uji na mukokolo, lwa na mukokolo. Kechi muvwe moyo ne. Inge uji na kinchi, lwa na kinchi. Inge uji na jibwe, lwa na jibwe, kyonse kyo uji nakyo.”

³⁹¹ Abyo Kapiteni wetu Mukatampe waamba leelo. “Natolele Kyambo kya Lesa, kabiji Nashijile diabola ne bulume bwanji.” Wa muchibawile mu bipimvwa bipimvwa, amena, na Kyambo. Pano, kyonse kyo uji nakyo, inge uji na Kyambo kimo, “Aye Nkambo Lesa obe ukubuka,” muchibe. Ndondelainga. Amena. Londelai Kapiteni wetu. Ee, mwane. Aye wamuchibawile.

³⁹² Satana, na bwanji bukatampe, bufumu bwawama, kabiji bwawamisha, ne byonse, byonse bya-fikila-motu. Kechi biji na kimo kyakuba ne atweba ne. Abyo ibyo. Aye ukijitu wakila mu kujimuka banyama bonse bamubujimi. Ee, mwane. Yesu waambile mba baana ba muino ntanda bajimuka kukila baana ba mu Bufumu bwa Lesa.

³⁹³ Pano, ao malwang’ano akatampe abiji. Atweba tubena kuya...Njina...nafwainwa kushika. Ao malwang’ano abiji akatampe abena kwiya pamo ponkapano. Ponkapano kyo kimye misongo ne bintu bikwabo po byaponena pantanda, poso michi ya masayaasi ya kakalwa, kabiji ne bintu byonse byakakalwa. Kechi kujipo nangwa kimo ne, kabiji—kabiji atweba tu... Kabiji mazhita, zhita icheche yakwa Lesa, ibena kubwela mu koono ne bintu byonse. Mulongo, ke kimye kya mukwabo Arnold von Winkelried. Ke kimye, kimye kya muntu mukwabo wa Lesa emane. Ke kimye kyakwa Elaija kumweka. Ke kimye kya kintu kimo amba kimweke.

³⁹⁴ Lesa mazhita anji, shikai milanguluko yenu. Kwimana pa kamineti ne, na kulanguluka kintu kiji kyonse akyo diabola kyo akonsha kwimupa kupichila mu masesi enu ne. Bino vulukai, Kyambo kya Lesa kechi kikakalwa ne.

³⁹⁵ Ao mazhita abiji akatampe! inge mulwanyai waiya nobe mukwe, nobe byo abena kwiya leelo, kika Lesa kyo aambile mba Aye ukoba? “Aye Mupashi wakwa Lesa ukemanya kipimo kyakyo.” Yobe umu wa mwi abo nyi? Ee, mwane.

³⁹⁶ Twafunjishiwa mu Yakoba 4:7, Amiwa kechi nji na kimye kya kwikitanga ne, Yakoba 4:7, kuuba mba, “Mukanai diabola, kabiji,” aye kechi ukenda kyakwenda ne, pakuuba, “ukanyema.” “Mukanai diabola.” Mwakonsha ku mukana byepi diabola? Jishindatu jimo Kapiteni wetu Mukatampe witubula mwakubila. Tolai Kyambo kya Lesa. Abyo byo mwakonsha ku mukana diabola, ke ku Kyambo kya Lesa. Aye Kapiteni Mukatampe witubujile byo kyaubiwe. Kijitu bulongo.

³⁹⁷ Pano, mu kushika, Nasaka kwamba kikyeye. Awa diabola wakala, pano, mwalanguluka mba walubemba. Anweba

mwalanguluka mba ukatula bulemo ku mwaana mucheche? Aye wakonsha kulukuka kiji kyonse. Aye walukukile Yesu Kilishitu. Waishile kwi Aye, na ku mulukuka jisatu. Bushe mwikiyuka kyo nyi? Satana kechi watujiletu bulemo jimo ne. Aye ukemulukuka na misongo, nanchi wabwela jibiji na kwi mulukuka, kwi mubula mba, “Moba abya kukumya apwa. Obewa kechi wabukilwe ne. Kechi kujipo kintu kimo ku Kyokyo ne.” Mwayuka mba akyo kiji bulongo?

³⁹⁸ Aye watujile bulemo Yesu jisatu. Jisatu ke ja mungye, wanyemejile pa Yesu, na kubula lwitabilo lwanji mu Kyambo kya Lesa. Yesu wajinga Kyambo. Kine, aye kechi wikiswile ne. “Inge Obewa wi. . . Inge Obewa wi. . .” Aye waiya, kutulwa bulemo bwa mungye jisatu, nobe kimye kimo mulwanyi leelo. Aye waiya, waambile mba, “Inge Obewa wi Mwaana wa Lesa, mweshepo kyakukumya. Lekai ne kimone kyubiwe.” Mulongo, jisatu ja kumutula bulemo mungye, “Inge Obewa. . . Inge Obewa wi. . .”

³⁹⁹ Pano, panonga Yesu? Yesu wajinga Kyambo kya Lesa. Aye wajinga Kyambo. Aye watujile bulemo Kyambo. Lukumo! Amiwa—Amiwa mbena kutambula. . . kumvwatu bulongo, kusapwila pano, ne wa Bukishika. Abyo ibyo. Yesu kyo Kyambo. “Mu ntendekelo mwajinga Kyambo, ne akya Kyambo kyajinga na Lesa, ne kyokya Kyambo kyajinga Lesa. Kabiji ne Kyambo kyaikela, kya alwilwe ke muntu, ne kwikala. . .” Yesu wajinga Kyambo. Kika Aye kyo aubile? Aye wa muchibawile mubipimvwa bipimvwa. Oo, ami! Amiwa mbena kuleka. Kika Yesu kyo aubile? Aye wajinga Kyambo. Nanchi, na Kyambo, Aye wamuchibile Satana monka mu bulemo bwamungye. Aye watumbukile kuyamo nobe jibumba ja bashilikale-bapona-mumandeki, nangwa kintu kimo kyayewa musango, waile kwi Yesu, Kyambo, byonkabya. Kabiji Yesu watolele kyokya Kyambo, ne kumuchibaula bipimvwa bipimvwa. Aleluya! Kine, wamuchibawile bipimvwa bipimvwa, wamushijile na Kyambo.

⁴⁰⁰ Monai bulemo bwanji? Talai, telekai bulongo, byo ketushike. Kulukuka kwanji kika? Kubula kwitabila Kyambo kya Lesa, abo bo bulemo bwanji. Apo, mwakonsha kumona nkondo ikatampe ayo yalwiwapo kala? Kujitu bulume bubiji: Satana ne Lesa. Kabiji ing’anyi kilwilo kya Satana kya kukulwishako? Ke kweseka amba obewa ubule kwitabila Kilwilo kyobe. Aye wakwangata kilwilo. Twayai—twayai tuteleke mukuzhindama pano. Telekai. Inge aye wakonsha ku kulengela obewa kukana ku ketekela Kilwilo kyobe kyaesakanatu, inge aye wakulengela obewa kutekela mba Kilwilo kyobe kechi kyakosa bulongo ne, aye nishi wakwangata kilwilo.

⁴⁰¹ Oo, Mulongo Neville, Naketekela mba kechi twaketekela kyokyo ne.

⁴⁰² Monai, Aye wi mwangata kilwilo inge wimulengela anweba kubula kuketekela kyokya Kilwilo. Umvwe anweba

mwatula Kyokya panshi, akya kipwisha kulwa kwenu, obewa mwapwisha. Kwachijilai akya Kilwilo, kechi obewa wi Kibike panshi ne. Twamona kubula luketekelo lwanji. Lekai. . .

Kintu kimo kikwabo kyo Mbena kukeba kwamba pano, mu mineti umo.

⁴⁰³ Russia. Nasaka kwamba kikye kubuwame bwaboba bakala, ne bikwabotu, muno, kabiji ne anweba mubena kufunda Baibolo. Kika kyo mubena kwendeleka ne kwamba pa Russia? Uu! Anweba kechi mukomvwa amiwa kwimubuula mba mushimike mwakufyama ku ma mbomba ne, mwaumvwapo nyi? Kika kyo mubena kwendeleka pe Russia? Russia kechi ujipo na kintu nangwa kimo ne. Abo kechi bakashindapo mankondo ne. Abo kechi bakashindapo ntanda ne. Komyunizimu kechi ukashindapo ntanda ne. Lukatazho ka luji na bantu? Bushe Kyambo kya Lesa kikakalwa nyi?

⁴⁰⁴ Telekai, akye kiji pa tepu, ku ntanda, Ko naamba, nangwa konse ao matepu ko akaya. Kabiji ne anweba bantu muno, nangwa kika kyakonsha nkumwekela ami, anweba muketekele kikye.

⁴⁰⁵ Russia, komyunizimu, kechi bibena kushindapo kintu nangwa kimo ne. Kyambo kya Lesa kechi kikakalwa ne. Lomanizimu ye ukashinda ntanda.

⁴⁰⁶ Twayai tutole kimonwa kya kwa Danyela. Akyo kyo Kyambo kya Lesa. “Anweba, Ba Danyela. . .” “Anweba, Ba Mfumu Nebukadineza, awe ye mutwe wa ngolode,” Babiloni. “Bufumu bukwabo bukapinga pa bwenu, bo bwa siliva,” mwamona, abo bwajinga bwa Mendo-ne-Pelesha. Bukwabo ke bwa Greece, Alexander Mukatampe. Bwalondelapo, kwaiya, Loma. Kabiji kechi pajipo kintu kimo kyaambiwa pa komyunizimu ne. Loma washijile ntanda yonse.

⁴⁰⁷ Yesu Kilishitu wasemekelwe mu bufumu bwa Kiloma, kabiji ne kumanyikwa, kimye Kyanji kitanshi kya kwiya pano, ku bufumu bwa Kiloma. Kabiji ne pa Kwiya Kwanji kwabubiji, kubena kwiya pano, Mbila Yanji ibena kumanyikwa ku madinominesheni abena Loma, ao ye inabo wa bonse. Kabiji Aye byo akabwela, Aye ukabwela na konauna bufumu bwa Kiloma, pakyokyo Bayudeya kimye kyonse ba Mupembelela kwiya na konauna bufumu bwa Kiloma.

⁴⁰⁸ Abwa buntangi bwa Kikatolika na madinominesheni onse anji mu ntanda, ponkapano bena kwiya pamo nobe kabungwe, kuletwa pamo kwa bipwilo mu bukabungwe. Kechi Russia ne. Ke Loma. ABYO BYOBYAAMBA AYE NKAMBO. Ee. Mweshapo Kinembelo apo komyunizimu, nangwa kikwabotu kyapusanako na Loma, kikatangijila.

⁴⁰⁹ Bushe bena Mendo-ne-Pelesha bapingile pe Nebukadineza? Kine. Bushe Greece wapingile pe abo? Ee. Bushe Loma

wibafumishepo, popa? Bushe kyaabenepo mu bulume jikumi bwa Otomani nobe byo tuji nabo pakino kimye nyi?

⁴¹⁰ Bushe *Eisenhower*, akyo kyalumbulula mba “kyela kya kapotwe,” *Khrushchev* kyalumbulula mba “buchimba,” bushe bajinga na mbung’eno yabo konka kuno nyi? Kabiji Khrushchev wavujile sapato yanji, [Mulongo Branham wakokosha pa pulupiti—Waku.] pakuuba mba kikale patokatu, kintu kyashikuka, wapumine pa desika, nobe *byobya*, mu kumweshwa bantu. [Mulongo Branham wakokosha pa pulupiti.]

⁴¹¹ Kyawama, lukatazho ka luji na bantu buleelo? Kwepi kwitutwala lwitabilo? Kika, kyo mubujila kuketekela Kyambo kya Lesa amba Kyabukine? Kabiji akya kintu kifwamo *Muno*. Lukatazho lujipi na basapwishi leelo? “Komyunizimu!” Yense musapwishi ujiko ubena kweseka kulwisha komyunizimu. Komyunizimu, kafwako kyo iji ne!

⁴¹² Kintu kine, diabola ubena kwikisukenya konka kumoona obe, ne kwikiyukatu ne; ke Lomanizimu, dinomineshenizimu. Kabiji Loma ye inabo wa madinominesheni. Aye Baibolo waamba mba, “Aye ke pite, kabiji banabaji babakazhi ke bakende,” mwabujila kuswa Lesa, mwabujila kuswa Kyambo Kyanji.

⁴¹³ Bashilikale, tolai Kyambo. Bamalaika ba lusa, ikalai na Kyambo. Amiwa konaika juba jimo, pakuuba akye Kyambo kechi kionaika ne. Kabiji anweba banyike, inge kyabula kumweka mu kisemi kyami, mu kamona. Akyo kyo kintu.

⁴¹⁴ Bushe mwajikumvwa sawakya lukeelo luno nyi? Mrs. Kennedy kuya, na kumona papa, ne byaambile papa? Monai, bonse bumpopweshi bwa pantanda! Oo! Kyawama, kape tukambeko byavula pa kyokyo, Pamulungu pa bena kwiya.

⁴¹⁵ Monai, kechi musakamane na mambo akwa Russia ne. Russia ke kajibwe kacheche kaji ku kitulu. Kechi musakamane na mambo a komyunizimu ne. Anweba tajishai Lomanizimu byo abena kukwatakanya bipwilo. Kafwamo mu Binembelo bya nembwa na mambo a komyunizimu amba ikatangijila ntanda ne.

⁴¹⁶ Kabiji Amiwa ngyatu na Kyambo, nangwa bikwabo byubiwe byepi. Ke Kyambo kyo Naketekelatu. Ke Lomanizimu ukasenda ntanda. Kabiji Lomanizimu ye inabo wa tubungwe. Kechi kwajingapo kabungwe ne poso Loma, kabiji ne tonse twafuma monka. Kabiji Baibolo waamba byo, “Ye inaja ba pite.” Nakonsha kwikala juba afu pa kyoka kyo, ne jikwabo, bino Nalanguluka mba Nafwainwa kuya kulutwe.

⁴¹⁷ Umvwe mulwanyi witutula bulemo, apo, “Oo, Ne mubuula, mwafwainwa kwiya na kukwatakana na ketu. . .” Musa kuuba byepi, kwibwelamo, kunekenyo? Kechi mwine mushilikale ne, kuuba wikyuba ne. Ine, mwane.

418 Pano nanchi tube ka? Milanguluko, “Lekai muchima wajinga mwi Kilishitu. . .” Abyo byo byaambile Baibolo nyi? “Muchima wajinga mwi Kilishitu, ekale mwi anweba.” Musango ka wa muchima ye ajinga Nanji? Kwikala na Kyambo. Abyo ibyo. Kwikala na Kyambo, Kyamba kya Bataata, kabiji kyashijile mulwanyi kimye kyonse. Pano umvwe mulwanyi wimulukuka ne kweseka kwamba mba mwafwainwa kuuba *kikye* ne kuuba *kyokya*, kika kyo musa kuuba? Ikalai na Kyambo. Abyo ibyo.

419 Kika kyo mukeba kuuba nanchi? Sendai Kyambo. Kyokika Kyambo? Aye Baibolo waamba papo. Twajikwikitanga. Mambo Mupashi, wakwa Lesa, kyo Kyambo. Mwamona? Talali kuno. “Kabiji tolai kipopo kya lupulukilo, ne Poko, yo Poko ya Mupashi.” Yo Poko ya Mupashi! Kika? Ye Mupashi wiya kupita mu milanguluko yobe ne kutwela mwi obewa, kabiji Poko ya Mupashi ke Kyambo kya Lesa.

420 Nga Mupashi ulwa naka? Nga Mupashi Wazhila ulwa naka? Byakumvwa bya ku mubiji? Ne bikwata mubiji? Na Kyambo; muchima! Yii! Lukumo! Nga Kilwa naka? Na bikwata mubiji? Kyambo! Kyambo! Twayai twikyambe, Kyambo! Kyambo! Kyambo kya Lesa kyokyo alwa nakyo Mupashi.

421 Aye Mupashi wa Lesa uyatu kwi konka kwi diabola, ne kwamba mba, “Kyanembwa mba!” Amena! “Kyanembwa mba!” Kabiji ne diabola upana jshinda.

422 Kika kyo tuba? Tolai Poko, kyo Kyambo kya Lesa, ki ndoosai Na (kika?) na kuboko kwa lwitabilo, kwakosa kuboko kwa lwitabilo, Poko yatwa-kubiji. Aye Baibolo waamba mba, mu Bahebelu 4, “Ke—Ke Poko yatwa-kubiji,” ichiba byonse biya ne bilupuka.

423 Mulongo, aye uba byepi? Tolai Kyambo. Tolai Mupashi, lekai Mupashi eye mu muchima wenu. Shikulai muchima wenu, ne kwamba mba, “Kyambo Kyenu kya bukine.” Pano, ubai kikye, nyenga. “Kyambo Kyenu kya bukine.”

424 “Nkambo, Amiwa kechi nsakuteleka kumubiji byo Nsakumvwa ne, muntu byo akonsha, mwine byo aamba. Amiwa mbena kuleka, Mbena kushikula bibelo byami byonse, kundubakanya konse, ne byaluzhinauko, kabiji ne bya kubula kuketekela byo Najinga nabyo. Ng’umvwino yonse ya kumubiji yo Najinga nayo, misongo yonse yo Najinga nayo, Amiwa mbena kwibishikula. Amiwa mbena kupitaila pa byonse byo. Amiwa mbena kwiya konka ku mupashi wami. Anweba Nkambo, yikilai. Anweba mwaambile mba Mwandengele kwikala uji nasambu ya kufukula.”

“Obewa wi, mwaana Wami.”

425 “Kijitu bulongo, Nashikula muchima wami ne milanguluko yami. Twelaimo, Nkambo Yeu.”

426 Kabiji kwatai Lwitabilo, aya Poko ya Mupashi, BYO BYAAMBWA AYE NKAMBO. Bijikai mba, “Aleluya!” Amena. Nanchi chibai mulwanyi yense kulutwe yenu. Amena. Abyo byokiji. Chibaiko mulwanyi yense. Inge awa—awa mupashi wakala uleta moyo wi mulengela kumvwa...Chibaiko akya kintu, na Kyambo kya Nkambo.

Pakuuba bulume bwetu, ke, “Lusekelo lwa Nkambo bo bulume bwami.”

427 “Mfuma kwi amiwa.” Mpaai! Muchibai na Kyambo. Nangwatu ye demona, nangwa kikale mulwanyi, nangwa kikale misongo, nangwa kikale kika, tola kyokya Kyambo ne kwi Kikoka na Poko. Kabiji inge wikipuma kimye kitanshi, kyamweka nobe kechi kyaenda ne, kimbe ne jikwabo, kabiji kipume ne jikwabo, kabiji kipume ne jikwabo. Kabiji kipume poso wasaba kipeze, nobe kanzolo kakacheche kabena kusumbila ako kene; nangwa wi mpungu, byo uji. Sumbila obewa mwine kupulakanya akya kibabulwa kya misongo. Chiba pa kulupukila, ne kwamba mba, “Aleluya! Walondelapo ng’anyi?” Amena. Aye yo nkondo. Awe ye mushilikale. Awa ye mushilikale wa musalabu. Ee, mwane. Pangai mulwanyi yense.

428 Kika? Kika? Atweba, basalululwa, Lukunwa wa bufumu wakwa Abulahama. Kimye Abulahama kyo akaine bintu byonse bya bujile kwikala kulubaji lwa Kyambo kya Lesa, aye wapangile jishinda janji kupita mubyonse byajinga bimiko byajinga kulutwe yanji. Baambile mba, “Mukazhobe wakota bingi.” Aye wikichibawile kwi kifumya mujishinda janji. Aye diabola waambile mba, “Obewa kuuba wikyuba ne *kya*. Obewa kuuba wikyuba ne *akya*.” Abulahama wikichibawile kufuma mujishinda janji. Aye wikipumine, ne kwikipuma, poso kichibile akyo kine.

“Kwepi kukwabo, Nkambo?”

429 “Endesha tente obe *papo*.” Aye waile kabiji Wamushimikijile kitapisho konkakwa.

430 Wafikile kokwa, ne Satana waishile, ne kwamba mba, “Pano, Nsakukubula, ino kechi yo mpuzha yawama ne.”

“Amiwa nsakwikala ponkapano. Mfuma mu bifulo byami.” Aye waambile mba, “Aleluya!”

431 Lota waambile mba, “Kyawama anweba kwiya kuno. Atweba tuji na kimye kyawama kuno. Atweba bonse tuji na kabungwe ketu kuno. Kika, bakazhi bami bo bantangi bakipamo kabiji ne bintu bikwabo, mu muzhi. Amiwa ne mubuula mba, anweba mwafwainwa kwiya kuno.”

Sala waambile mba, “Abulahama . . .”

432 “Zhindama, Sala.” Aleluya! “Imana ponka pano. Apo ipo Lesa po aambikile. Ponka pano ipo po Naimana.”

433 Pano ipo Lesa po aambikile:

Bonse tumbijikai bulume bwa Jizhina ja Yesu!
 Lekai Bamalaika bapone kikuvumene;
 Letai michinya ya bumfumu,
 Kabiji ne kumuvwika Aye Nkambo wabonse.

Pe Kilishitu, Jiibwe ja nkosa, po Naimana;
 Ponse pakwabo pabipa,
 Ponse pakwabo pabipa.

⁴³⁴ Ne lufu alo lwine, ne byonse byashala, pose pakwabo pabipa.
 Pe Kilishitu, Jiibwe ja nkosa, po Naimana.

⁴³⁵ “Aye Lukunwa wa kwa Abulahama wa mubufumu.” Aye Lukunwa wa mubufumu! Kika, mazhita asaluluwa a mu England ke oa a mubufumu bwa England, mashi abufumu, byonsetu. Kabiji Lukunwa wa mubufumu bwa Kilishitu ke Kipwilo kya yulwa-na Mupashi Wazhila, kyayulwa na Mupashi Wazhila. Kika? Lukunwa wa Mubufumu, mwaila mulaye, kechi mu byakumvwa ku mubiji ne. Pakuuba, kupichila mu mulaye wa Lesa, bemana pa Kyambo kya Lesa, ne kuchibaula jishinda jabo, na kubijika, “Aleluya!”

Ne lufu nalo lwiya ne kwamba mba, “Kibena kwiya ku maboko enu.”

⁴³⁶ Ambai, “Pana jishinda, Yondano. Amiwa mbena kwabuka kubushiya.” Chibakanya jishinda jobe ja kupitamo, kuya ku Ntanda ya mulaye. Amena.

⁴³⁷ Kika kikamweka inge nkondo yapwa? Amiwa pano kepezheko, kine kyafikilamo. Inge nkondo yapwa, kabiji bazhila ke beye na kufola ku Muzhi, Amiwa mbena kukeba kwimwipuzhapo kintu kimo, kika kikamweka?

⁴³⁸ Kika kyamwekele kimye Hitler kyo aile mu France? Kika, baambile mba kechi wakonsha kumona jiulu ne, pa kimye kicheche, mandeke. Ayo tampulo-yabibata ba ki German. [Mulongo Branham wasombolola tampulo-yabibata—Waku.] Monai, baimene, kasa bapita, na kusekelela lushijilo.

⁴³⁹ Kimye Stalin kyo aishile ku Russia, baendele mamailoshi avula, yense taka wajingatu panyuma ya mukwabo, abo balukukile Berlin poso kafwako nangwa kimo kyashajilepo ne. Byo byonka. Kabiji byo baile, kabiji babo bena German. . . . Abo bashilikale bena Russia basangalele, abo batwelele mukachi na kyokya, mwayukatu, atwa tubintu twakusekesha tobooba. Amiwa ne kimwene pa kipikichala, kimye kimo mu London, byo baishile, kine kipikichala kya bintu ako, kika kyamwekele, kasa beya, na kusekelela. Oo, ami!

⁴⁴⁰ Kimye kyo twaumvwine mba aya nkondo yapwa, twabijikile, twajizhizhe mawiso. Kimye babilobo po ba bwelele, twibakumenye kokwa. Babijikilenga. Baambilenga. Najinga na muvya wami wajingamo, waambile mba, byo abwelele, bonse bakala . . . Bakala bajinga bingi na moyo, abo kechi babukilepo

pa mwanya ne, nanchi bebashijikijiletu peulu ya bwato byo bafikile, pakuuba mba bamone Kibumbwa kya Bwanabwabene byo kyaimana. Waambile mba, “Abo banabalume bakatampe kasa baimana byobya, bajijiletu, ne kupona panshi nobe *byobya*, byo bamwene Kibumbwa kya Bwanabwabene.” Bajinga bafuma ku manzubo pa myaka foolo, kasa balwatu, bakumya-na nkondo, kabiji ne bintutu bikwabo. Bino bamuyukile awa mukazhi, kabiji mutemwe, kabiji maama, ne taata, ne baana, kabiji ne bonse bo batemenwe, bajinga kunyuma ya Kibumbwa kya Bwanabwabene. Kyaimenjileko eene mambo kyo balwijilenga. Oo, mawiso avumine, kabiji New York watatwile kujila, byo byonka, kimye babilobo babo baishilenga na kufola. Akya kikekala kintu kicheche.

441 Kimye kimo Kesala, panyuma ya kulwa nkondo ikatampe, aye waambile mba, “Nasaka mushilikale waya bingi kuwa ekale pamo ne amiwa mu kuno kusekelela kwa kushinda balwanyi betu.” Kabiji bonse bashilikale bawamishe mayona abo ne kuwamisha makebo abo, kabiji bafolelenga, mwayukatu, nobe byobya, nobe—nobe bene bashilikale muyewa musango. Byo papichile kimye, kicheche, mulunda mukote waishile, wachibaika. Ami! Aye wajingatu watala peulu, ne kutatula kuya, nobe *byobya*. Kesala waambile mba, “Pembelaiko mineti umo. Pembelaiko mineti umo. Obewa,” kechi wamvwajile nobe—nobe mushilikale ne, waambile mba, “iya kuno.” Waambile mba, “Kwepi ko wafumishe aya mikovu?”

Aye waambile mba, “Konka ku nkondo.”

442 Waambile mba, “Kajila pano. Obewa yobe muntu ye Nakeba kwikala ku lubaji lwami.” Kika? Aye wmwesheshe mba wajinga ku nkondo.

443 Anweba Lesa, ubai lusa pa muntu wakonsha kwichiba kuboko kwanji na kikopo kya jisabi kabiji ne kupewa bukamonyi. Amiwa nakeba kwikala na mikovu-yankondo. Nobe byaambile Paulo, “Nasenda mu mubiji wami biyukilo bya Yesu Kilishitu.” Oene mambo Amiwa okebela kulwa nkondo.

444 Juba jimo, kimye Kapiteni wetu Mukatampe byo akeya, Ao witumvwikile bya nkondo, Ao witupele bya nkondo bya Lesa, aye Mupashi Wazhila, witupele Kapiteni Kyanji kya kulwilako, ne kwimana byobya; mu kimye Kapiteni wetu Mukatampe byo akeya pambili, Amiwa kakeba kutwela muyewa kalaki ne kuya Nanji ku Muzhi, nga anweba? Pano kimye Amiwa kyo katola pa mukoko wa mukazhi wami mukote, nakeketa kukwe ne kumona balongo bami na bakazhi babo, ne baana babo, byo tukatatula kwenda kupita muyewa paladisa wakwa Lesa, kabiji ne ba Malaika bakayuzha mulwelele na nyimbo, peulu byonka bya, ambai pa kusekelela!

445 Kabiji nkondo byo ikapwa, tukamvwala muchinya. Oo, ami! Oo, bashilikale ba musalabu, lukeelo luno, ndoosa yewa mukoko wa lwitabilo, ne kukwata kikye Kilwilo.

446 Pano ngakyo, nyenga, winengezha nyi? Ndoosa akya Kilwilo, ne kwamba mba, “Lesu, Amiwa kechi nasakamana kya—kyaamba diabola kwi amiwa ne, pano nga kyaamba muntu uji yense, lukeelo luno, Amiwa na ketekela, Amiwa na ketekela.”

447 Byonka byo Naambile juba jikwabo, pacheche... Naketekela Milungu icheche yapita, kwajinga mwanamulume walotele kiloto. Aye walotele mba diabola wajinga wakota pacheche, wa munyemajile. Aye waambile mba, “Boo!” Kabiji watolokele kubwela kunyuma, kabiji diabola waishile kwikala wabaya. “Boo!” Kabiji aye watolokejile kunyuma, kabiji diabola wabayijileko. Kyapelako, diabola waishile kwikala wabaya byonka byo ajinga, waishilenga na kumushinda. Aye wayukile mba wafwainwa ku mulwisha na kintu kimo, nanchi wakeketele konse konse. Aye kechi wamwenepo kintu kya kumulwishako ne. Aye watolele Baibolo. Kabiji diabola waambile mba, “Boo!” Aye waambile mba, “Boo!” wamubwezhejile, kabiji diabola watatwile kukepelako, na kukepelako, na kukepelakotu. Kabiji, pakupezhako, wamupumine wafwa na Kyambo.

448 Obewa wi mushilikale, kechi byo uji ne, nyenga? Tola kyokya Kyambo ne kwamba mba, “Kyanembwa.” Amena. “Amiwa kechi mbena kufwa ne. Amiwa nsakwikala na bumi. Amiwa kekala mu uno tabbanako ne kutakaika Lesu pa buwame Bwanji, na bonsetu bashala.”

449 Anweba mwaketekela kyokyo, bazhijikwa? Amena.

Twayai tukunyike mitwe yetu.

450 Anweba Nkambo Lesu, Mulenga wa mwiulu ne ntanda, lekai kiyukanyikwe amba Anweba mukijitu Lesu. Nangwatu Amiwa sapwile byepi, bintu binga byo Nakonsha kwamba, Nkambo, Kyambo kifuma kwi Anweba kikajika byonse.

451 Atwe tutambala twaikala papo, twaimenako bantu bakolwa. Nalomba mba, Taata wa Mwiulu, pakuuba mba mapesho Enu ne ngovu bikale pa umo yense, Amiwa byo kembike maboko ami pe abo. Lesu, mu Jizhina ja Yesu Kilishitu, Nalomba amba Anweba musakushinga manyi tutwe tutambala na Kyeenyi Kyenu kyazhila, mambo kyanembwa mu Kyambo. Kechi kyaaimena Kyambo ne. Pakuuba kyaamba mu Kyambo, mba, “Basendele kufuma kumubiji wakwa Paulo, tutambala ne maepulo. Yatama mipashi yalupukilemo mu bantu, kabiji babukilwe ku bikola byabo.” Bino, atweba kechi twi Paulo wazhila ne, bino Anweba mukijitu Lesu, kabiji Anweba mukijitu yenka Mupashi Wazhila umotu. Amiwa nabika maboko ami pa tutwe tutambala, mu Jizhina ja Nkambo Yesu, kabiji naipuzha Anweba mba mupeshe ne kubuka umo umo.

⁴⁵² Kabiji, Lesa, walala papo pa myanya, ao walala papo, kafwako kyo anji ne mwanyiketu, ke songwakazhi walamba mucheche. Aye kuuba waikala na bumi ne, Nkambo. Satana wauba kala kyatama kwi aye. Kabiji batemwe babuka baino ntanda baeseka nangovu, kwakubula ne kuzhinauka ne, mu kupulusha mwanyike. Abo kechi bekyuba ne. Baji kupelo yabo. Abo kechi bayuka kintu kikwabo kyo bakonsha kuba ne. Bino, Nkambo, Amiwa nji bingi nalusekelo pakuyuka mba kuji kypitala kikwabo kyanembwa. Twakkonsha kuzhikula peje mukwabo, kabiji pa yuwe peje twamona Ubuka Mukatampe watwela. Atweba tubena kumwita Aye mba etupe maana lukeelo luno.

⁴⁵³ Pano, Nkambo, kechi kyanembwa papo mu Kyambo Kyenu ne, amba, “Abye biyukile bikebalondela baitabila?” Nkambo, inge Amiwa kechi ne waitabila ne, ndengai kwikala umo ponkapano. Inge awe songwakazhi mucheche kechi waitabila ne, mulengai kwikala nalo ponkapano. “Abye biyukilo bikebalondelanga baitabila; umvwe babika maboko abo pa bakolwa, ba kakosa.” Kanembwa ne akyo mba, “Mu Jizhina Jami bakapangilamo ba demoni.” Nkambo, abye—abye ke Byambo Byenu. Ke Byenu. Ke Kyambo Kyenu. Kabiji pano nobe wamwingilo Wenu. . .

⁴⁵⁴ Nobe Anweba byo mwaambile, “Inge kwaikala babiji nangwa basatu ba mwi anweba bakumana pamo, Amiwa kekala pakachi kenu; kabiji umvwe mwaumvwang’ena, kintu kimo, ne kwipuzha, anweba mukekitambula.”

⁴⁵⁵ Lesa, awe mwanyike ye wakila pa kukolwa muno mukishimikwa lukeelo luno, mambo aye kuuba waikala na bumi kwakubula Anweba ne, wabanda bingi, kabiji ye wakila mu kukolwa. Nanchi, atweba bonse, tubena kuswa, nobe yense mushilikale waimana muno. Kabiji mu jije jibumba mwaimana Lukunwa wa Abulahama wa mubufumu.

⁴⁵⁶ Atweba tubena kufoola kuya kwi Satana. Kabiji ne obewa winengezhe kuya, Satana, mambo bya nkondo byetu bibena kubembela, misombelo ibena kupokomoka; banabakazhi ne banabalume bakwachujila Mapoko, kufoola kuya kulutwe kwi obewa, na mambo ayuwe songwakazhi mucheche. Mfuma mwi aye, Satana. Muleke mwanyike. Nobe mazhita akwa Lesa mumi, twakukana obewa. Muleke, mu Jizhina ja Yesu Kilishitu.

⁴⁵⁷ Amiwa naya na kubikapo maboko pe aye. Kabiji, Satana, obewa wakasa yuwe mwanyike, obewa wauba kikyeye kibi. Nayuka mba obewa kechi kuji muntu wakonsha kwimana nobe ne, bino obewa kechi wakonsha kwimana ne Nkambo yami ne, nanchi Naiya mu Jizhina Janji. Muleke, obewa mupashi wakwa diabola. Obewa demoni wa misongo, fumamo muyuwe mwanyike, kabiji ekale wakasuluka, kufuma ku jino juba kuya ne kulutwe. Amiwa naamba kikyeye, mu Jizhina ja Yesu Kilishitu.

458 Pano, Nkambo Lesa, Anweba Yenka mwasangwile bafwa kabiji ne kushinikisha amba Anweba yenu Lesa, imanyai yuwe mwanamukazhi mwananyike ku bututulu bwanji ne ne ngovu jibiji, amba emane mu kino kishimikwa. Diabola waya kufuma pe aye! . . .? . . . usa kumulengela kwikalatu bulongo. Lekai ekale na bumi ku lukumo ne munema wa Lesa.

Kya—Kya ambiwa, pano lekai kyubiwe.

459 Bushe mujipo bakwabo muno abo bakeba kusutula maboko enu ne kwamba mba, “Nasaka kulombelelwa. Amiwa nakolwa. Nakeba Lesa”? Amiwa kechi nayuka kimye kyo tuji nakyo ne. Tuji na kimye kyabaya kya kuleka bantu bapite kuno. Amiwa naumvwa bingi lutekenesho pa kino kimye lukeelo luno. Ee. Ee. Nakeba mba obewa wiye kuno, Billy, kabiji kape kusendatu alwe lubaji lumo kukwe, ku *lulwe* lubaji luji kuno, bunketu. Lekai alwe lubaji lwiye patanshi, apo po tusa kusenda lubaji lwa kunyuma panyuma ya kokyo, kufikatu *apa* peulu popa. Nanchi tusa kwibasendatu muyewa musango, nanchi abo kechi . . .

460 Kabiji pano Nakeba Mulongo Neville ne bamo ba mubalongo bamwingilo kwimana kukwe kulubaji lwami, ponkapo, pakuuba mba anweba musa kwibabwezha ponka peulu jibiji. Kijitu bulongo. Kijitu bulongo. Pano Amiwa . . .

461 Baanga mwi anweba bamvwala bya nkondo byabo?

462 (Kisa kwikala kyapusanako pano. Yanga kunzubo, wikale bulongo ponka pano, ukose.)

463 Amena. Oo, ami! Anweba bonse bashilikale, kokai Poko. Kokai Poko, bashilikale ba musalabu, kuya na kufola, kuya na kufola.

Pe Kilishitu, Jiibwe jakosa, Po naimana.
Ponse pakwabo pabipa.

464 Kijitu bulongo, iyaingatu, konka kuno ku lubaji lwa. Muntu yense atwele mu milombelo pakino kimye, byo babena kupita.

Mu Jizhina ja Yesu, bukai awe mwanamukazhi. Amena.

Kokai Poko yenu pano. Ikalaitu ponka pa kipona kyenu, kasa mubijika.

465 Mu Jizhina ja Yesu . . .? . . .mu Jizhina ja Yesu . . .? . . .mu Jizhina ja Yesu Kilishitu . . .? . . .

Twayai, Benakilishitu bashilikale!
Kuya ku nkondo,
Na musalabu wa Yesu
Kasa antangijila.

466 “Pana jishinda, Satana!” Lukatazho lwepi, bashilikale? Kechi mwalanguluka mba twakonsha kushinda nenyi? Aye washindwa kala. Twakila mukushinda mwi Kilishitu Yesu. Yense Diabola fumamo, kijitu kyonse. Amena.

Iya kuno, mulongo wami! . . .? . . .

Nalomba mba anweba musakubuka . . . ? . . .

Bukai mulongo wami, Doko; mubukai, Taata, mu Jizhina ja Yesu.

Mu Jizhina ja Yesu Kilishitu, buhai yuwe inetu. Iya . . . ? . . .

⁴⁶⁷ Pano, wasendele . . . Naji kwipwizha balongo baji kunyuma. Konse konse, aye Nkambo . . . ? . . .

⁴⁶⁸ Anweba Nkambo Lesa, Mulenga wa Meulu ne ntanda! Anweba Lesa, Anweba mwayuka biji mu muchima waji. Anweba mwayuka byonse pa kikyē. Nalombelela bonse babiji bamaama ne bataata. Mu Jizhina ja Yesu Kilishitu, Napana . . . ? . . .

Mu Jizhina ja Yesu Kilishitu, Na . . . ? . . .

Mu Jizhina ja Yesu Kilishitu, Na . . . ? . . .

⁴⁶⁹ Lesa, ikalai na nyenga yami. Twayuka, myaka yatatwile kutwelamo ne kuleta lufu kukeba kukwata pa mubiji wa mwanamukazhi. Pano, mu Jizhina ja Yesu . . . ? . . .

⁴⁷⁰ Mu Jizhina ja Yesu Kilishitu, peshai yuwe songwakazhi wamucheche, Nkambo. Mankondo etu pa sukuulu popa, Nayuka bintu byo apitamō. Nalomba mba Anweba musakupesha. Lekai akoke Poko, lukeelo luno, ne kwenda kuya kulutwe! . . . ? . . . Peshai awe songwalume mucheche, Nkambo; aye ubena kwiya, kasa eta pa Jizhina Jenu, lukeelo luno; Nalomba mba Anweba musa kuya na . . . ? . . .

⁴⁷¹ Lesa, peshai mulongo wami, mupai kukabila kwa mu muchima wanji. Mu Jizhina ja Nkambo yetu Yesu, Ne kyambile! . . . ? . . .

Mu Jizhina ja Yesu Kilishitu, twalomba yuwe mulombelo.

Mu Jizhina ja Yesu Kilishitu, twalomba yuwe mulombelo.

Mu Jizhina ja Yesu Kilishitu, twalomba yuwe mulombelo.

Mu Jizhina a Yesu Kilishitu, atweba . . . ? . . .

Mu Jizhina ja Yesu Kilishitu, twalomba yuwe mulombelo.

Mwi Yesu Kilishitu mu Jizhina . . . ? . . .

Mu Jizhina ja Yesu Kilishitu . . . ? . . .

Mu Jizhina ja Yesu Kilishitu, buhai mulongo wami.

Mu Jizhina ja Yesu Kilishitu . . . ? . . .

Mu Jizhina ja Yesu Kilishitu!

Mu Jizhina ja Yesu Kilishitu!

Mu Jizhina ja Yesu Kilishitu!

Mu Jizhina ja Yesu Kilishitu!

Mu Jizhina ja Yesu Kilishitu!

⁴⁷² [Muntu umo waamba mba, “Bataata bafwa.”—Waku.] Lesa, mukwashai, mwi Yesu mu Jizhina.

Lesa, mu Jizhina ja Yesu Kilishitu, twa . . . ? . . .

Lesu, mu Jizhina ja Yesu!

Mu Jizhina ja Yesu Kilishitu...?...

Mu Jizhina ja Yesu Kilishitu, bukai mulongo wami.

Mwi Yesu mu Jizhina...?...

Pano mwaumvwa nyi?

Anweba Lesu, lekai kikyeye kufuma...?...

473 Mu Jizhina ja Yesu Kilishitu, twalomba!...?...Swishai nyenga...?...

474 Anweba Lesu, byo twayuka awa maama mucheche wawama, ubena kupita mu onse o makatazho, Nalomba, Lesu, amba Anweba musa...?...pe aye.

Kokai aya Poko, Ed, ne kuya kulutwe, mu Jizhina ja Yesu.

475 Anweba Lesu, bukai mwanamukazhi. Swishai kukabila kwanji. Lekai asende aya Poko kulutwe yanji, mu kimye kya makatazho.

Anweba Lesu...?...lukeelo luno. Nalomba mba Anweba musa...?...

476 Lesu Taata, Nalomba mba Anweba musa kubuka mulongo wetu ne kumukosesha. Kabiji mu Jizhina ja Yesu Kilishitu...?...

477 Lesu, Nalomba mba Anweba musa kubuka nyenga yetu, mukoseshai, mu Jizhina ja Nkambo Yesu Kilishitu.

478 Lesu Taata, Nalomba mba Anweba musa—musa kumubuka mulongo wetu.

Bukai nyenga yetu, Nkambo!...?...

Taata, mwi Yesu mu Jizhina, bukai yuwe, nyenga yetu, Taata.

479 Taata,...?...twalomba mwi Yesu mu Jizhina. Lesu, bukai yuwe mwanamukazhi.

Anweba Lesu, Nalomba mba Anweba...?...

480 Anweba Lesu, mupeshai, Taata!...?...Nga byo twatemwa babo balunda bakala, Nkambo. Kabiji Nalomba mba Anweba musa kuswisha kukabila kwanji!...?...

481 Taata Wetu Wamwiulu, Nalomba mba mulongo wami...?...Anweba Lesu,...?...aye, Anweba Lesu...?...bashilikale ba musalabu. Kabiji usa kukoka aya Poko, lukeelo luno, ne kuya kulutwe.

Lesu, twa...?...Swishai kikyeye, Anweba Nkambo, kukabila kwanji.

482 Lesu, peshai mulongo...?...Nalomba mba Anweba musa kumubuka, Nkambo!...?...Mupai kukabila kwa muchima waji, mwi Yesu Kilishitu mu Jizhina.

483 Anweba Taata Wamwiulu, awe mucheche wamwingilo wa Mamboawama, mujibu wanji...?..Aye ko aomvwanga mu mipika...?..Lesa, Nalomba mba Anweba musa...?..Kabiji mu kimye zhita ikatampe ya kwa Lesa ibena kwenda kuya kulutwe, na ma Poko asutulwa, mupai lushijilo, Nkambo. Mulume wanji wachepa mubiji papo, Nkambo, ao waletwa kufuma pa mwanya wa bakaasa apo po alajile, kasa abena kufwa na kaasa, kabiji ba madokotala bamukakalwa, byo ailenga. Kabiji uji kuno, lukeelo luno, mushilikale mucheche wa musalabu. Mukoseshai, Nkambo, na mambo a mwingilo Wenu, twalomba, mwi Yesu mu Jizhina.

484 Nakeba awa inetu wakepa mubiji...Paji kintu kikwabo pe yuwe musapwishi mucheche papo. Iya kuno, Mulongo Kidd. Awe muntu watuminwe unzubu kufuma ku kipatala, bukumotu, kasa abena kufwa, wajiwa na kaasa. [Nyenga Kidd waamba mba, “Mwaka umo wapita.”—Waku.] Mwaka umo wapita. [“Ibiji.”] Myaka ibiji yapita, na kaasa wabanabalume. Dokotala wanji wamupeletu moba acheche a kwikala na bumi. Kabiji lukeelo lumo, twaileko, lukeelo lwine, twa mulombelejile, umotu pamo nobe obe, kabiji kechi bakonsha kutana ne po kyajinga ne. Aye wabukilwe. Amena. Aye—aye...[“Wi kiswile.”] Uji bingi na kinemenezhi kukila byo akikalapo kala nakyoo. Aye ne mukazhanji mucheche bajinga mu mwingilo wa Mamboawama, kape Amiwa kasa kyangye kusemwa. Uji pano pakino kimye... [Mulongo Kidd waamba mba, “Myaka fifite-faivi.”] Myaka fifite-faivi. Kasa Amiwa kyangye kwiya ne pantanda ne, abo basapwijilenga Mamboawama. Kabiji uji kuno, wabukwa, pa myaka iki nobe sebeta-faivi, nangwa, [“Eite-wanu.”] Eite-wanu. [“Twaikalanga na kusangululwa, kupwila kwa milungu ibiji, na kusapwila kila bufuku.”] Kusangululwa kwa milungu ibiji, kwikala na milungu ibiji ya kusangululwa, ne kusapwila kila bufuku. Eite-wanu myaka yakukoma, wabukwa, na kaasa, kasa aji mukote.

485 Kjitu bulongo, nyenga, ke kimye kyobe pano. Mwaketekela nyi? *Twayai, Benakilishitu Bashilikale*. Kijitu bulongo, nyenga. Anweba, ku bonse ba mwi anweba, tusa kuba byepi? ABYO BYOBYAAMBA AYE NKAMBO. Tube byepi, kwikalatu ponkapano nyi?

486 Satana, washijilwe. Atweba tubena kwiya pano. Atweba tubena kufola kasa tuya ku Ntanda ya Mulaye. Kyo kika? “Awe mutumba ye muka, kumeso akwa zelebabuba? Ye ng’anyi wee, waimana ku meso obe? Obewa ukekalatu ke musaza.” Kika? Na Poko yatwa-kubiji, tukamuchibawila panshi. Abyo ibyo. Kijitu bulongo.

Twayai, Benakilishitu bashilikale!
Kuya ku nkondo,

Na musalabu wa Yesu
 Kasa antangijila;
 Kilishitu, Nkambo wa mulukena,
 Untangijila ku balwany; (Na Kyambo Kyanji.)
 Kuya kulutwe ku nkondo,
 Mwamona, mujilo Wanji ubena kuya!
 Twayai, Benakilishitu bashilikale!
 Kuya ku nkondo,
 Na musalabu wa Yesu
 Kasa antangilako.

⁴⁸⁷ Aleluya! Baubile byepi? Kintu kitanshi kyaile kulutwe, ku nkondo, mu bena Isalela, kika kyajinga kitanshi? Ba nyimbi baile kulutwe, patanshi. Kika kyalondejilepo? Ke Jikwachi. Apa bino ke nkondo. Kijitu bulongo. Mwikiketekela pano nyi? Tubena kwimba mba *Twayai, Benakilishitu Bashilikale*. Tubena kufumyamo kuzhinauka kuji konse. Ke kwimana pano, kufola kuya ku nkondo.

Twayai twimane pano, muntu yense.

Twayai, Benakilishitu bashilikale!
 Kuya ku nkondo,
 Na musalabu wa Yesu
 Kasa antangilako;
 Kilishitu, Nkambo ya mulukena,
 Untangijila ku balwany;

Twakonsha ku mushinda byepi? Na Kyambo.

Kuya kulutwe ku nkondo,
 Mwamona, mujilo Wanji ubena kuya!
 Twayai, Benakilishitu bashilikale!
 Kuya ku nkondo,
 Na musalabu wa Yesu
 Kasa antangijila.

Kechi twaabenwamo ne,
 Bonse mubiji umo;
 Bamo muluketekelo ne Lufunjisho,
 Bamo mu butemwe.

⁴⁸⁸ Bonse baketekela pano, ambai mba, “Amena.” [Kipwilo kyaamba mba, “Amena.”—Waku.] Aleluya! Mwaketekela kyokyo nyi? Twiba kushinda. Mulwany yense uji kwepi? Munshi ya mau lu etu. Yetu bang’anyi leelo? Basanguka mwi Kilishitu!

⁴⁸⁹ Pano, kyapwa, nyenga. Waketekela kyokyo nyi? Yanga ku nzubo pano. Waumvwatu bulongo? Waamba mba naumvwatu bulongo pano. Byonse bijitu bulongo.

⁴⁹⁰ Banga koko baumvwa bulongo? Kabiji byo babijikile, kibumba kyaponene panshi, amena, kabiji bamwangachile. Amena. Batambwile muzhi. Amena! Amena! Anweba Mwamuketekela nyi?

⁴⁹¹ Pano, kechi mulubeko kupwila kwabufuku buno ne. Mulongo Neville usa kwikala kuno bufuku, ne kwi tuletela mbila yawama. Kabiji Pamulungu, Pamulungu pa londelapo, inge Nkambo waswa, nkekala kuno.

⁴⁹² Pano twayai, byo ketuye. Kabiji pano, pakulupuka mu kishimikwa, tuyenga, kasa twimba, *Twayai, Benakilishitu Bashilikale*. Kabiji kufuma ku jino juba, ne kuya kulutwe, kechi mukabike aya Poko mu kikwama ne jikwabo ne. Kikokaimo. Twayai tushinde. “Bailenga, na kushinda, kabiji na kushinda.” Kijitu bulongo, ne jikwabo, pa yewa veleshi mutanshi.

Twayai, Benakilishitu bashilikale!
 Kuya ku nkondo,
 Na musalabu wa Yesu
 Kasa antangijila.



NKONDO IKATAMPE YABULWA KULWIWAPO KALA KDE62-0311
(The Greatest Battle Ever Fought)

Ino Mbila na Mulongo William Marrion Branham, yalupwilwe patanshi mu Kizungu pa Mulungu lukeelo, Kisaka 11, 1962, pa Branham Tabernacle ku Jeffersonville, Indiana, U.S.A., byafumishiwa pa tepu ukwata ne kufyatula kabiji bya nembwa mu Kizungu kwa kubulwa kupimpulwa. Ino ntuntulwilo muki Kaonde ya nembelwe ne kusampanya na ba Voice Of God Recordings.

KAONDE

©2021 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Kayukilo ka kuvuzha

Luusa lonse luji kubene. Awe buuku mwakonsha ku mupulita ku kya kupulitako kya pa nzubo pakuuba mba anweba bene mwakonsha kumwingijisha nangwa kupaanwa, kyatuutu, nobe jishinda ja kunsampwilamo Mambo awama a Yesu Kilishitu. Awe buuku kechi wakupotesha ne, kulengamo avula, kutumwa palubesha, kufiwa mu makopyuta, kututululwa mu milaka ikwabo ne, nangwa kwingijisha mukumwenamo mali kwakubula kuswisha kwanembwa kufuma kuba Voice Of God Recordings®.

Pakukeba kuyukilapo bikwabo nangwatu mabuuku akwabo, mwane tumai pa:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org